





ՊԵՐՍԿԵՍԱՆԻ ՀԵՅԵՐԸ

---

ԱԶԳԱՅԻՆ ՄԱՏԵՆԱԳԱՐԱՆ

ԳԳ.

ՊԱՐՍԿԱՍՏԱՆԻ ՀԱՅԵՐԸ

ՆՐԱՅ ԱՆՅԵԱԼԸ, ՆԵՐԿԱՆ ԵՒ ԱՊԱԳԱՆ



Վ Ի Ե Ն Ն Ա

Մ Խ Ի Թ Ա Ր Ե Ա Ն Ն Տ Պ Ա Ր Ա Ն

1911.

9 (= 91.99)  
~~470~~

ՀԱՅԿԱՍՏԱՆԻ ԳՐԱԳՐԱԿԱՆ ԿԵՆՏՐՈՆ


# ՊԱՐՍԿԱՍՏԱՆԻ ՀԱՅԵՐԸ

ՆՐԱՆՑ ԱՆՑԵԱԼԸ. ՆԵՐԿԱՆ ԵՒ ԱՊՈԳԱՆ

ՄԱՍՆ Ա.

ԳՐԵՑ

Հ. ԱՌԱՔԵԼԵԱՆ



Վ Ի Ե Ն Ն Ա

Մ Ի Ի Թ Ա Ր Ե Ա Ն Տ Պ Ա Ր Ա Ն

1911.

42892  
A  $\frac{\text{II}}{32184}$



## Ա Ձ Դ

Ներկայ աշխատութիւնը մի հրատարակական դասախօսութիւն է, որն ես կարդացի Թարւիզում Ամերիկական միսիօնարների ժողովարանի դահլիճում, «Լսարանական» ընկերութեան հրատարակով, 1897 թ. նոյեմբերի 14/26ին:

Լրացուած եւ զանազան փոփոխութիւնների ենթարկուած՝ նա տպուեց մաս մաս «Հանդէս Ամօթեայ»ի մէջ 1899 թուին, եւ այժմ՝ եւս արտատպուած լոյս է տեսնում առանձին գրքով\*:

Հ. Ա.

\* Յուսալով, որ բազմազբաղ Հեղինակն քիչ ժամանակէն տրամադրելի կ'ընէ խմբագրութեանս՝ գործոյս Բ. եւ Գ. մասերն ալ, եւ այնպէս ի միասին իբրեւ ամբողջութիւն մը լոյս կը տեսնեն մէկ հատորի մէջ, մինչեւ օրս տպագիր թերթերն մնացին խաւարի մէջ. կ'ընծայենք զանոնք այժմ ի լոյս, վստահ թէ պիտի կարդացուին դարձեալ հետաքրքրութեամբ աւելի ընդարձակ շրջանակէ մը: Բ. եւ Գ. մասերն խոստացած է մեզ Յարգ. Հեղինակն առաջիկայ տարին աւարտել, որոնք ժամանակին լոյս կը տեսնեն Համդիսի մէջ:

ԵՍՄԲ. «ՀԱՆԴԻՍԻ»





ԱԹԽԱՏՈՒԹԻՒՆԸ ԿԱԶՄԵԼԻՍ ԻՆՉ ՕԳՆԵԿԱՆ ԵՆ  
ԵԳԵԼ ՀԵՏԵՒԵԱԼ ԱՂԲԻՐՆԵՐԸ

1. Voyages très curieux et très renommes faits en Moscovie, Tartarie et Perse (1633—1637) par le Sr. Adam Olearius, Amsterdam, 1727.
2. Voyages de Mr. le Chevalier Chardin en Perse et autres lieux d'Orient, Louen, 1723, Amsterdam, 1735.
3. Պատմութիւն Նոր Զուգայու որ յԱսպահան, աշխատասիրեալ է պ. Յարութիւնէ Թ. Տէր Յովհաննանց. Նոր Զուգայ, 1880:
4. Պատմութիւն Հայոց Չամչեանի, Վենետիկ, 1784:
5. Die Erdkunde von Karl Ritter, Berlin, 1838.
6. Պատմութիւն Առաքել Վարդապետի Գաղթիժեցւոյ, Վաղարշապետ, 1896:
7. Акты Кавказ. археограф. комиссіи Т. I. Тифлисъ 18.
8. Քնար Հայկական, Միանսարեանի, Ս. Պետերսբուրգ, 1868:
9. Описание переселения Армянъ аддербиджанскихъ въ предѣлы Россіи, Сергѣежъ Глинкою, Москва 1871.
10. "Շուքր-Նամէ" ձեռագիր աշխատութիւն Բէհման Միրզայի 1872 Թ. Շուշի:
11. Г. А. Езовъ, Сношенія Петра Великаго съ армянскими народами, С.-Петербургъ 1898.
12. Եւ մի քանի ուրիշ երկասիրութիւններ. որոնք յիշուած են աշխատութեանս մէջ:



ՊԵՐՍԿԱՍՏՆԵՒ ԷՆՅԵՐԸ, ՆՐԱՆՑ ԱՆՑԵԱԼԸ,  
ՆԵՐԿԱՆ ԵՒ ԱՊԸԳԱՆ

Ն Ե Ր Ա Յ Ո Ւ Թ Ի Ի Ն

Ի թիւս այն դժբախտ պատմական պատ-  
ճառների, որոնք արգելել են հայկական կեանքի  
կանոնաւոր զարգացումը, որոնք առաջ են բերել  
մի տեսակ խորթութիւն՝ զանազան երկիրներում  
բնակող Հայերի մէջ, այնպէս որ այդ խորթու-  
թիւնը շատ անգամ ատելութեան եւ թշնամու-  
թեան է հասել, մինն եւս այն անմխիթար  
երեւոյթն է, որ մենք, Հայերս, միմեանց ճանա-  
չելու ձգտում չենք ցոյց տալիս, միմեանց ուրա-  
խութիւններին եւ ցաւերին մասնակից չենք  
լինում: Օրինակ, վեր առնենք նոյն իսկ ձեզ.  
Ղարադաղցի՝ Հայը միշտ մի տեսակ խորթու-  
թիւն, թշնամութիւն է տածում դէպ ի թա-  
վրիղեցի Հայը, սա եւս նոյնպէս. Ղարադաղցին՝  
նոյն աչքով չէ նայում Ղարաբաղցու վրայ, ինչ-  
պէս նայում է իր համաքաղաքացի Ղարադաղ-  
ցու վրայ. հայ-լուսաւորչականը նոյն աչքով չէ

1 Ղարադաղ մի գաւառ է, որ գտնուում է Արարատ-  
տականում, եւ սահմանակից է Ղարաբաղին:

նայում հայ-կաթուղիկէի եւ հայ-բողոքականի վրայ, ինչպէս եւ վերջիններս առաջնի եւ միմեանց վրայ:

Բայց ո՞վ է Ղարադաղցին եւ Ղարաբաղցին. ո՞վ է հայ-լուսաւորչականը եւ հայ-կաթուղիկեայն, հայ-բողոքականը. մի՞թէ ամէնքն եւս մի եւ նոյն ցեղից չե՞ն, մի եւ նոյն ազգի զաւակներ չե՞ն. մի՞թէ ամէնքն եւս իրանց քրիստոնէութիւնը չընդունեցին Վրիգոր Լուսաւորչուց. մի՞թէ ամէնքն եւս մի եւ նոյն լեզուով չե՞ն խօսում. մի՞թէ նրանք մի եւ նոյն պատմութիւնը չունին:

Անշուշտ, այդպիսի մի խորթութիւն, այդպիսի մի վնասակար բաժանում տեղի է ունենում միշտ անկիրթ ժողովուրդների մէջ: Եթէ մի հասարակութիւն կամ ժողովուրդ անհատական կեանք է վարում, եթէ նա չէ հետաքրքրում միւս հասարակութիւնների կեանքով, եթէ նա իր ոյժը, բարօրութիւնն ընկերական կեանքի մէջ չէ տեսնում, կը նշանակէ թէ նա դեռ լուսաւորութեան ստոր աստիճանի վրայ է կանգնած: Հայերի մէջ չկայ բարոյական միութիւն, բարոյական համերաշխութիւն, որը միակ գրաւականն է ազգի զարգացման. հետեւաբար, մի տեղի Հայի ստացած անարգանքն եւ անպատուութիւնը՝ միւս տեղի Հային չէ դիպչում, չէ վշտացնում, այդ կողմից մենք Հրեաներից անգամ յետ ենք մնացել: Մի քանի տարի առաջ քութայիսում մի Հրեայ ամբաստանուեց, թէ նա իբր թէ արիւնաքամ է արել մի քրիստոնեայ

երեխայի. մի ամբաստանութիւն, որ քրիստո-  
նեաների ֆանատիկոսութիւնը մեղանշարար բար-  
ձել է այդ հալածեալ ժողովրդի վրայ. այդ  
ժամանակ համարեա՝ ամբողջ հրէական աշխարհը  
ոտքի կանգնեց եւ ամէն ջանք գործ դրեց,  
խնայելով ոչինչ՝ սրբելու ազգից այդ կեղծ  
ամբաստանութիւնը:

1871—1872 թուին սարսափելի սով էր  
Պարսկաստանում: Եւ դեռ լաւ յիշում եմ այն  
քստմենքի եւ զարհուրելի տեսարանը, որին ա-  
կանատես եղայ Թաւրիզի փողոցներում: Սովի  
երեսից, Պարսկաստանի խորքից, Հայերը փախ-  
չելով աճապարում էին գաղթել դէպ ի Ռու-  
սիա, բայց մեծ մասը ճանապարհին սովամահ  
լինելով, միայն մի փոքր մասը Թաւրէզ էր հա-  
սել: Մերկ, դողդոջուն, գերեզմանի դռնին  
մօտեցած՝ նրանք թափուած էին փողոցներում  
հաց խնդրելով: Թաւրիզի սակաւաթիւ հայ  
ժողովուրդն աճապարեց ժողովրդի աւերման այդ  
մնացորդը պատսպարել եւ փրկել, բայց եթէ  
անգղիական ազգի օգնութիւնը հասած չլինէր,  
Սպահանում համարեա բոլոր Հայերը կը կո-  
տորուէին: Լոնդոնից ահագին գումարներ էին  
ուղարկուում, որոնցով անգղիական հիւպատոս-  
ները հաց էին մատակարարում թշուառներին,  
եւ այդպիսով նրանք աղատեցին համարեա բո-  
լոր պարսկական ազգը, նրա հետ եւ Հայերին:  
Բայց Ռուսաստանի կամ Թիւրքիայի ո՞ր Հայը  
օգնութեան ձեռք կարկառեց իր հարազատ  
եղբօր: Ոչ ոք: Էւ երբ սովից յետոյ Հայերը

գունդ գունդ գաղթեցին մեր երկիրը, Նախի-  
ջեւանի եւ Երեւանի կողմերը, ո՞վ աճապարեց  
մի յանձնաժողով կազմել եւ չթողնել, որ  
թշուառները մեռնին տենդից, վարակիչ հիւ-  
անդութիւններից, եւ այլն: Ոչ ո՞ք: Ես կարող  
եմ ասել, որ մինչեւ անգամ չգիտէին թէ  
Պարսկաստանի շայերը ենթարկուել են մի այդ-  
պիսի աղէտի եւ ոչ ո՞ք տեղեկութիւն չունէր  
այդ մասին: Անշուշտ, այդ բոլորն առաջ է  
գալիս նրանից, որ մենք ոչինչ տեղեկութիւն  
չունենք այն մեր եղբայրների մասին, որոնք  
ապրում են երկրագնդի զանազան կողմերում:  
Դեռ մի 10 տարի առաջ Թիւրքա-Հայաստանը  
մեզ համար terra-incognita էր, իսկ այսօր այդ-  
պիսի terra-incognita է եւ Պարսկա-Հայաստանը,  
Միայն վերջին պատերազմի պէս մի զարհուրելի  
ցնցում հարկաւոր էր, որ ստիպէր մեզ տեղե-  
կութիւններ հաւաքել Թիւրքիայի շայերի մասին,  
նրանց կեանքով հետաքրքրուել, դասախօսու-  
թիւններ կարդալ, թղթակցութիւններ գրել,  
եւ այլն:

Մենք նման ենք այն ճարտարապետին, որ  
կամենալով մի հին շինութիւն նորոգել, ուշք չէ  
դարձնում հիմքի վրայ. մենք կամենում ենք,  
ձգտում ենք լուսաւորել ժողովուրդը, բայց  
անծանօթ ենք այդ ժողովուրդին: Շինութիւնը  
կարող է գեղեցիկ դուրս գալ, բայց կարող է  
եւ շուտով փլչել, որովհետեւ հիմքը խախտւած էր:  
Գրան նման է եւ այն ձեւը, որով մենք  
կամենում ենք լուսաւորութիւն տարածել մեր

ազգի մէջ: Հիմքը՝ ինքն ժողովուրդն է, իսկ մենք չգիտենք այդ հիմքը որքան հաստատուն է: Մենք չգիտենք իսկապէս ինչ է հայ ազգը, որովհետեւ մենք չգիտենք նրա թիւը, չգիտենք նրա դրութիւնը, չգիտենք այն պայմանները, որոնց ենթարկուած է նրա կեանքը զանազան երկիրներում, այն յատկութիւնները, որոնք սեպհական են նրան: Մինչեւ անգամ մեր լեզուն, մեր գրականութիւնը զանազան տեղերում՝ ուրոյն ուրոյն ուղղութիւն են ստանում: Ինչ վիճակի մէջ է դրած Թիւրքիայում հայ դպրոցական գործը, ինչ ուղղութեամբ է գործում այնտեղ մամուլը, որքան բարեյաջող է ժողովրդի տնտեսական դրութիւնը, ինչ տեսակ տարրերով է նա շրջապատուած, եւ այլն, մինչ այժմ եւս սրանց մասին մեր ունեցած տեղեկութիւնները՝ միայն կցկտուր եւ անկապ բաներ են: Այս կողմից եւս առաւել անգէտ են Թիւրքիայի Հայերը մեզ՝ Ռուսահայերիս եւ Պարսկահայերիս վերաբերմամբ: Վաւառներում միայն մի բան գիտեն, — թէ իրենցից հեռու կայ մի հայութեան կենդրոն՝ — Էջմիածինը, եւ ուրիշ ոչինչ:

Իսկ մինչեւ վերջին սոսկալի աղէտները, մինչեւ վերջին կոտորածները՝ կրօնական հալածանքը դեռ մեծ դեր էր խաղում Թիւրքիայի Հայերի մէջ. հայ-լուսաւորչականը հալածում էր հայ-կաթողիկէին եւ հայ-բողոքականին, սա եւս նրանց, բայց այն՝ ինչ որ դարերի ընթացքում չկարողացաւ կատարուել, վերջին սոսկալի

աղէտը՝ դժբախտութիւնը կատարեց. այլա-  
դաւան շայերի մէջ հաստատուեց եղբայրական  
համերաշխութիւն, միութիւն: Եւ ինչի՞ համար  
էին հալածում շայերը միմեանց. կրօնական  
համոզումների համար: Բայց այդ շատ սխալ է  
եւ ահա ինչ պատճառով:

Կրօնը անհատական խղճի ազատութեան  
գործ է. ուրեմն մենք չպէտք է գործ ունենանք  
նրա հետ եւ դիպչինք նրան: Ամէն մարդ պէտք  
է ազատ լինի իր Աստուածն իր համոզմանը հա-  
մեմատ պաշտել: Շատ հասկանալի կը լինէր,  
եթէ դուք հալածէիք բողոքական եւ կաթոլիկեայ  
շային ոչ թէ հաւատի, դաւանութեան  
համար, այլ եթէ նա ուրանում էր իր ազգայ-  
նական պայմանները, այն է՝ իր լեզուն, պատ-  
մութիւնը, անցեալը, հայութեան ընդհանուր  
ապագան. հալածեցէք բողոքական, կաթոլիկեայ  
քարոզիչներին, եթէ նրանք աշխատում են հայ  
մատաղ սերնդի սրտից ջնջել ազգայնութեան  
գաղափարը, բայց մի հալածէք նրանց, եթէ  
նրանք համոզուած լինելով, որ քրիստոնէական  
կրօնի այս կամ այն դաւանութիւնն կամ ձեւն  
աւելի ճշմարիտ է, աշխատում են այդ համոզ-  
մունքը տարածել եւ ուրիշների մէջ. այդտեղ՝  
շատ շատ՝ զայրացէք եւ պախարակեցէք հայ-  
լուսաւորչական հոգեւորականութիւնը, որ պոր-  
տաբոյժ, անգործ կեանք վարելով, չէ կարողա-  
նում մրցել այլադաւան հոգեւորականների  
հետ եւ բարոյական ազդեցութիւն գործել իր  
հօտի վրայ:



Ես արդէն կարդում եմ ձեզանից շատերի  
 դէմքի վրայ արտայայտուած զարմանքը. մի թէ  
 ես հերքում եմ ազգային եկեղեցու նշանակու-  
 թիւնը. գիտեմ նոյնպէս, որ մեր quasi — ազ-  
 գասէրները կարող են կնքել ինձ եւ դաւաճան,  
 ուրացող անունով, որ ես իբր թէ նշանակու-  
 թիւն չեմ տալիս « Հայ-բողոքական Առաքելական  
 Եկեղեցուն » : Այ, ես մեծ նշանակութիւն եմ տա-  
 լիս ազգային եկեղեցուն եւ չեմ կարող չտալ,  
 որովհետեւ Հայոց ազգային եկեղեցին մի այն-  
 պիսի հաստատութիւն է, որ ցոլացնում է իր  
 մէջ ազգի բազմադարեան կեանքը, այն է՝ նրա  
 կրած տանջանքները, ցաւերը, ուրախութիւն-  
 ները, մի խօսքով, ազգի հոգեբանական՝ ուրեմն  
 ամենակարեւոր կողմը, ազգի անցեալը, պատ-  
 կերը, պատմութիւնը: Ես այդ շատլաւ գիտեմ,  
 բայց գիտեմ նոյնպէս, որ ո՛չ մի՛ փոքր ի շատէ  
 խեղճ գլխին կրթուած հայ-կաթողիկեայ, հայ-  
 բողոքական՝ չէ կարող ուրանալ ազգային եկե-  
 ղեցին, չէ կարող չձանաչել Գրիգոր Լուսաւոր-  
 չին, Մեծն Ներսիսին, Սահակին, Մեսրոպին,  
 Ներսէս Շնորհալուն, Ներսէս Լամբրոնացուն,  
 որոնք նոյնքան թանգ պէտք է լինին՝ եւ են հայ-  
 կաթողիկէի, հայ-բողոքականի համար, ինչքան  
 են հայ-լուսաւորչականի համար: Ես միայն կա-  
 մեցայ հասկացնել ձեզ, որ դաւանաբանական  
 հարցերի համար չպէտք է մի եւ նոյն ցեղի, ազգի  
 անդամները, եղբայրները միմեանց հալածեն:

Այս բոլոր ասածիցս յետոյ գալիս եմ իմ  
 առաջուայ խօսքին թէ՛ ազգի լուսաւորութեան

Համար հոգացողները պէտք է ծանօթ լինեն այդ ազգի ներկայ դրութեան հետ, եւ թէ իւրաքանչիւր ձեռնհաս եւ հասկացող Հայի սեպուհ պարտաւորութիւնն է ազգի անդամներին միմեանց հետ ծանօթացնել: Երբ մենք մի ընդհանուր գաղափար կ'ունենանք հայութեան վիճակի մասին, այն ժամանակ մեր գործը չափազանց կը հեշտանայ, որովհետեւ մեր գործունէութիւնը հետեւանք կը լինի բարեխիղճ ուսումնասիրութեան: Յանպատրաստից գործելը մեզ միշտ մեծամեծ վնասներ է տուել. երբ հայ պատրիարքարանին հարկաւոր էր տեղեկագիր ներկայացնել եւրոպական պետութիւններին՝ Թիւրքիայի Հայերի քանակութեան եւ առհասարակ դրութեան մասին, նա չգիտէր որ ջուրը ընկնէր. նա ծանօթ չէր ժողովրդի հետ:

Աւերջին տարիներս ժողովրդի հետ ծանօթանալու ձգտումը հետզհետէ աճում է: Այժմ մեր պարբերական մամուլն իր մշտական թղթակիցների ձեռքով անընդհատ տեղեկութիւններ է հաղորդում Թիւրքիայի Հայերի մասին. այդ ծանօթութեան հիմքը դրին Թիֆլիսում կարդացուած հրապարակական դասախօսութիւնները, օրինակ՝ Գ. Արծրունու, Ա. Թոխմախեանի, Ս. Մանդինեանի, որոնք բաւականին նպաստեցին գործին: Եւ ճշմարիտ՝ հրապարակական դասախօսութիւնն ամենալաւ միջոցն է նպատակին հասնելու: Ես եւս այդ ճանապարհն ընտրեցի՝ ծանօթացնելու ձեզ հայ ազգի մի բեկորի հետ:

## Ա.

Յայտնի է պատմութիւնից, որ ոչ մի պատմական ազգ այնքան մեծ ազդեցութիւն չէ ունեցել Հայերի վրայ, այնքան սերտ միջամտութիւն չէ գործել նրանց՝ մինչև անգամ ընտանեկան գործերի մէջ, որքան պարսկական ազգը: Գեո ամենահին պատմական ժամանակներում, Պարսիկները մեծ դեր են խաղացել հայ պատմութեան մէջ: Մենք գիտենք, որ Հայաստանը դեռ թագաւորական իշխանութիւն ունենալուց յառաջ՝ տարեկան իբրև հարկ վճարում էր Պարսկաստանին 20,000 երիվար: Մեր Արշակունի հարստութեան հիմնադիրը, այդ փառաւոր թագաւորութեան նախահայրը, որ այնքան երկար ժամանակ իշխեց Հայաստանում, միխութով՝ Աղարշակը՝ — Պարսից թագաւորի եղբայրն էր: Քանի որ Պարսկաստանի մէջ տիրում էր Հայաստանի թագաւորների ազգական ցեղը, այդ տէրութիւնները միմեանց հետ հաշտ էին եւ միմեանց օգնում էին, բայց երբ Պարսկաստանում սկսեց տիրել Սասանեան ցեղը, օրինակ՝ Հայոց Խոսրով թագաւորի ժամանակ, Հայաստանը փախտականներին եւ հալածականներին իբրև ապաստանարան էր ծառայում: Այդ երկու երկիրների մէջ փոխադարձ յարաբերութիւնները դիւրացնում էր եւ այն հանգամանքը, որ երկուսն եւս համակրօն էին, բայց երբ Հայաստանն ընդունեց քրիստոնէութիւնը, այն ժամանակ խորութիւնը մեծացաւ եւ հետզհետէ մինչև յայտնի թշնամութեան հասաւ,

որի արգասիքն քաջ Աւարդանի եւ իր ընկեր-  
ների անմահ գործն եղաւ, երբ նրանք մայրենի  
եկեղեցու եւ հողի համար նահատակուեցան:

Ի հարկէ այգպիսի մերձ յարաբերու-  
թիւնները չէին կարող առանց մեծ ազդեցու-  
թեան մնալ հայկական գրականութեան, լեզուի  
եւ առհասարակ ազգային բնաւորութեան վրայ:  
Դեռ քանի որ հայկական տառերը չէին գըտ-  
նուած, Հայաստանի շատ տեղերում պարսկա-  
կան գրերն էին գործածւում, Հայոց չաստուած-  
ների շատերը Պարսից չաստուածներն էին:  
Դեռ մինչեւ այսօր եւս զանազան սովորութիւն-  
ների եւ սօների մէջ հեթանոս Պարսիկների  
հետքը մնացել է Հայոց մէջ: Ես հաշուել եմ  
մեր լեզուի մէջ մի եւ նոյն ուղղագրութիւնը,  
նշանակութիւնն ունեցող մօտ երկու հարիւր  
պարսիկ բառեր, զոր օրինակ՝ կանգ, սուգ,  
հազար, ճրագ, բրինձ, ճար, մարգ, դուխտ,  
գրախտ, խորտիկ, բաղուկ, ակահ(ներհուն),  
նիազ, քէշ, յաշտ, նհանգ, բախտ, ճետ, խազմ,  
պարսատակ, դեւ, պանիր, թագ, գոհար, դպիր,  
նկար, խմոր, (հ)ամբար, շտապ, թոնիր, հուր,  
տապար, բարակ, զօր, փաշաման, եւն:

Ահա ինչ է ասում գերմանացի գիտնա-  
կան Կարլ Ռիտտեր՝ իր հռչակաւոր երկրագի-  
տութեան գրքի մէջ:

“Նաեւ Սասանեանք, Զրադաշտի վարդա-  
պետութիւնը, ինչպէս եւ մոզութիւնը՝ առանց  
ազդեցութեան չմնացին հայկական գրականու-  
թեան վրայ, եւ դրա համար այն ժամանակուայ

պարսկական գրութեան անհետանալուց յետոյ (Օմարի տիրապետութեան ժամանակ), հայ ձեռագիրների մէջ մնացել է շատ բան, որ լոյս է սփռում այդ շրջանի եւ գրականութեան վրայ: Երբ Հայաստանի՝ աւելի անկախ Արշակունեաց թագաւորութիւնը ոչնչացաւ եւ Պարսկաստանի հողից աքսորուած Արշակունի իշխաններն ապաստանեցին Հայաստան, որպէս զի այդ երկրից՝ իրանց երջանիկ հակառակորդներին յափշտակուած դահի վըայից դուրս վանեն, այդ միջոցին Սասանեանք՝ մոգերի միջոցով սկսեցին քարոզել հաւատափոխութիւն. եւ այդ մի վտանգաւոր օրինակ եւ յաջորդութիւն պիտի դառնար մահամետական Արաբների ձեռքում, որոնք յաջորդեցին նրանց: Այդ ժամանակ Հայուն հ թագաւորը կամեցաւ թրի զօրութեամբ մտցնել Հայաստանի մէջ մոգութիւնը կամ մազդեզանց օրէնքը: Սասանեանք շատերին դարձրին, շնայելով որ քրիստոնեայ հեղինակները մոգերի դէմ սատակ հակաճառական գրուածներ էին տարածում, զոր օրինակ՝ գիտնական հայ հոգեւորականները — Եղնիկ, Արձան, Արծրունի եւ այլք: Վարդան զօրավարի Պարսից դէմ ունեցած պատերազմի պատմութեան մէջ, որ նկարագրել է Ե. դարի կիսում Եղիշէ Վարդապետը, մի պատմութիւն որ պարունակում է իր մէջ Հայերի հերոսական պատերազմն եւ հաստատամտութիւնը, որոնց՝ ուժով կամենում էին բռնադատել՝ Յիսուսի Վարդապետութիւնը Չրադաշտի հրապաշտութեան հետ փոխանակել. այդ պատմութեան մէջ պահպանուել է Հայաստանի պարսիկ մարդպան Աէհմիհրներսէհի հրամանը, որ յորդորում է հայ քրիստոնեաներին Չրադաշտի կրօնն ընդունելու, եւ որի մէջ բացատրուած է այդ կրօնի վարդապետութիւնը: Եւ որովհետեւ գայթակղութիւնը շատ հրապուրիչ էր, վասն զի ուրայման հետ կապուած էին շատ քաղաքական արտօնու-

Թիւններ, ուստի եւ, ինչպէս տեսնուած է Շապուհ Բ. ի Արշակի հետ ունեցած կռուի պատմութիւնից, որ պատահեց Պ. դարու կիսում, Հայաստանի ականաւոր իշխանազուններն՝ ուրացող Մեհրուժանի եւ Արծրունիների միջոցով, եւ Վահան Մամիկոնեանի ձեռքով, ուրացին քրիստոնէութիւնն եւ Հայաստանի երկրների վրայ հրամանատար կարգուեցին Սասանեանց տիրապետութեան ժամանակ: Առաջինը ստացաւ Վասպուրականը, մի մեծ գաւառ, որ բնկնում է Վանայ լճի հարաւում, մինչ երասխը եւ Ուրմիի ծովակի եզերքը՝ Ատրպատականում, երկրորդը՝ դարձաւ զօրապետ կամ հրամանատար Հայաստանի: Այն ժամանակ քրիստոնէութեան եւ հայ ազգի դէմ տակըութեամբ լցուած Մեհրուժանը՝ Պարսից թագաւորի մի հրամանը հրատարակեց Հայաստանի մէջ, որով արգելւում էր կարգալ հայերէն եւ յունարէն լեզուներով գրուած գրքերը. եւ որպէս զի աւելի շուտով իր նպատակին հասնի, նա 381 թուին հրամայեց բոլոր այդ գրքերը հրոյ ճարակ տալ:

«Այդ էր Հայաստանի վիճակը, որն ի նկատի ունի ժամանակակից Ամմիանոսը, երբ նա խօսում է Հայաստանի մեծ մասի, կամ իր խօսքով՝ այն երկրի մասին, որ Մարաստանի դէմ սահման եւ պատուար է, որն Արտաշատի հետ, Յովհանոս կայսեր ամօթալի հաշտութեան շնորհիւ, շուտով բնկաւ Սասանեանց, կամ ինչպէս ինքն ասում է՝ Պարթեւների իշխանութեան ներքոյ (Amm. Marc. XXV. 7, 12). Unde postea contigit, ut vivus caperetur Arsaces, et Armeniae maximum latus Medis conterminans, et Artaxata inter dissensiones et turbamenta raperent Parthi.) Սակայն պէտք է զանազանել այդ բռնութեամբ նուաճուած ամբողջ Հայաստանի մեծ կէտը, այսինքն արեւելեան Հայաստանը, որին պատմագիրները Պարսկա-Հայաստան անունն են տալիս, մի

եւ նոյն անունով այն փոքր գաւառից, որն մինչեւ այսօր եւս նմանապէս կոչուում է Պարսկ-Հայաստան, որովհետեւ այդ անուամբ նա կոչուում է Մովսէս Խորենացու աշխարհագրութեան մէջ Գերորդ գաւառ, Armenia Persica, որ բնկնում է Վարսի եւ Ատրպատականի մէջ, եւ որտեղ գտնուում են հռչակաւոր Հեր եւ Զարեւանդ գաւառները, որոնց զլիսաւոր քաղաքն է այսօր Սալմասկամ Սաղմաստ:»<sup>1</sup>

Միեւնոյն աշխարհագիրը, խօսելով հայկական լեզուի մասին, ասում է.

«Հայաստանի հին ժողովրդական երգերն իրենց ծագման մէջ խիստ յարաբերութիւն եւ ազգականութիւն ունին ի հնումն հռչակուած Պարսից Ֆրգուսի Շահնամէի երգերի հետ:»

Հին Պարսկաստանի՝ Հայաստանի վրայ ունեցած ազդեցութեան մասին այս կարճառօտ բացատրութիւնը տալուց յետոյ, գառնանք մեր բուն նպատակին, այն է տեսնենք թէ այն Հայերը, որոնք այսօր բնակուում են Պարսկաստանի զանազան քաղաքներում, որտեղից յառաջ եկան. կամ բացատրենք այժմեան Պարսկահայոց ծագումը: Սակայն Պարսկահայ ասելով չպէտք է հասկանալ հին Հայաստանի այն մասը, որ Խորենացու աշխարհագրութեան Ծրդ գաւառն է եւ պարունակում է իր մէջ այժմեան Ատրպատական գաւառը. մեր խօսքն այն Հայերի մասին է, որ իրենց բնակութիւնը հաստատել են բուն Պարսկաստանի կամ Արագըս-

<sup>1</sup> Die Erdkunde von Karl Ritter, 10. Theil, Bd. VII. Berlin 1843. Drittes Buch, West-Asien.

տանի մէջ, գլխաւորապէս Սպահան, Համա-  
տան, Շիրազ, Թէհրան եւ այլ քաղաքներում,  
եւ որոնց ծագումն աւելի մօտ գաղթականու-  
թեան արդիւնք է: Այդ Հայերը գաղթեցին  
Հայաստանից Պարսկաստան ժ.է. դարում՝ մեծն  
Շահարբասի թագաւորութեան ժամանակ եւ  
նրա բռնակալ Տրամանով, մինչդեռ Ատրպա-  
տականի կամ բուն Պարսկահայքի մէջ գտնուած  
Հայերը շատ հին ժամանակից ի վեր բնակուել  
են այդ երկրում, եւ ամբողջ դարերի ընթաց-  
քում ենթակայ են եղել շատ աղէտների եւ  
տառապանքի: Ատրպատականի մէջ եղած քա-  
ղաքները — Թաւրէզ, Մարանդ, Ուրմիա, Խոյ,  
Մարաղա, Սալմաս դեռ պատմական ամենահին  
ժամանակում յայտնի են եղել իւրեւ բազմա-  
մարդ հայ քաղաքներ. այսպէս գիտենք, որ  
Քրիստոսի երկօտասան առաքեալներից մինը  
Յուդա կամ Թադէոս՝ Հայաստան եկաւ եւ այդ-  
տեղ մեռնելով, թաղուեց Ուրմի քաղաքում:  
Ժ.է. դարում՝ Անկիթիմուրի արշաւանքից յե-  
տոյ, երբ յայտնուեց բռնակալ Յուսուփ ամի-  
րան, որ Հայաստանն արեան ծով դարձրեց,  
Թովմաս Մեծորեցի ականատես պատմագրի  
վկայութեան համեմատ, Ատրպատականում  
Հայերի մեծ բազմութիւն կոտորուեց, օրինակ՝  
1425 թուին Յուսուփի որդի Աքանտարը՝ առ-  
նելով Ուրմի քաղաքը, որի բնակիչները կէսից  
աւելի Հայ էին, նոյն Թովմաս Մեծորեցու ասե-  
լով, կոտորեց բոլոր Հայերին եւ ոչ մի հաս-  
եւս թողեց, բաց ի մանուկներից եւ աղջիկնե-



րից: Ատրպատականի մէջ գտնուած Հայերի  
չատութեան մի ուրիշ ապացոյցն եւս այն է, որ  
երբ ժ.Գ. դարում, 1333 թուին, Յովհան  
Քանեցի կոչուած Վարդապետը հաստատեց Ու-  
նիտորների կարգը, որ այնքան շիթութիւն-  
ների պատճառ դարձաւ, այդ կարգին պատկա-  
նող վարդապետներն իրանց վարդապետութեան  
քարոզութեան համար իբրեւ կենդրոն ընտրե-  
ցին Թաւրէզ, Մարաղա, Սուլթանիյէ քաղաք-  
ները Նախիջեւանի հետ:

Սուլթանիյէ եւ Ռէյ քաղաքների վրայ  
փոքր ինչ աւելի պէտք է կանգ առնենք: Չգի-  
տենք, ինչ հիման վրայ՝ մի քանի պատմագիրներ  
ասում են, որ իբր հին ժամանակներում Հայաս-  
տանի վերջին թագաւորներն իրանց պալատն  
այդտեղ էին պահում, եւ այդ ժամանակ 400  
եկեղեցիներից աւելի կար այդ քաղաքում, եւ  
թէ այդ եկեղեցիների աւերակներն մինչեւ այժմ  
տեսնւում են:

Այստեղ յառաջ կը բերենք երկու վստա-  
հելի ճանապարհորդների կարծիքները Սուլթա-  
նիյէի մասին: Շարդէն, իր գրքի Գ. հատորի  
մէջ գրում է:

«Սուլթանիյէ քաղաքը շինուած է մի լեռան  
ստորոտում. հեռուից շատ դեղեցիկ է երեւում,  
բայց մօտիկից ոչ: Մի քանի հասարակական մեծ  
շինութիւններ կան՝ ճարտարապետութեան եւ  
քանդակագործութեան տեսակէտից. նա 3000  
տուն ունի: Բնիկներն ասում են, որ այդ քաղաքը  
յառաջ կէս մղոն տեղ էր բռնում, դէպ ի արեւ-  
մուտք, եւ այն եկեղեցիները, մկրթութները, աշտա-

րակները, որոնց աւերակները տեսնուած են այդ կողմում՝ այդ քաղաքի մասն էին կազմում: Այդ կարող է ճշմարիտ լինել, որովհետեւ Պարսից պատմագիրները հաւատացնում են, որ Սուլթանի իշխէն տէրութեան ամենամեծ մայրաքաղաքն էր, եւ աշխարհում շատ քիչ քաղաքներ կան, որոնք այդքան շատ աւերակներ ունենան:

Պարսկաստանի պատմագրներից ոմանք ասում են, որ այդ քաղաքը Պարթեւների ամենահին քաղաքներից մինն է, եւ նրա հիմնադիրն անյայտ է: Արիշներն ասում են ընդհակառակն՝ որ առաջին հիմքն ձգուեց Առիւծի իշխանութեան ժամանակ, Էրզոն Խանի հրամանով եւ թագաւորութեան ժամանակ, որ Հալաբու Խանի թոռն էր, եւ որովհետեւ քաղաքի շինութիւնը չվերջացաւ նրա կենդանութեամբ, նրա որդի Էանդու Սուլթանն աւարտեց շինութիւնը ժ. Գ. դարի սկզբում, եւ կոչեց Սուլթանիյէ, այսինքն արքայական քաղաք: Սակայն ես լսեցի շատ տեղեակ անձերից, որ այդ քաղաքը Սուլթանիյէ անունն սկսել է կրել միայն այն օրից՝ երբ Պարսկաստանի վերջին թագաւորները, որոնք նոյնպէս Սուլթան էին կոչուած, իրանց բնակութիւնը հաստատեցին այդ տեղ: Շահարբաս Մեծն փոխադրեց մայրաքաղաքն այդ տեղից Սպահան ժ. Զ. դարի վերջում:

Եւրոպայի այժմեան մի քանի հեղինակներ համարձակ կերպով պնդում են, որ Սուլթանիյէն կառուցուել է Տէքրան-Էրթի աւերակներից. եթէ այդ ճիշդ է, ուրեմն կարելի է ասել, որ այժմեան անունը կազմուել է իր հին անունից. Էրթ հին պարսկերէն նշանակում է +աղ+։ Տէքրան-Էրթ նշանակում է Տիգրանի քաղաք, որն, ինչպէս ամէն մարդ գիտէ, Հայաստանի թագաւոր էր: Սակայն ես չգիտեմ, ինչպէս Սուլթանիյէն կարելի է Տիգրանակերտի տեղ ընդունել. Տակիտոսը ասում է, որ

Տիգրանակերտը Նիղիբից (Մծբին) 37 մղոն հեռու էր, իսկ այդ քաղաքը գտնուում է Միջագետքում, Տիգրիս գետի վրայ՝ Նինուէից 35 մղոն հեռու:


«Սուլթանիյէն շատ անգամ աւերուեց. առաջին անգամ Խօջա Մէշիդ՝ Պարսկաստանի թագաւորից, որին պատմագիրները կոչում են Գիւղան, որովհետեւ նա ապստամբել էր եւ զէնք էր վեր առել այդ թագաւորի դէմ. ապա Թիմուրլէնին աւերեց: Իսմայէլ Սօֆիի նախորդները, սկսեալ հիծբէյի 700 թուականից, այն է 1300ից, մի քանի ժամանակ այդ տեղ հաստատեցին իրանց բնակութիւնը. եւ ասում են, որ մի քանի դար առաջ, Հայաստանի վերջին թագաւորներն այդ տեղ էին հաստատել իրանց արքունիքը, եւ նրանց ժամանակին շորս հարիւրից աւելի եկեղեցիներ կային: Այդ եկեղեցիների շատերի աւերակները դեռ տեսնուում են, բայց ամբողջ մնացած մի հատ չկայ, եւ ոչ եւս մի հատ քրիստոնէայ է բնակուում այդ տեղ:»

Մի այլ հեղինակ՝ Ադամ Օլէարիոս, որ Ճանապարհորդեց Պարսկաստան 1633—1639 թուին՝ ուրեմն Շարդէնից առաջ, ահա ինչ է գրում:

«Սուլթանիյէ քաղաքը հեռուից շատ զեղեցիկ է երեւում՝ մի քանի սիրուն շինութիւնների, բաղնաթիւ զանգակատների՝ եւ մեծ սիւների պատճառով, բայց ներսից բոլորովին անապատ է, եւ բոլոր պարիսպները քանդուած են: Առաջ, նա Պարսկաստանի ամենամեծ եւ զեղեցիկ քաղաքներից մինն էր եւ կէս մղոնից աւելի երկայնութիւն ու-

1 Արդեօք Օլէարիոսի ժամանակ դեռ կանգուն էին եկեղեցիների զանգակատները, թէ՛ զանգակատուն ասելով հասկանում է մինարէները. չգիտենք, հաւանական է վերջին ենթացքով թիւնը:

ՊԵՐՅՈՒՄԵՆԻ ԸՅՅԵՐԸ



նէր, որուն նշաններն այսօր էլ տեսնում են  
Համասանի ճանապարհի վրայ, քաղաքից կէս մղոն  
հեռու, մի աշտարակաւոր դռան վրայ, որ բոս  
աւանդութեան քաղաքի դռան է եղել:

«Սուլթան Մահմէդ Խոզարէնդ, երբ միացրեց Հնդկաստանի, Ուղբէկների եւ Թիւրքիայի մի մասն իր պետութեան հետ, հին Տէր-ն-Վերք քաղաքի աւերակներով շինեց այդ քաղաքը, եւ դարձրեց իր կայսրութեան մայրաքաղաք: Խօջա Բէշիդ, Պարսկաստանի թագաւորը, որին Յովսէփ Բարբարուսը (Jos. Barbarousse) անուանում է Գէ-շ-մ, քանդեց Սուլթանիյէ քաղաքը բնակիչների ապստամբութեան պատճառով, իսկ Լէնկիթիմուր բուրոյլին կործանեց. ամենագեղեցիկ շինութիւնն այժմ մի մզկիթ է, ուր գտնւում է Խօջա Բէնդի գերեզմանը. նա երեքդռնանի է եւ ամենեւին անաղից կամ պղնձից չէ շինուած, ինչպէս ասում է Բիզարրիւսը, այլ յղիւած պողպատից: Այդ քաղաքը այժմ 6000 բնակիչ ունի:»

Անձամբ կամենալով ստուգել այդ իրողութիւնը, ես մի քանի անգամ թէհրան գնալիս, երբ իջեւանել եմ համանուն Սուլթանիյէ գիւղում, հետազօտութիւններ եմ կատարել. բաղմամբ աւերակները, մինչեւ այսօր դեռ կանգուն մնացած, թէեւ կիսաւեր, հուշակաւոր «Սուլթանիյէ» մզկիթը, լայնատարած եւ ահագին շրջակայ դաշտերը, թուրք բնակիչների աւանդութիւնը՝ թէ յառաջ Սուլթանիյէի բնակիչները քրիստոնեայ են եղել, վերջապէս տեղացիների հաստատմամբ, աւերակների մէջ խաչքարներ եւ այլ քրիստոնէական նշաններ գտնելը՝ — այդ բոլորը ցոյց է տալիս, որ Սուլթանիյէն՝ արդարեւ՝ մի ժամանակ հզօր

եւ մեծ քաղաք է եղել, որի բնակիչները մեծա-  
մասնութիւնը քրիստոնեաներ են եղել: Այդ  
մասին մենք ունինք եւ մի աւելի հաստատուն  
պատմական փաստ: Մեզ յայտնի է, որ 1330  
թուին, Հռովմի Պապը, Սուլթանիյէ քաղաքի  
արքեպիսկոպոս նշանակեց Յովհաննէս Կոր ա-  
նունով եկեղեցականին (Jean de Cor): Արքե-  
պիսկոպոսական աթոռ հաստատելը մի քաղա-  
քում՝ ցոյց է տալիս, որ քրիստոնեաների մեծ  
բազմութիւն պէտք է եղած լինէր այդտեղ.  
այդ քրիստոնեաները Հայ էին, որոնց մի մասը՝  
երեւի Ունիտորների ջանքերով՝ ընդունեցին  
կաթոլիկէականութիւն<sup>1</sup>:

Երեւում է նոյնպէս, որ Հայեր եղել են  
նաեւ հռչակաւոր Ռէյ քաղաքում: Ատիայի այդ  
ամենահռչակաւոր քաղաքի մասին, որի աւե-  
րակներն այսօր գտնուում են Թէհրանի մօտ,  
պատմագիրները հրաշալիք են պատմում: Իննե-  
րորդ դարում Ռէյ քաղաքն ուներ 96 թաղ,  
իւրաքանչիւր թաղ ուներ 46 փողոց, իւրա-  
քանչիւր փողոց — 400 տուն եւ 10 մզկիթ.  
կար 6400 դպրոց, 16.600 բաղնիք, 15.000  
աշտարակ, 12.000 ջրաղաց, 17.000 ջրանցք,  
13.000 քարվանսարայ: Մեծ շահավաճառ  
քաղաք էր, եւ կոչուում էր «Տիեզերքի վաճա-  
ռատունը», ուստի եւ անկասկած է՝ որ այդտեղ  
Հայերի մեծ բազմութիւն պէտք է լինէր: Ռէյը  
կործանուեց Ժ.Ա. եւ Ժ.Բ. դարում Թաթարներից:

<sup>1</sup> Nouvelles Annales des Voyages par V. de  
S.-Martin. Paris 1852, Octobre.

Պարսկաստանի Հայերի ծագման, ուրեմն  
 եւ ժէ. դարի մեծ գաղթականութեան պատ-  
 մութիւնն աւանդել է մեզ յետագաներիս Ա-  
 ուաքել Վարդապետ Դավրիժեցին, որ իր պատ-  
 մութիւնը գրել է 55 տարի յետոյ: — Աուաքել  
 Վարդապետը, բնիկ Դավրիժեցի՝ որի ցեղը  
 մինչեւ այսօր եւս յարատեւում է այդ քաղա-  
 քում, Էջմիածնի միաբան էր: Հայոց ՌՃ, այս-  
 ինքն՝ փրկչական 1651 թուին՝ Փիլիպպոս Կա-  
 թուղիկոսի հրամանով սկսեց գրել իր ժամա-  
 նակի անցքերի պատմութիւնն եւ չորս տարի  
 աշխատելով՝ բաց թողեց, բայց այդ Կաթուղի-  
 կոսի մահից յետոյ, յաջորդ Յակովբ հայրա-  
 պետի ստիպմամբ դարձեալ ձեռնարկեց այդ  
 գործին եւ աւարտեց իր պատմութիւնը 1662  
 թուին:

Այդ պատմութիւնն ամփոփում է իւր  
 մէջ վաթսմամեայ մի շրջան, այն է 1601ից  
 մինչեւ 1662 թիւը: Նրա մէջ հաղորդուած  
 փաստերին մենք պէտք է ամենայն վստահու-  
 թեամբ հաւատ ընծայենք, որովհետեւ ինքը  
 պատմագիրը կամ ականատես է եղել կամ  
 լսել է ականատեսներից: Այդ պատմութիւնը  
 տպուել է անմիջապէս իր վերջանալուց 7 տարի  
 յետոյ, այն է 1669 թուին, Հողանդայի  
 Ամստերդամ քաղաքում՝ Ռսկան Վարդապետի  
 ձեռքով:

Այդ մեծ գաղթականութիւնը սկսուեց  
 1586 թուին եւ կատարուեց 1604—1605  
 թուին, այսինքն մեզանից ճիշդ 294 տարի

առաջ: Գարձեալ մի անգամ եւս թշուառ հայ  
 ազգը կորստեան անդնդին մօտեցաւ, դարձեալ  
 մի անգամ եւս հայ ազգը զգաց, որ իր գլխին  
 ծանրացել է Նախախնամութեան աջն եւ հա-  
 սել է իր վերջին օրը. կարծես երկնային եւ  
 երկրային բոլոր ոյժերը — սով, ժանտախտ,  
 հուր, սուր եւ թուր միաբանել էին՝ այդ բազ-  
 մաչարչար նահատակ ժողովուրդը ջնջելու եւ  
 բառնալու երկրիս երեսից . . . : Բայց յառաջ  
 մեզ հարկաւոր է մի որոշ գաղափար տալ այն  
 ժամանակուայ քաղաքական դրութեան եւ  
 Հայաստանի վիճակի մասին, որպէս զի գաղթա-  
 կանութեան պատճառն ակներեւ լինի:

#### Բ.

1453 թուին մայիսի 29ին մի սարսափելի  
 եւ չարագուշակ լուր դղողեց համայն Եւրոպան:  
 Սուլթան Մէհմէտ առել էր Բիւզանդեան  
 կայսրութեան մայրաքաղաք՝ հռչակաւոր Կ. Պո-  
 լիսը: Արեւելեան անբարոյականացած, կնատ եւ  
 քծնող կայսրութիւնը զառամելով, վատնելով  
 իր ոյժը շուայլութեան, զեղիսութեան եւ անա-  
 ռակ կեանքի մէջ, չկարողացաւ դիմադրել  
 Օսմանեան ցեղի վայրագ բայց թարմ ոյժին. նա  
 ընկաւ, տապալուեց եւ նրա աւերակների վրայ  
 մահմետական աշխարհն իր յաղթանակի դրօշը  
 կանգնեցրեց: Այդ օրից Փոքր Ասիան եւ Հայաս-  
 տանը, որ միշտ իր աշխարհագրական դիրքի  
 պատճառով զանազան ազգերի պատերազմի եւ  
 արշաւանքի թատերաբեմն է հանդիսացել, այլ

եւս մի բողոք հանգստութիւն չգտաւ: Դեռ նոր  
 էր առել Սուլթան Մէհմէտ Կ.Պոլիսը՝ եւ  
 ահա Հայաստանի սահմաններում գլուխ բար-  
 ձրացրին երկու հզոր Ամիրաներ: Առաջինը կոչ-  
 ւում էր Ջհանշահ, որ տիրապետել էր ամբողջ  
 Պարսկահայքին — Ատրպատական աշխարհին եւ  
 Կորձէքին, Սիւնեաց, Արցախի, Արարատի եւ  
 Վասպուրականի երկրներին, եւ իր համար  
 մայրաքաղաք էր շինել Թավրէզ քաղաքը. իսկ իր  
 որդի Հասան-Ալուն փոխանորդ էր կարգել Նախ-  
 իջեւան քաղաքում: Հետզհետէ ընդարձակելով  
 իր իշխանութիւնը, Ջհանշահ արշաւեց եւ Պարս-  
 կաստան կամ Իրադ-Աճեմը, առաւ Շիրազ,  
 Քիրման եւ վերջապէս Սպահան մայրաքաղաքը,  
 անցաւ Խորասան, գրաւեց մինչեւ անգամ Սա-  
 մարգանդ, նուաճեց այնտեղի թաթարներին  
 կամ Թուրքմէներին եւ իրեն Պարսկաստանի  
 թագաւոր հռչակելով, գարձաւ իր մայրաքա-  
 ղաքը Թավրէզ: Երկրորդ ամիրան էր Ջհան-  
 գիր սուլթան, որ տիրում էր Միջագետի եւ  
 Փոքր Ասիայի վրայ եւ նստում էր Գիւարբէքի  
 քաղաքում: Այսպիսով ամբողջ Հայաստանը  
 գտնւում էր այդ երկու ամիրաների կամ Օս-  
 մանցիների եւ Պարսից բռնակալութեան ներքոյ.  
 եւ որովհետեւ այդ երկու պետութիւններն ան-  
 դադար միմեանց հետ կռւում էին եւ փոփո-  
 խակի յաղթող կամ յաղթեալ հանդիսանում,  
 ուստի եւ թշուառ Հայաստանը մերթ ընկնում  
 էր Օսմանցիների, մերթ Պարսից ձեռքն եւ շա-  
 բունակ հեծում ու տառապում էր, երկու կը-



րակի մէջ մնալով: Զահան Շահի մահից յետոյ, որ եղաւ 1465 թուին, նրա որդի՝ Հայոց մարզպան Հասան Ալու եւ Զհանգիր ամիրայի որդի՝ Ուզուն Հասանի մէջ պատերազմ ծագեց. եւ այս վերջինը յաղթելով առաւ թափօրէզ եւ տիրեց բոլոր Ատրպատականի, ինչպէս եւ Պարսկաստանի վրայ: Այնուհետեւ Պարսից եւ Օսմանցոց մէջ շարունակ կռիւ էր լինում, փոփոխակի յաջողութեամբ. եւ Ատրպատականն ու Հայաստանը զանազան անձանց եւ իշխանների իշխանութեան ներքոյ է ընկնում, մինչեւ որ, վերջապէս, 1491 թուին, Արգարիլ քաղաքի Շէյխ՝ Հայտարի որդի Խամայիլը զօրանալով, թագաւորեց Պարսից վրայ, գրաւեց թափօրէզ եւ Ատրպատականն ու Արարատեան աշխարհը, եւ 1500 թուին իր աթոռը հաստատելով Ասպահան քաղաքում, կոչուեց Շահ Խամայիլ Սէֆէվի, եւ այսպէս Սէֆէվի հարստութեան հաստատողն եղաւ: Այն օրից սկսուեց Ղզլբաշների տիրապետութիւնը:

Շահ Խամայէլի դէմ պատերազմ հրատարակեց Օսմանեան մեծ սուլթան Սէլիմն 1513 թուին. եւ յաղթելով նրան՝ յետ առաւ թափօրէզ քաղաքն եւ այդտեղի բոլոր արուեստագէտներին, մեծ մասամբ Հայերից, 3000 հայ ընտանիք, բօւնցրեց Կ.Պոլիս: Այդ թուականից սկսած մինչեւ 1586 թիւը թշուառ Հայաստանն եւ երկիցս թշուառ հայ ազգը մի օր, մի ժամ, մի րոպէ հանգստութիւն չունեցաւ Պարսից եւ Օսմանցոց սրերի եւ կոտորածի երեսից:

Սուլթան Սէլիմ տիրեց Հայաստանի մեծ մասի վրայ, սկսած Թափրէզ քաղաքից մինչև Աարին, բայց Շահ Իսմայէլի որդի Շահ Թահմազը 1550 թուին յետ առաւ, գրաւեց Վան քաղաքը, ասպատակեց Արարատեան աշխարհը, հասաւ մինչև Բարձր Հայք, աւերեց Երզրումի երկիրը մինչև Երզնկայ, եւ շատ Հայեր ի գերութիւն վարեց: Բոլոր Հայաստանը հեծում էր այդ բռնակալի տիրապետութեան ներքոյ: Նրա մահից յետոյ Օսմանցւոց սուլթան Մուրատը մեծ զօրքով խաղաց դարձեալ Հայաստան, յետ կորզեց բոլոր երկիրները, ինչպէս եւ Երեւան, Նախիջևեան, Թափրէզ, եւ այդ վերջին տեղերից 60 հազար Հայ եւ Պարսիկ գերի վարեց Յունաստանի կողմերը: Աւելի սարսափելի եւ աղէտալի եղաւ 1579ի պատերազմը, երբ Օսման Փաշա զօրապետն ասպատակեց Աղուանից երկիրը՝ Շիրուան, առաւ Շամախի, Գանձակ, Պարտաւ, Չարաբերդ, Խաչէն, Աարանդա, Գիղակ գաւառները եւ բազմաթիւ Հայերին սրով խողխողեց: Պարսից Շահը՝ Խուդաբէնդ չդիմանալով՝ փախաւ Խորասան եւ երբ Թագաւորեց 1586 թուին նրա որդի Աբասը, կամ Շահաբբաս Առաջինը, աճապարեց Օսմանցւոց Սուլթան Մուրատի հետ հաշտութիւն անել, պատանդ տալով: Այդպիսով երկու տէրութիւնների մէջ խաղաղութիւն հաստատուեց, գոնէ առ ժամանակ, եւ այդ հաշտութեան զօրութեամբ, բոլոր գրաւուած երկիրները մնացին Օսմանցւոց ձեռքում, այնպէս որ Հայաստան

Համարեա ամբողջապէս ընկաւ Օսմանցւոց տիրապետութեան ներքոյ:

Այդ անդադար ասպատակութիւնները, պատերազմները սարսափելի կերպով աւերեցին երկիրը, եւ թափած արեան հեղեղներն ապականեցին նրան: Աղուանից, Արցախի, Փայտակարանի եւ Ատրպատականի գաւառներում մահ տարածամ ընկաւ 1579 թուին, որին յաջորդեց մի սարսափելի սով: Այդ աղէտների երեսից բնակիչների մեծ մասը կոտորուեց: Ահա ինչ է գրում ականատես Յովհան Ծարեցի կոչուած Վարդապետը:

«Այ պատժապարտիս, զի մահուամբ եւ սրով եւ սովու կոտորեալ մարդկան, մարմինք նոցա անյագ գազանաց կերակուր եղեն. եւ շունք վայրենացեալք արտաբոյ շինի կենդանի մարդիկ եւս որսային, եւ գայլք ի ճանապարհի եւ ի շինամիջի, ի տունս մտեալ զմարդիկ ի ննջելն արտաքս քարշէին եւ ուտէին. եւ ի սովորիլ նոցա ի նոյն ի մեջ խաշանցն մտեալ, զխաշնարածսն ուտէին, իսկ զխաշանցն ինչ ոչ մեղանշէին: Իսկ զթիւ մահուամբ եւ սովու եւ սրով մեռելոցն եւ գերելոց բնաւ ոչ կամիմ ընդ թիւ բերել եւ ընդ գրով արկանել, բայց թէ զիմ զքարտէզս եւ զմելան առաջի ձեր արկից բստ դպրացն Գաւթի, որ առ Երուսաղէմաւ:»

Սովն այնքան սաստկացաւ որ մարդիկ՝ ծածուկ սպանում էին երեսխաններին եւ նոցա միսը խաշելով լափում էին:

Մի ուրիշ ականատես պատմագիր — Թադէոս վարդապետ Սերաստացին հետեւեալ կերպով է նկարագրում Ղզլբաշների գործած աւերումները:

“Ի լրանալ հազարամեան թուականիս մերոյ շարժեցաւ ի վերայ աշխարհիս Հայոց ազգ Ղզլբաշից, մանրել եւ մաշել զմնացորդս Արամեանց: Աղէտք գործոց վնասու սոցա առաւել են քան զլանկթամուրայն, զորս կարծեմ թէ չիք տեսեալ ուրուք ի հողածնացս: Շրջին հանապազ զամն ողջոյն յաւեր քաղաքաց եւ ի կողպուտրնչից եւ անուամբ հարկաց ի յետին տնանկութիւն ամին զազգ մեր: Զթագաւոր իւրեանց, զոր Շահն կոչեն, առաւել քան զաստուած պաշտեն. այլ սա մեզ Փարաւոն եղեւ, եւ առաւել քան զՍենեքերիմ եւ զՆարուգողոնոսոր, ոչ գիւղ եթող՝ եւ ոչ քաղաք, զոր ոչ աղարտեաց. էր՝ զի հրով տոչորէր, եւ էր՝ զի քանդեալ ի հիմն հասուցանէր զշինուածս ամրոցաց եւ աւանից, եւս առաւել զեկեղեցիս եւ զվանորայս, սպան եւ զբազումս յերիցանց եւ ի կրօնաւորաց:”

Ահա այդ Կրութեան մէջ էր Հայաստանը եւ Պարսկաստանի քաղաքական վիճակն այդպէս էր դասաւորուած, երբ թագաւորեց Շահարբաս Մեծը: Այդ ժամանակ զեռ բուն Պարսկաստանում Հայ չկար: Հայերի մեծ մասը ամենահին ժամանակներից բնակոււմ էր Արրպատականի աշխարհում, որի մայրաքաղաքի՝ Թավրիզի մէջ 7000 տուն Հայ կար: Հայերը այդ քաղաքում 12 անուանի եկեղեցիներ ունէին. եւ այսօրուայ հռչակաւոր Հազրաթ Սհարի մղկիթն ուրիշ բան չէ, եթէ ոչ Հայոց Ս. Յովհաննէս մայր եկեղեցին, որի սիւները դեռ կանգուն են, ինչպէս եւ սեղանը եւ աւազանը, որ Պարսիկները ծածկել են: Եկեղեցիների մի քանիսի տեղերը դեռ յայտնի են, օրինակ

Ս. Աստուածածնի մատուռը, որ այժմ քաղաքից դուրս մի այգու մէջ է. Ս. Խաչի եկեղեցին, որի տեղը այսօր Աթ-Մէյգանի է կոչուում, այսինքն ձիերի վաճառանոց: Թավրիզից յետոյ ամբողջ Ատրպատական գաւառը լին էր Հայերով, հայ եկեղեցիներով, վանքերով. անուանի էին Սալմաստ, Մարաղա, Խոյ, Արդաբիլ, Որմի, Գուխարզան քաղաքները եւայլն: Սալմաստի եպիսկոպոսութիւնը կաթուղիկոսութեան հաւասար դիրք ունէր:

Արարատեան աշխարհում, ի բաց առեալ Նախիջեւանը, Շամախին եւ Երեւանը, անուանի էր Զուղայ աւանը կամ գիւղաքաղաքը, կամ ըստ օտար պատմագրների՝ Զուլֆայ, Զուհանթ, Երասխ գետի հիւսիսակողմում, Գողթան գաւառում: Զուղայի ծագումը շատ հին է. Մովսէս Խորենացի (Գիրք Ա.) իր պատմութեան մէջ յիշում է թէ Տիգրան Երուանդեան Հայոց թագաւորը 565 տարի Քրիստոսից առաջ, նա՛ որ յաղթեց Աժդահակին եւ ժամանակակից էր Վիրոսին, գերի անելով Աժդահակի տիկնոջ Անուշին, կանանց, պատանիներին եւ 10.000 հոգի, բերաւ բնակեցրեց Գողթան գաւառում եղած դաստակերտների եւ աւանների մէջ, որոց թւում յիշում է եւ Զուղայ — «աւան առ եզերք գետոյն Երասխայ:» (Խորեն. պատմ. Հայոց. վեներտ. 1827, էջ 123:)

Երկար ժամանակ Զուղայի մասին պատմութեան մէջ ո՛չ մի ձայն չէ լսում թէ նա որ եւ է դեր խաղացած լինի: Երեւի մինչեւ ժե

եւ ժԶ. դարը նա մնացել է իբրեւ մի հասարակ  
 գիւղաքաղաք, բայց այդ ժամանակից յետոյ  
 սկսուած է հռչակուել իբրեւ վաճառականական  
 անուանի քաղաք եւ նրա բնակիչներն իբրեւ  
 հարուստ եւ ժիր վաճառականներ «խօջա» մակ-  
 անունով: Տեսնենք ինչ տեսարան էր ներ-  
 կայացնում նա: Զուղան զետեղուած էր, ինչպէս  
 եւ այսօր կարելի է տեսնել աւերակներից, մի  
 խոր ձորակի մէջ, կարմիր ժայռերի մի սարի  
 զառիվայրի վրայ. նրա աջ կողմով, ամբողջ  
 երկարութեամբը հոսում է Երասխ գետը. սարի  
 ժայռերը, որոնցով նա շրջապատուած է հա-  
 մարեա երեք կողմից՝ քաղաքի երկու ծայրե-  
 րումն եւս այնքան մօտեցած են Երասխին, որ  
 կազմում են նեղ անցք եւ այդ անցքերի տեղը  
 շինուած են մուտքերը, որոնք նոյն իսկ բնու-  
 թիւնից դժուարանցանելի եւ ամուր լինելով՝  
 պահպանուում էին բերդերով եւ դարպասներով:  
 Կլխաւոր մուտքը լինում էր արեւելեան դար-  
 պասով, երբ փոքր ինչ անցնում էին Երասխը  
 կամրջով, առաջ այն հռչակաւոր հոյակապ  
 պատմական կամրջով, որի մասին փոքր ինչ  
 յետոյ կը խօսենք, իսկ յետոյ, այն է ժԵ. եւ ժԶ.  
 դարերում, շարժական կամրջով: Այդ շար-  
 ժական կամուրջն հետեւեալ կերպով էր շի-  
 նուած: Երասխի երկու ափերում կանգնած էին  
 երկու մեծ շինութիւններ, որոնք քարվանսա-  
 րայներ էին վաճառականների համար: Պարս-  
 կաստանից, Հնդկաստանից եկող կարաւաններն  
 դալիս կանգ էին առնում գետի միւս ափում,

քարվանսարայում, որի մէջ կային շատ օթեւաններ եւ շտեմարաններ. ամբողջ գետի վրայով, այն է գետի լայնութեամբ, երկու քարվանսարայների մէջտեղ ձգուած էր մի երկաթէ հաստ շղթայ, որի միջոցով բանում էր նաւակը, ինչպէս գործադրուում է եւ այժմ: Երկու հաստ սիւներից, որ շինուած էին քարվանսարայների առաջ, կապուած էր այդ շղթան, որ ամէն երեկոյ կողպուում էր բանալիով եւ բանալին յանձնուում քաղաքապետին. այս ղգուշութիւնը նրա համար էր, որ ոչ ոք, կամ անծանօթ մարդ չկարողանայ յանկարծ կամ գիշերով մտնել քաղաքը: Այդ կերպով եկաւորներն եւ ապրանքը տեղափոխուում էին Զուղայի քարվանսարայը, որտեղից ուղարկուում էին Վրաստան, Եւրոպա, Ռուսաստան եւայլն: Քարվանսարայների եւ սիւների աւերակներն դեռ կանգուն են այսօր: Այդպէս ամէն կողմից լաւ պատսպարուած էր Զուղան. գլխաւոր դարպասի բերդի գլխին միշտ հսկում էր մի պահապան, իմաց էր տալիս՝ եթէ որ եւ է վտանգ էր սպառնում քաղաքին. իւրաքանչիւր նոր եկող պէտք է պահապանին յայտնէր իր անունն եւ միայն քաղաքապետի թոյլտուութեամբ կարող էր մտնել:

Ահա մի կողմից Երասխ գետով, միւս կողմից ժայռերով եւ սարերով շրջապատուած մի այսպիսի փոքր զառիվայրի վրայ պարփակուած էր Զուղան. այդ տեղն այնքան փոքր եւ նեղ է, որ շատ դժուար է հաւատալ թէ այդտեղ 8000 տուն կար, ինչպէս գրուում է.

տներն այնքան փոքր են, որ աւելի թռչունի բունների են նմանում, քան մարդկանց բնակարանի: Տները երկյարկանի, շատ պարզ եւ կոպիտ ճարտարագետութեամբ շինուած են ոչ միայն տափարակի վրայ, այլ նաեւ ժայռերի, սարի լանջերի վրայ. եկեղեցիները նոյնպէս շատ փոքր են, դռները այնքան փոքր, որ մտնելու համար պէտք է սողալ: Մի քանի տներ շինուած են այնպիսի ժայռերի վրայ, որտեղ այժեամբները միայն կարող են ման գալ:

Շարդէն ասպետը, որ այցելեց Ջուղան 1673 թ. Ապրիլի 13ին, ուրեմն Ջուղայի աւերուելուց 68 տարի յետոյ՝ իր պատմութեան Բ. Հատորին մէջ (էջ 303, 1811) այսպէս է խօսում:

«Երասխի եղբում գտնուում է Հին - Ջուղան (որին աշխարհագիր Հաճի Խալֆան, կոչուած եւս Քնաթիւր Չէլէբի՝ իր «Ջհան-նրմայ» գրքին մէջ՝ Ջուլհաթ անունն է տալիս,) աւերեալ քաղաք, որ մի քանի հեղինակներ կարծում են լինել այն, որ հներն կոչում էին Արրիամէն: Իրաւունք ունին Հին կոչելու, որովհետեւ բոլորովին աւերեալ եւ կործանեալ է: Այդտեղ այլեւս ոչինչ ճանաչել չէ կարելի, բաց ի իր ունեցած մեծութիւնը. նա շինուած էր մի լերան զառիվայրի վրայ, դետի երկարութեամբ եւ նրա եզրին: Մուտքերը, որոնք բնականաբար դժուարանցանելի եւ ամուր են, պահպանուած էին շատ բերդերով: Քաղաքն ունէր 4000 տուն, ինչպէս ասում են Հայերը, սակայն աւերակներին նայելով կէսից աւելի չպէտք է ունենար. աների մեծ մասն ծակեր եւ զետնափորներ են, սարերի մէջ այրեր, աւելի յարմար հօտերի քան թէ մարդկանց բնակարան լինելու: Խո չեմ



կարծում որ աշխարհի մեջ շին-Ջուղայից աւելի անպտուղ եւ զգուելի տեղ լինի. այնտեղ չկայ ոչ խոտ, ոչ ծառ: Ճշմարիտ է, շրջականերում աւելի բարեբեր եւ արգասաւոր վայրեր կան, բայց դարձեալ ճշմարիտ է, որ նրանից աւելի շոր եւ քարոտ քաղաքի տեղ չէ կարող լինել: Գրա փոխարէն տեւքը գեղեցիկ է, նմանելով երկար ամիրթէատրոնի: Այժմ միայն 30 ընտանիք կայ, բոլորն էլ հայ: Շահաբբաս Մեծն աւերեց Ջուղան եւ ամէն ինչ որ արուեստն նպաստել էր նրան ամրացնելու:»

Ջուղան կառավարւում էր անային կամ նահապետական կառավարութեամբ, այն է նահապետների կամ իշխանների ժողովով, որին նախագահում էր քաղաքագլուխը: Շահաբբասի աւերման ժամանակ Ջուղայի քաղաքագլուխն էր անուանի Խօջա Խաչիկը, որի գերեզմանը գտնւում է Ջուղայի գերեզմանատան մեջ, այսպիսի տապանաքարով. «սուրբ խաչս բարեխօս է առ Քրիստոս մեծ եւ անուանի քաղաքապետ խաւջայ Խաչիկին որ ի Ռ. եւ Ծ. Գ. թրկնիս հանգեաւ ի Քրիստոս խաւջայ Խաչիկին եւ կողակցին Մարիամի:» Սրանից երեւում է, որ Խօջա Խաչիկն վախճանուել է հայկական 1053 թ. կամ փրկչական 1604 թ. ուրեմն Ջուղայի գաղթականութիւնից մի քիչ առաջ:

Ջուղայի արեւմտեան ծայրում ընկած է նրա հոչակաւոր գերեզմանատունը, որի կանգուն խաչքարերը այնպէս ուղիղ գծի վրայ դասաւորուած են, որ հեռուից զօրքի գունդ ես կարծում: Իւրաքանչիւր խաչքարի մեծ մասը գեռ անմաշ մնում է, ահա ինչ է գրում Քաջ-

բերունին. « տապանաքարերի նկարները գեղեցկաքանդակ խաչեր են, իսկ երկրորդականը պատկերներ... արձանագրութիւնները վերաբերում են 1031, 1042 եւ այլ հայկական թուականներին: Բայց կան, ասում են 7—8 երորդ դարու տապանաքարեր: Առաջին թուանշանները, ուրեմն արձանագրուած են նախ քան Շահաբասի գալուստը, որ արշաւեց Արարատեան դաշտի վրայ 1604 փրկչական թուականին...:» (Փորձ, 1877, Nr. I.)

Սակայն մենք, որ այցելեցինք Ջուղան 1884 թուին՝ գտանք արձանագրութիւններ եւ ԶՂԹ, ԶՀԷ, ԶՀԲ (999, 977, 972) կամ 1550, 1528, 1523 թուականների:

Ջուղայի բնակիչներն բոլորն էլ Հայ-Ղուսաւորչական էին, բայց կային եւ կաթուղիկեայ Հայեր. դեռ այսօր կանգուն է մի փոքր կաթուղիկեայ եկեղեցի եւ այժմեան Ջուղայի բնակիչներն աւանդաբար ասում են, որ օտար կրօնաւորներ եւս բնակուում են եղել Ջուղայում եւ եղել են նոյնպէս օտարազգիներ, որովհետեւ գերեզմանատան մէջ մեզ պատահեց կարդալ եւ մի անգղիացի Լորդի տապանագիրը:

Հոչակաւոր Ամենափրկիչ եկեղեցին քաղաքից բաւականին հեռու է, մի ժայռի զլխին շինած:

Ջուղայից ոչ հեռի Երասխի վրայ երեւում են դեռ այն հոյակապ կամրջի մնացորդ աւերակները, որ հնումն հոչակաւոր էր եւ կապում էր Արեւելքն Արեւմուտքի հետ: Այդ կամրջի

վրայով կատարուում էր աշխարհի ահագին վա-  
ճառականութիւնը: Նրա սկիզբն եւ հիմնարկու-  
թիւնը շատ հին է. օրինակ Իսիդոր Սերվիլիոսը՝  
Աղեքսանդր Մակեդոնացուն է հիմնարկու հա-  
մարում, ասելով որ Օգոստոս կայսեր ժամանակ  
վերանորոգուեց այդ կամուրջը: Նա այնքան  
հռչակաւոր էր Հռովմայեցւոց մօտ, որ Օգոստոսի  
ժամանակակից Վիրգիլիոս բանաստեղծն իւր  
Էնէականի մէջ յիշում է ասելով. indomitique  
Dahae.

Et pontem indignatus Araxes, որպիսի լա-  
տինական պարբերութիւնը՝ Գեր. Եղուարդ Հիւր-  
միւզեան այսպէս է թարգմանել:

“Մեղմիկ ալիքն անդ Եփրատայ հոսէին,  
Անդ հեռագոյնն ազգ ի բնակիչն Մորին,  
Եւ երկեղջիւրն Հռենոս եւ Տայք աննրկունք.  
Եւ Երասխայն ի կամրջաց բմբոստ հունք:  
(Վիրգիլ. Էնէական, եր. 401—402):”

Նշնպէս Ստացիուսը յիշում է այս կամրջի  
մասին այսպէս՝ “et patiens lati jam pontes  
Araxes” “եւ լայնարձակ կամրջից չարչարուող  
Երասխը”:

Այս կամրջի մասին յիշում է եւ Ղազար  
Փարպեցին, ասելով.

“Զարմիհը Հաղարաւուխտ՝ սաստիկ եւ բազում  
այրբնաիր զորօք դիմեալ անցանէր ստիպով ընդ  
կամուրջ գետոյն Երասխայ, եւ ի գիւղաքաղաքին  
որ կոչի Արտաշատ բանակէր այն օր.” (Ղազ.  
Փարպ. Վենետիկ 1793, էջ 250):

Ինչպէս երեւում է այդ հռչակաւոր կա-  
մուրջը գոյութիւն է ունեցել մինչեւ ժ.Գ. դարը,

վասն զի Լէնկթիմուրի արշաւանքի ժամանակ նա դեռ կանգուն էր, եւ նա անցաւ իր զօրքով նրա վրայով 1396 թուին, ու պաշարելով Երնջակ բերդն, անցաւ Արաստան: Շէրէֆ-Էդդինը, Լէնկթիմուրի արշաւանքի պատմիչը, աւանդել է մեզ այդ կամրջի նկարագրութիւնը:

“Կամուրջը հիմնած է տաշած ժայռի վրայ անխախտ ամրութեամբ, վերելք զարմանալի հարթ եւ քարերը միացած են այնպէս կանոնաւոր եւ ամուր կերպով, որ ամենահնարագէտ ճարտարապետը պէտք է զարմանայ: Կամարներն այնքան բարձր եւ երկայն են, որ մինի հիմքերի սրունքը 60, միւսինը 50 պարսկական բաղուկ է: Կամարի ստորին մասումը շինուած է քարվանսարայ, իսկ երկու ծայրումը դռներ՝ զարմանալի զեղեցկութեամբ”:

Այս պատմիչը կամրջին տալիս է “Եօլգայի կամուրջ” անունը: Ինչպէս երեւում է այդ խօսքերից, կամուրջն ունեցել է երկու աչք կամ կամար. այս ապացուցանւում է նոյնպէս եւ նոր պատմագիր՝ արքայազն Բէհմէն-Միրզայի հետեւեալ վկայութեամբ:

“Իմիր Թէյմուր Կարգանը (Լէնկթիմուր) 789 թուին հիջրէի (1387/8 փրկշ.) զօրքը քշելով եկաւ Արապատական եւ դիմեց դէպի Նախիջևեանի կողմն եւ անցնելով Մարանդից եւ Գարա-Գիղ ձորից, հասաւ Արագ գետին եւ նրա վրայի “Չըյա-ու-Մուլք” կոչուած կամրջից իջաւ. եւ այդ կամուրջ է, որ տաշած քարից է շինած, եւ երկու մեծ ու լայն թաղ (կամար) ունի, որ նրա լայնութիւնը 60 գետաղ է. եւ որովհետեւ նա մտրումն դրել էր առնել Ալինջաղի (Երնջակ) բերդն<sup>1</sup>, որի մէջ ամրա-

<sup>1</sup> Երնջակի ամրոցն կամ Երնջակարերդը հռչակաւոր է մեր պատմութեան մէջ Մմբաս խոստովանող արքայի

ցած էր Առլթան Ահմատի զօրքը, ուստի հրամայեց իր զօրքին պաշարել այդ բերդը, եւ զօրքը թէեւ գրտի բերդին տիրացաւ ու աւերեց, բայց միջնաբերդը առնել չկարողացաւ. եւ սրով հետեւ շատ անառիկ բերդ էր, ուստի անհնար եղաւ գրաւելն եւ Ամիր Թէյմուրն հրամայեց, որ սարգաւորներն հերթով պաշարեն բերդն մինչեւ առնուի. մինչեւ տասն տարի ամբողջ Անճաղի բերդն պաշարուեց եւ միայն 10 տարուց յետոյ, այն է 799 թ. հիջրէի, սովն ստիպեց բնակիչներին անձնատուր լինել: (Չեռագիր պատմութիւն պարսկերէն:)

Այս բոլորից ակնյայտնի է, որ գէթ մինչեւ 1400 թ. կամ մինչեւ ԺԵ. դար՝ կամուրջը ողջ է եղել եւ դրանից յետոյ կործանուել է: Գաղթականութեան ժամանակ կամուրջն արդէն գոյութիւն չունէր եւ անցնում էին նաւակներով ու լաստերով, ինչպէս վերելում բացայայտեցինք: Առաքել Աարդապետ, որ ժամանակակից էր Շահարբաս Ա.ոյն, իր պատմութեան մէջ ո՛չ միայն չէ յիշում կամրջի քանդելն այդ թագաւորի ձեռքով. (ըստ ժողովրդական աւանդութեան՝ կամուրջն շինել է խօջա խաչիկն, իսկ կործանել է՝ Շահարբասը,) այլ մինչեւ անգամ կամրջի մասին ո՛չ մի խօսք չէ ասում, այլ ընդ հակառակն շատ բացայայտ կերպով յայտնում է, որ այդ միջոցին Երասխի վրայ ո՛չ մի կամուրջ չկար, քանի որ նկարագրում է Հայերի քաջած անօրինակ տառապանքը գետն անցնելիս

կտտամահ տանջանքներովն 914 թ.: Հայաստանի ամենանառիկ ամրոցներից մին էր եւ ԺԲ. դարում Ուսպելեան ազգի ժառանգական կալուածն: Այդտեղ յիշուած գրտի բերդն Երնջակ քաղաքն է, որ այժմ աւերակ է:

եւ շատերի հեղձամահ լինելը: Նոյնպէս Եւրոպացի մի քանի ճանապարհորդներ, ինչպէս Տավերնիէ 1655ին, Շարդէն 1673ին եւ Տուրնըֆոր 1700ին, նաւակներով անցան Երասխն եւ ոչ մի կամուրջ չտեսան:

Ահա ինչ է ասում Շարդէն:

“Երասխայն հռչակուոր գետն է, որ բաժանում է Հայաստանը Մեդիայից (Ատրպատականից): Այդ գետը մեծ է եւ շատ արագ: Նա ուռչում է իր հոսանքի ընթացքում շատ փոքր վտակներով եւ հեղեղներով: Զանազան ժամանակ նրա վրայ կամուրջներ են շինել Զուղայից վերեւ ու ուրիշ տեղեր, բայց որքան ամուր եւ հաստ են եղել, ինչպէս երեւում է դեռ մնացած կամարներից, չեն կարողացել դիմադրել գետի հոսանքին: Այնքան կատաղի էր, երբ մօտակայ սարերի ձիւնի հալուելով մեծանում էր, որ ոչ մի թումբ, ոչ մի շինութիւն չէր մնում: Մենք անցանք Երասխը մի մեծ նաւակով, որ 20 ձիի եւ 30 մարդի անցնելու համար էր շինուած: Չմեռը, երբ ջուրը քիչ է, ուղտերով են անցնում. ծանծաղուան Զուլֆից կէս մղոն է, մի տեղ, որ շատ լայն է, ուստի եւ հանգարտ է հասում”:

Այսպէս ուրեմն շին-ջուղան՝ թէեւ շինուած անապատ տեղում, զուրկ բուսականութիւնից եւ աւազուտ՝ մի գեղեցիկ տեղ չէր կարող լինել, բայց ԺԶ. եւ ԺԷ. դարում նա մի հռչակեալ եւ ծաղկեալ վաճառականական քաղաք էր, ինչպէս վկայում են եւ եւրոպացի շատ ճանապարհորդներ — Տավերնիէ<sup>1</sup>, Շարդէն<sup>2</sup>,

<sup>1</sup> Tavernier, Six voyages, 1. e. I. ed. 1718.

<sup>2</sup> Chardin, Voy. en Perse, Amsterdam 1735.

Տուրնըֆոր<sup>1</sup>, Ուղըլէյ<sup>2</sup>. Հանվայ<sup>3</sup> եւ այլք, թէեւ այսօր աղքատութեան եւ աւերման մի տիրալի պատկեր է ներկայացնում: Զուղան մի յարմար վաճառականական եւ փոխադրական կենդրոն էր Հնդկաստանի, Միջին Ասիայի եւ Պարսկաստանի հետ մի կողմից, իսկ միւս կողմից Ռուսաստանի, Եւրոպայի հետ: Այդ է պատճառն, որ Զուղայի Հայերն միջնորդ էին Արեւելքի եւ Արեւմուտքի մէջ, ուստի եւ մեծ հարստութիւններ էին դիզում: Նոցա փարթամութեան եւ ճոխութեան ապացոյց կարող է լինել մասամբ եւ այն հանգամանքը, որ գաղթելով Պարսկաստան եւ հաստատուելով Նոր-Զուղայում՝ դարձեալ նոյն փարթամութեան եւ շքեղութեան մէջ լող էին տալիս նրանք: Երեւում է, որ արուեստներն եւս բաւական ծաղկած էին Զուղայում. այստնի է, որ երբ Շահաբբաս այցելեց Զուղայ, Հայերը զարմանալի շքեղութեամբ ընդունեցին նրան եւ Զուղայ մտնելուց՝ աղ ու հացի հետ միասին մի ոսկիէ սկուտեղի մէջ՝ մի ողկոյզ խաղող ներկայացրին: Շահաբբաս կարծելով որ բնական խաղող է, ձեռքը մեկնեց, որ վեր առնի եւ ուտի, բայց զարմանքով տեսաւ, որ ոսկուց շինուած էր արուեստական կերպով, բայց այնքան գեղեցիկ, որ բնականից անկարելի էր զա-

<sup>1</sup> Tournefort, Relation d'un voyage du Levant Amsterdam, 1718.

<sup>2</sup> W. Ouseley, Travaux, London 1823, 4 vol. III. p. 429—432.

<sup>3</sup> S. Hanway, Reisen in Persien, Hambourg 1754. Th. II.

նազանել: Ահագին խաչքարներ գերեզմանների վրայ, Ամենափրկիչ եկեղեցին հիանալի քանդակագործուած՝ նոյնպէս ապացոյց են արուեստների բարգաւաճման: Իսկ Ջուղայեցւոց փարթամութեան իբրեւ ապացոյց, յիշենք այստեղ Առաքել Աւարդապետի խօսքերը Շահաբբասի Ջուղայ գալու մասին:

«Եւ ի գալն յորժամ հասին ի գիւղաքաղաքն Ջուղայ, ամենայն բնակիչքն Ջուղայու բաղուժ, եւ զանազան եւ պէսպէս յօրինուածովք պատրաստութիւնս հոգացեալ՝ ելին ընդ առաջ Շահին որպէս վայելէ թագաւորի: Իշխանք եւ ծերք եւ երիտասարդք, ի զարդ եւ ի զէնս ոսկեհունն սիրատեսիլ հանդերձից պճնազարդեալք ընդ առաջ ընթանային: Եւ նորարողքս զեռահաս մանկունք ոսկի բաժակաւ զանուշահամ եւ զազնիւ գինի մատուցանէին...: Եւ զճանապարհս անցից արքայի զարդարեցին եւ յեղերէ գետոյն մինչեւ ցապարանս խօջայ Խաչիկին արկին փայանդազ առաթուր թագաւորին, պատուական եւ վայելուչ կումաշս (կերպաս), որոց վերայ էանց թագաւորն եւ զնաց ի տուն խօջայ Խաչիկին: Եւ ի տան անդր. խօջայ Խաչիկն զոսկի սկուտեղ լցեալ ոսկեով եղեալ ի ձեռն որդւոյ իւրոյ մատոյց առաջի թագաւորին, նոյնպէս եւ ամենայն մեծամեծքն Ջուղայու մատուցին զընծայս, որպէս վայելէ թագաւորի, եւ զաւուրս երեք եկաց անդ շահն, եւ Ջուղայեցիք պատուեցին զնա համադամ կերակրօք եւ ծաղկեհամ գինեաւ:»<sup>1</sup>

Գլետք է յիշենք այստեղ, որ Երասխ գետից մինչեւ Ջուղայ՝ առ նուազն մի վերստ հեռաւորութիւն կը լինի: Ջուղայեցիք անուանի էին բո-

<sup>1</sup> Առաք. Աւարդ. էջ 24:



լոր Հայերի մէջ. ազգային գործերի վրայ նրանց իշխանները մեծ ազդեցութիւն ունէին. կաթողիկոսներից բռնած մինչեւ հասարակ Հայերը նեղութեան ժամանակ Զուղայեցիներին էին ապաւինում: Իշխանների մէջ ալ անուանի էին խօջա Սաֆար, խօջա Խաչիկ, խօջա Նազար եւ այլք. «խօջա» բառն արեւելքում մինչեւ այժմ եւս արւում է հարուստ եւ պատուաւոր ու հռչակ ունեցող վաճառականներին:

Տեսնենք այժմ ինչ դրութեան մէջ էր հայրապետական դահն այդ միջոցին: Ամբողջ հայ ազգի պատմական կեանքի մէջ չկայ այնքան վշտերի, տառապանքների եւ շարչարանքի մի տեսարան, որպիսին ցոյց է տալիս մեզ Իջմիածնի կաթողիկոսական աթոռը: Ս. Գրիգորի յաջորդներից շատերն իրենց վարուց եւ առաքինութեան հետ կցել են համարեա միշտ եւ կենդանի նահատակների անունը:

Մեր պատմութեան ժամանակ Իջմիածինը բոլորովին անշքացած եւ թափուր դրութեան մէջ էր: Օսմանցւոց բռնչիւնների եւ հարկապահանջների լուծն այնքան անագորոյն եւ անտանելի էր դարձել, որ Գաւիթ Ե. կաթողիկոսը շարաշար նեղուելով բռնչիւնների հարկապահանջութիւնից, որոնք պահանջում էին նրանից, իբրեւ ազգի գլխից, շատ գանձ, այլ եւս ճար չգտնելով, իրեն կաթողիկոսակից ընտրեց 1593 թուին Մեւքիսէթ Եպիսկոպոսին, որպէս զի երկուսը միասին ժողովարարութիւն անեն եւ աթոռի պարտքերը վճարեն: Հետզհետէ պարտքը դիզ-

ւում էր տոկոսների ծանրութիւնից, այնպէս որ  
 հասաւ մինչեւ 50 հազար դահեկանի. երկրի  
 մէջ փող չկար, թանգութիւնը, սովը պատել  
 էր. կաթուղիկոսները հազիւ իրենց օրական ա-  
 պրուստը կարողանում էին հայթայթել. հար-  
 կապահանջները դադար չէին տալիս, նեղում  
 էին. այն ժամանակ թշուառ կաթուղիկոսները  
 սկսեցին թափառել գիւղից գիւղ, քաղաքից  
 քաղաք, թագնւում էին, մի տեղ չէին կարո-  
 ղանում մի գիշեր մնալ, այլ կարծես իբրև  
 փախստական գողեր հալածւում էին անխնայա-  
 բար: Ուրիշ ճար չգտնելով, կաթուղիկոսները  
 սկսեցին եկեղեցիների սրբութիւնները զանազան  
 վաճառականների եւ մահամետականների մօտ  
 գրաւ դնել եւ տոկոսով փող վեր առնել: Մին-  
 չեւ անգամ Ս. Արիստակէս Հայրապետի աջը,  
 Ս. Ստեփանոսի աջը, Էջմիածնի տաճարի անօթ-  
 ներն, եւ այլն: Երբ այդ եւս չօգնեց, երկու կա-  
 թուղիկոսները խորհեցին գրել Ամդայ քաղաքի  
 առաջնորդ անուանի Արապիոն վարդապետին, որ  
 մեծատան որդի էր, որ դայ աթուղ պարտքից  
 ազատէ եւ կաթուղիկոսական պաշտօնն եւս ինքը  
 վարէ: 1602 թուին Արապիոն եկաւ Զուղայ, եւ  
 Զուղայեցիք խորհուրդ անելով տարին նրան  
 Էջմիածին եւ ձեռնագրեցին կաթուղիկոս՝ Գրի-  
 գոր ԺԳ. անուամբ: Շուտով մի եւ նոյն հալա-  
 ծանքներն եւ նեղութիւնները, որ կրում էին  
 Գաւիթ եւ Մելքիսէթ կաթուղիկոսները, սկսե-  
 ցին եւ Արապիոն կաթուղիկոսի համար: Թէ ինչ  
 անտանելի չարչարանքներ կրեցին այդ երեք

Թշուառ Հայրապետներն Օսմանցիների եւ մանաւանդ Պարսիկների ձեռքից, բաւական է այստեղ յիշել, որ 1605 Թուին Սրապիոն կաթողիկոսին Շահաբբասի հրամանով բռնեցին քուղայում եւ մատնեցին տանջանքի, ամէն օր հրապարակի մէջ ոտերից կախելով եւ բրածեծ անելով: Մի եւնոյն Շահաբբասի հրամանով 1612 Թուին դահիճները տարածելով Մելքիսէթ կաթողիկոսին հրապարակի վրայ, չորս կողմից ցիցերի վրայ պրկելով, արցանով կտրեցին մարմնի միսն եւ դնելով բերանում, այնքան ծեծեցին, մինչեւ որ ստիպուեց ծամել իր սեպհական միսն եւ կուլ տալ: Իսկ թէ ինչ սարսափելի վիճակի մէջ էր ընկած Իջմիածնի աթոռը՝ այդ բոլորի պատճառով, ահա ինչ է պատմում Առաքել Աւարդապետը:

«... Աստուածաբնակ սուրբ աթոռս ամենեւիմբ ունայնացեալ էր ի ստացուածոց՝ եւ կողուպտեալ ի զարդուց. ոչ գիրք, զի ոչ էր անդ ժամասացութիւն եւ կամ ընթերցումն. ոչ զգեստ եւ ոչ շուռջառ, զի ոչ էր ժամակարգութիւն եւ պատարագ. մինչ զի Քրիստոսի իջման տեղն՝ եւ սուրբ սեղանն եւս ոչ ունէին զճածկոցն. ոչ կանթեղք, զի ոչ գոյր լոյսն, այլ հանապազ ի խաւարի. բայց այլազգի մահմետական ոմն վառէր զճրագ ձիթոյ եւ զնէր ի վերայ բեմին. եւ այն եւս երբեմն երբեմն վասն անցաւորից ճանապարհորդաց. զի տեսանելով զայն զողորմութիւն արացեն նմա. ոչ խնկարկութիւն, զի ոչ գոյր բուրվառ եւ խունկ, եւ սալայարկ յատակ եկեղեցւոյն քանդքանդեալ, եղեալ որջ զեռնոց եւ սողնոց, եւ մեծամեծք լուսամուտքն՝ զորս ունի՝ ամենն ի բաց կայր առանց վանդակի,

ուստի մտեալ ի ներքս թռչունք ընուն զեկեզեցին  
 ծռտովք եւ այլք գռեխօք. զոր յամենայն հարկիւ  
 սրբէաք. եւ բնդ այգն բնդ առաւօտն ի լուսանն ըն  
 ձայնք թռչնոցն խափանէր զձայն ժամասելոյն:»

Որպիսի եղկելի դրութեան եւ նուաստու-  
 թեան մէջ էր ընկել հայ ազգը, երբ հայկական  
 աթուրի մէջ ճրագ էր վառում մի մահամետական,  
 իսկ ամենայն Հայոց կաթուղիկոսի մարմնի միւր  
 արքանով էին պոկում . . . :

Այս ընդհանուր տեսութիւնից յետոյ  
 անցնենք գաղթականութեան պատմութեան:

Մենք տեսնք, որ ամբողջ Հայաստանն եւ  
 Արարատական գաւառը հեծում էին Օսմանցւոց  
 իշխանութեան ներքոյ, այնպէս որ բնակիչներին  
 շատերը հարստահարութիւնների երեսից սկսե-  
 ցին ուրիշ աշխարհներ փախչել, իսկ Արցախի  
 եւ Ուտիացւոց աշխարհից, Շամախու եւ Գան-  
 ձակի կողմերից բազմաթիւ Հայեր գաղթեցին  
 Պարսկաստան: Այդ գաղթողների մէջ անուանի  
 էին — Սարուխան բէկ եւ իր եղբայր Նազարը՝  
 Ոսկանապատ գիւղից. Զալալ բէկ եւ իր եղբորոր-  
 դին՝ Խաչէնի կողմից. Մելիք Սուջումն՝ Գիզակից.  
 Մելիք Փաշիկ՝ Բօշիղ գիւղից. Մելիք Բաբէն՝  
 Բրետիս գիւղից, Մելիք Հայկազն՝ Խանածախ  
 գիւղից: Գիզակի գաւառից էլ չորս գիւղ խըմ-  
 բովին գաղթեց: Գրանք բոլորը գնացին Ասպա-  
 հան քաղաքը, որտեղ Շահաբբաս բնակեցրեց  
 նրանց: Այդ եղաւ 1586 թուին: Երբ Արապիոն  
 կաթուղիկոս դարձաւ, Մելիքիսէթ կաթուղիկոսն  
 իր հետ առնելով մի քանի եպիսկոպոսներ,

վճուեց գնալ Սպահան եւ այնտեղի շայերի օգնութեամբ ակթոր պարտքից ազատելու եւ նորից կաթուղիկոսանալու հնարքը գտնել: 1603 թուին նա մտաւ Սպահան, որտեղ Շահաբբասը մեծ պատուով ընդունեց: Մեկփիսէթ եւ Գաւիթ կաթուղիկոսները գիտէին, որ Շահաբբասը՝ Սպահան գաղթած քրիստոնեաների խորհրդով կամենում է գալ նուաճել շայաստանն եւ ազատել Օսմանցւոց ձեռքից, ուստի մտածեցին օգնել Շահաբբասի այդ դիտաւորութիւնն իրագործելու: Նրանք կարծում էին, որ մաքրելով երկիրն Օսմանցիներից, իրենք եւս կ'ազատուին պարտքից եւ դարձեալ կը վարեն կաթուղիկոսութիւնը: Առաքել պատմագիրն անէ՞ք է թափում կաթուղիկոսների վրայ այդ երկնած խորհրդի մասին. « Խորհեցան, ասէ, խորհուրդ եւ ոչ Տերամբ, ըստ գրեցելումն, ի կորուստ անձանց իւրեանց. կործանումն եւ ի տապալումն աշխարհին եւ ի ջնջումն ազգին իւրեանց »: Ի հարկէ, անարդարութիւն է՝ այդ կաթուղիկոսներին համարել միակ պատճառն ապագայ աղէտների, այլ այս ստոյգ է, որ Մեկփիսէթ կաթուղիկոսի Սպահան գնալն եւ Շահաբբասին յորդորելը գալ ազատել երկիրն Օսմանցւոց ձեռքից, արագացրեց գործի լուծումը: Շահաբբաս շարունակ մտածում էր քանդել Օսմանցւոց հետ արած իր հաշտութիւնն եւ Ատրպատական ու Արարատեան աշխարհն ազատել նրանց ձեռքից: Այդ դիտաւորութիւնն իրագործելու համար նա յաջող առթի էր սպասում. նրան հարկաւոր էր հաւ-

աստի լինել, որ երկրի բնակիչները ձեռնտու կը լինեն իրեն. այդ բանի մէջ համողեցրին նրան Սպահան փախած քրիստոնեաներն եւ Մելքիսէթը: Եւ Ճշմարիտ, թշուառ ժողովրդեան հօգին բերանն էր հասել Օսմանցւոց ձեռքից:

«Վասն զի յոյժ շարաշար նեղութեամբ նեղէին զնոսա ազգն Օսմանցոց ծանր հարկապահանջութեամբ, եւ կեղեքմամբ զրկէին եւ կողտակէին, եւ հաւատոց կուռէճութիւն առնէին, եւ այլ բազում տառապանօք շարշարէին, ոչ միայն զազոս Հայոց, այլ եւ զազոս Վրաց եւ զմահմտականաց, եւ վասն այնր նեղութեան զնացին առ թագաւորն Պարսից, զի թերեւս նովաւ զգիւրութիւն ինչգացեն զերծեալք ի ծառայութենէն Օսմանցւոց »:

Եւ յոգիսի դրութեան մէջ գտնուող ժողովուրդը՝ միջոց չունէր մտածելու թէ արդեօք նրա ցաւերը չթեթեւանան Օսմանցւոց ձեռքից Պարսից ձեռքն ընկնելով:

Գաղթականութիւնն առաջ բերող պատճառների մասին՝ մենք մի քիչ յետոյ կը խօսենք, ինչպէս եւ Շահարբասի անձնաւորութեան մասին. իսկ այժմ տեսնենք, թէ ինչպէս կատարուեց այդ գաղթականութիւնն եւ Արարատեան աշխարհի աւերումն:

Մենք ասացինք, որ թէ Արարատեան աշխարհն եւ թէ ամբողջ Ատրպատականը հեծում էին տիրողների լծի եւ սարսափելի կեղեքումների ներքոյ, եւ գեո 1586 թուին բազմաթիւ Հայեր Աղուանից աշխարհից, Գիլակի կողմից 4 գիւղ, եւ Գաշտ կոչուած գաւառի (Գողթան, Ագուլիսի մօտ) ժողովրդ-

դեան երեք մասն գաղթեցին Պարսկաստան եւ  
 Շահաբբաս բնակեցրեց նրանց նոյն իսկ Սպա-  
 հանի մէջ: Նոյնպէս 1603 թուին Մեկքիսէթ  
 կաթուղիկոսն իր երկու եպիսկոպոսների հետ  
 գնաց Սպահան եւ յորդորեց թագաւորին գալ  
 ազատել Հայաստանն Օսմանցւոց ձեռքից: Այդ  
 եկաւոր Հայերի եւ կաթուղիկոսի վկայութիւնը  
 համոզեցին Շահաբբասին, որ իր դիտաւորու-  
 թիւնը կարող է հեշտութեամբ իրագործել,  
 որովհետեւ բնիկ ժողովուրդն իր կողմն պէտք է  
 լինի: Տեսնելով Հայերի՝ իր արշաւանքի մէջ  
 իրան օգնելու այդ պատրաստակամութիւնը,  
 Շահաբբաս մեծապէս ուրախացաւ եւ արդէն  
 պատրաստուամ էր զօրաժողով լինել, երբ մի  
 նոր յաջող առիթ ներկայացաւ եւ ստիպեց  
 նրան աճապարել: Սալմաստի իշխան Բիւրտ  
 Ղազի խանը, իր մեծաւոր թաւրիզու Ալի Փա-  
 շայից նեղուելով, կամեցաւ Պարսից կողմն ան-  
 ցնել, ուստի մի դեսպան ուղարկեց Շահաբբա-  
 սին, թելադրելով նրան գալ Հայաստան եւ  
 հանել Օսմանցիներին, խոստանալով ըստ ամե-  
 նայնի ձեռնառու լինել նրան: Ղազի խան դես-  
 պանն ուղարկելուց՝ յայտնի կերպով ապստամ-  
 բեց Ալի Փաշայից: Ստանալով այդ հրաւերը,  
 Շահաբբաս անմիջապէս ժողովեց իր նախարար-  
 ներին, խաներին եւ բազմաթիւ զօրք, եւ շտա-  
 պով չուեց գէպ ի թաւրէզ: Իր հետ առաւ  
 Հայերից շատերին եւ Մեկքիսէթ կաթուղի-  
 կոսին: Մինչդեռ Օսմանցիները ոչինչ չգիտէին  
 եւ Ալի Փաշան իր 20 հազար զօրքով գնացել

էր Սալմաստ ապստամբ Ղազի խանի վրայ, ահա յանկարծ Շահաբբաս մտաւ Թաւրիզ եւ տիրեց. այդտեղից նա շուտով խաղաց Ալի Փաշայի վրայ եւ երբ սա աճապարեց դառնալ՝ երկու թշնամի բանակները պատահեցին միմեանց Սոֆիանի դաշտում եւ կռիւր սկսուեց: Յաղթութեց Ալի Փաշան եւ անձնատուր եղաւ Շահաբբասին եւ այդպիսով վերջինս տիրացաւ Ատրպատականին եւ այդ աշխարհում գտնուած պանդուխտներին, առաւել Հայերից, բշել տուեց Պարսկաստան: Այս եղաւ 1603 թուին:

Պատերազմի դաշտից ազատուած օսմանեան զօրքը փախաւ եւ գնաց Նախիջեւան, միացաւ այդտեղի զօրքի հետ. եւ որովհետեւ նրանք լաւ գիտէին, որ շուտով Նախիջեւանի դաւառն եւս կ'ընկնի Շահի ձեռքը, ուստի կամեցան կողոպտել շրջակայ գիւղերը, մանաւանդ Զուղան եւ ապա փախչել Երեւան:

Այս լսելով գիւղացիներն եւ Զուղայեցիները, իրանց ստացուածքը վեր առնելով՝ պատսպարուեցին ամուր տեղերում եւ թաքկեցան լեռների մէջ, մինչեւ Շահաբբասից ուղարկուած զօրքն երկրի պահպանութեան համար՝ հասաւ: Տեսնելով Պարսկական զօրքի արշաւանքը, Թաւրիզից փախած օսմանեան բանակը կողոպտելով ձեռքն ընկածը, փախաւ գնաց ամրացաւ Երեւանի մէջ, իսկ Նախիջեւանինը մնաց այդ քաղաքի մէջ: Մի քանի ժամանակից յետոյ, յաջորդ 1604 թուին, Շահաբբաս իր նախարար Զըլֆիզար խանին մեծ



զօրքով ուղարկեց Նախիջեւանի վրայ: Նա պա-  
 շարեց քաղաքն եւ կարողացաւ շուտով համո-  
 զել բնակիչներին եւ օսմանեան զօրքին՝ առանց  
 պատերազմի անձնատուր լինելու. հրատարա-  
 կեց, որ ամէն մարդ կարող է խաղաղութեամբ  
 ապրել կամ գնալ ուր կամենայ: Այս յայտ-  
 նութեան վրայ փախստականները դարձան ի-  
 րանց տեղերը: Շուտով ինքն Շահարբաս թաւ-  
 րիղեց մեկնեց Նախիջեւան գալու, եւ ճանա-  
 պարհին մտաւ Զուղայ, ուր նրան փառաւոր  
 ընդունելութիւն արին Հայերն եւ երեք օր հիւր  
 մնաց այնտեղ. ապա գնաց Նախիջեւան եւ մի  
 քանի օր այստեղ մնալուց յետոյ չուեց դէպ ի  
 Երեւան, որի մէջ պատսպարուել էին Օսման-  
 ցիներն եւ պատրաստուում էին պատերազմել:  
 Պարսկական բանակը հաստատուեց Երեւանի  
 մօտ եւ պաշարեց քաղաքը: Արովհետեւ բոլոր  
 շրջակայ երկիրն իր իշխանութեան ներքոյ էր  
 գրաւել եւ այդ երկիրը չէն էր եւ ամէն բա-  
 րիքներով լի, հետեւաբար եւ բանակն առա-  
 տութեան մէջ ծփում էր, ուստի եւ Շահար-  
 բաս շատ չէր հոգում շուտով քաղաքն առ-  
 նել, այլ իր զօրքի մեծ մասը զօրապետներով  
 ուղարկեց օսմանեան իշխանութեան ներքոյ  
 գտնուած ուրիշ քաղաքների եւ աւանների  
 վրայ: Զօրքը սփռուեց Արարատեան, Արինի,  
 Բասենի, Շիրակի, Գանձակի, Արտազի եւ այլ  
 կողմերն, եւ աւերելով, քանդելով, կողոպտե-  
 լով, անհամար բազմութիւն ժողովրդեան քշեց  
 բերաւ թափեց Պարսից բանակն Երեւանի ա-

ուաջ: Խորամանկ Շահաբբաս կռուի ժամանակ միշտ քրիստոնեաներին, այսինքն Հայերին էր առաջ ձգում եւ ստիպում նրանց կռիւ տալ. եւ այսպիսով թշնամու գնդակները խեղճ Հայերի գլխին էին տեղում: Ալլահվէրդի խան վէզիրը, որին Շահաբբաս ուղարկել էր Արժկէ քաղաքի վրայ, չկարողանալով այդ ամուր բերդն առնել, մտաւ Բղնուճեաց գաւառը, Քաջբերուճեաց երկիրը, Արճէշ, Աւն, եւ բովանդակ աշխարհի մէջ սուր եւ հուր սփռեց, որքան կարողացաւ կոտորեց, մանաւանդ ծերերին եւ մանուկներին, եւ մնացածն ի գերութիւն վարեց: Առաքել Ա. ի վկայութեան համեմատ՝ միայն Բղնուճեաց, Առբերանի, Քաջբերուճու եւ Տոսպի գաւառներից գերած Հայերի թիւն 23.000 էր, թող կոտորուածները: Այդ բոլոր գերուած ժողովուրդն իրանց գրաստների, ոչխարների եւ ձիերի հետ Ալլահվէրդի խանը բերաւ ածեց Պարսից բանակն եւ Շահաբբաս որոշելով եկաւորներին պանդուխտ բնակիչներից, քշել տուեց առաջիններին Պարսկաստան, իսկ բնիկներին դարձնելով իրանց տեղերը, ծանր հարկեր դրաւ նրանց վրայ:

Երեւանի պաշարման միջոցին, Սրապիոն կաթուղիկոսն այդտեղ էր: Իջմիածնի աթոռի պարտատէր Օսմանցիները վախնալով, որ քաղաքն առնուի եւ իրանց պահանջը կորսուի, բռնեցին Սրապիոնին եւ չարչարելով պահանջում էին Մելքիսէթի եւ Դաւթի պարտքերն ասելով, թէ այժմ կաթուղիկոսն դու ես: Խեղճ

Սրապիոն ինչ որ կարողացաւ, վճարեց եւ փախաւ նրանց ձեռքից ու թաք կացաւ: Երբ Շահարբաս եկաւ Երեւան, Սրապիոն կաթուղիկոսը շատ ընծաներով ներկայացաւ նորան, բայց Շահը, որ մտքում գրեւ էր Մելքիսէթին տալ կաթուղիկոսութիւնը, վատ ընդունելութիւն արաւ, ուստի Սրապիոն երկիւղ կրելով, փախաւ Զուղայ:

Վերջապէս իննամսեայ պաշարումից յետոյ՝ օսմանեան զօրքը ոչ մի կողմից օգնութեան յոյս չտեսնելով անձնատուր եղաւ, եւ Շահարբաս տիրեց Երեւանին, եւ իսկոյն մուսնեաթիկների բերանով հրատարակեց, թէ այսուհետեւ Հայոց երկիրը Շահինն է: Այս բոլոր կոիւնների եւ ասպատակութիւնների ժամանակ Շահարբաս խիստ կերպով հետեւեալ քաղաքականութիւնն էր ի գործ դնում. այն բոլոր ժողովուրդը, թէ՛ մահմետական, թէ՛ քրիստոնեայ եւ թէ՛ երբայեցի, որ խաները քշել բերել էին Գանձակից, Արժկէից, Վանից, Մանազկերտից, Ալաշկերտից, Մաքուից, Կարսից, Էրզրումից եւ այլ տեղերից, նա ուղարկում էր Պարսկաստան եթէ զարիւբական, այսինքն եկաւոր էին, իսկ բնիկներին ծանր հարկերի ենթարկելով յետ էր դարձնում իրանց տեղերը:

Գժբախտ եւ անխոհեմ Գաւիթ եւ Մելքիսէթ կաթուղիկոսները շուտով գտան իրանց յանցանքի պատիժը. նրանք յորդորեցին Շահարբասին գալ գրաւել Հայաստանն, եւ ձեռնուտու եղան նրան այդ գործում, յուսալով ազա-

տուել ծանր պարտքերից. բայց հազիւ Շահարբաս առաւ Երեւանը, որ կանչեց իր մօտ կաթուղիկոսներին եւ պահանջեց նրանցից վճարել իրան այն գումարը, որ պարտ էին Օսմանցիներին: Սոսկացին, ապշեցին կաթուղիկոսներն եւ ապաշաւեցին, տեսնելով, որ ոչ միայն պարտքից չեն ազատուում, այլ եւ իրանց անխոհեմ ընթացքով աշխարհն աւերակ դարձաւ, բայց շատ անագան էր այդ զղումը. նրանք ստիպուեցան մուրալ եւ ծանր տոկոսով փող ձարելով, տալ Շահարբասին: Իսկ ճ Սրապիոն կաթուղիկոսն եւս իր բաժինն ունեցաւ. Շահի ծառաներն եկան բռնեցին նրան քուղայում եւ սկսեցին տանջել, ծեծել, բրածեծ առնել հրապարակով ամբողջ օրեր, մինչեւ որ ստացան իրանց ուզածն եւ բաց թողեցին: Այդ չարչարանքից ազատուելով, թշուառ Սրապիոնը մի կերպով փախաւ Ամիդ, եւ հիւանդանալով ցաւերից, յաջորդ 1606 թուին Ապրիլի 25ին մեռաւ:

Սակայն Շահարբասի յաղթութիւնների եւ օսմանեան զօրքի պարտութեան լուրը շարժեց Օսմանցւոց Սուլթանին եւ նրա նախարարներին, որոնք ահագին զօրք գումարելով ու սպարապետ կարգելով «Ջզալ օղլի» կոչուած Սինան փաշային ուղարկեցին՝ յետ առնել գրաւուած երկիրները: Շահարբաս, որ այդ միջոցին եկել էր կարս, Շիրակի երկիրն եւս նուաճելու, լսելով Սինան փաշայի Էրզրում հասնելը, յետ դարձաւ եւ եկաւ Երուանդա-

կերտ կամ Աղջաղալէ: Աշուելով եւ տեսնելով,  
որ անկարող է օսմանեան հղօր զօրութեան  
դէմ դնել, մի եւ նոյն ժամանակ չկամենալով  
զրկուել Հայաստանի ժողովրդից, այլ փափագ  
ունենալով պահել այդ ժողովուրդն իրան հար-  
կատու եւ հողագործ, Շահաբբաս յարմար եւ  
պատեհ առիթ համարեց վերջապէս կատարիլ  
իր վաղուց երկնած խորհուրդը, այն է Հայաս-  
տանի բոլոր բնակիչները վարել Պարսկաստան:

Այդ կերպով Շահաբբաս մի ձեռքով  
երկու թռչուն էր բռնում. նախ օսմանեան  
զօրքը վտանգի տակ էր ձգում, զրկելով նրան  
պաշարից, գրաստից. երկրորդ իր երկիրն էր  
շէնացնում եւ աւերակ Հայաստանն այն ժա-  
մանակ կը ծառայէր իրրեւ պատուար Պարս-  
կաստանին թշնամիների դէմ: Ի հարկէ այդ  
տեսակ դիտաւորութիւնը յայտնապէս իրագոր-  
ծել շատ դժուար էր, ուստի Շահաբբաս դի-  
մեց խաբէութեան. նա կանչեց իր մօտ Հայերի  
մեծամեծներին եւ առ երեսս ցաւակցութիւն  
ցոյց տալով նրանց վիճակի համար՝ յայտնեց  
որ ինքը պատրաստ է պատերազմել Օսմանցի-  
ների հետ, բայց նախ եւ առաջ պէտք է մտա-  
ծել իր սիրելի ժողովուրդն ազատել ամէն  
վտանգից, ապահովացնել նրա ստացուածքը,  
ընտանիքն աւազակութիւնից եւ չթողնել, որ  
վնասների ենթարկուի. ուստի ցանկանալով ժո-  
ղովրդի բարիքը, նա մտածել է, որ ամենալաւ  
միջոցն այն է, որ երկրի բոլոր բնակիչները, վեր  
առնելով իրանց ընտանիքը, ունեցած շարժա-

կան գոյքը, գնան մի ապահով տեղ մնան, մինչև ինքն պատերազմ կը մղէ Օսմանցիները դէմ. եթէ կը յաղթէ նրանց, այն ժամանակ կը դառնան իրանց տեղերը, իսկ եթէ կը յաղթուի, ինքը կը քաշուի իր երկիրն եւ նրանք կարող են Օսմանցիների տիրապետութեան տակ մնալ:

Հայերը հասկացան Շահարբասի խորամանկութիւնն եւ թէ ինչ չար նպատակ էր ծածկուած այդ սիրալիր առաջարկութեան տակ: Այդ առաջարկութիւնը Շահն անում էր նրանց 1605 թուի աշնան, ուստի ձմեռուայ մօտենալը պատրուակ բռնելով, աղաչեցին, որ թոյլ տայ իրանց՝ ձմեռը մնալ, չուելու պատրաստութիւն տեսնել եւ թէ գարնան պատրաստ են կատարել հրամանը: Տեսնելով Շահարբաս, որ իր աղուէսային հնարագիտութիւնը չաջողուեց, սկսեց գործել յայտնի համարձակ, եւ հրաման տուեց բռնութեամբ քշել ժողովուրդը: Իւրաքանչիւր գաւառի վրայ մի մի վերակացու կարգեց, զօրք տուեց նրանց օգնական եւ հրամայեց, որ ամէն շունչ կենդանի վարեն քշեն Պարսկաստան, ով որ ընդդիմանայ, չխնայեն, խփեն սպանեն:

Թողնենք, որ ինքն Առաքել Ա.ը խօսէ:

“Եւ հրամայեաց Շահն, որ եւ կարացեն ձեռնարկել, արտասահման արարեալ վարեցեն, եւ ոչ թողուցուն ամենեւին շունչ կենդանի, եթէ քրիստոնեայ եւ թէ մահմետական, զհաւանողն բանիւ, եւ զոչ հաւանողն եւ զսոււնդանողն հրամանաց թագաւորին, սրով եւ մահուամբ եւ գերութեամբ:

«Եւ զօրսպետացն՝ յետ ընդունելոյ զայսպիսի  
 աշխարհակործան եւ զսաստիկ հրաման ի թա-  
 գաւորեն, ելեալ իւրաքանչիւր զօրավար իւրով  
 գնդաւն՝ դիմեցին յիւրաքանչիւր հրամայեալ  
 գաւառսն աշխարհիս Հայոց. եւ իբրեւ հողմխառն  
 հուր ընդ եղէգն ընթացեալ, հապճեպ տագնա-  
 պաւ վաղվաղակի զամենայն բնակիչսն գաւառացն  
 կորզեալք յիւրաքանչիւր բնակութեանց եւ ար-  
 տասահման արարեալ յիւրաքանչիւր տեղեաց,  
 իբրեւ զջուրս բազմութեան հօտից եւ անդէոց  
 զառաջեաւ արարեալ՝ բռնութեամբ վարեալ՝ ա-  
 ծեալ բերեալ հասուցին ի գաւառն Արարատու,  
 եւ զլայնանիստ գաշան նորա լցին ծագէ ի ծագ,  
 քանդի ի ստորոտէ լերանցն Գառնույ մինչ ի յեզրն  
 Երասխայ մեծի գետոյն, լայնութիւնն էր բանակին,  
 իսկ զերկայնութիւնն դովիմբ կշռեաց դու, բայց  
 ես ասեմ աւուր միոյ ճանապարհ եւ յայլուր տեսի՝  
 որ հինգ աւուր ճանապարհ էին գրեալ: Եւ էր նոր  
 փոխեալ թուականն Հայոց եւ մտեալ ի ՌԾԳ.  
 յառաջնում ամսեանն Հայոց Նաւասարդի որ  
 քչեցին զերկիրն: Եւ պարսիկ զօրքն, որք գնացին  
 ի քչել զերկիրն, ուստի եւ հանեալ զժողովուրդս,  
 քչէին, եթէ ի գեղօրէից եւ թէ ի քաղաքացն  
 զամենայն շէնս, զտունս եւ զբնակութիւնս հուր  
 այրեալ անիննայաբար հրկէզ առնէին: Այլ եւ  
 զամբարս խոտոյ եւ զյարդի՝ զցորենոյ եւ զգարոյ  
 եւ զայլ պիտոյից, զամենայն այրեալ վատնէին:  
 Այսպէս աւերեալ թափուր արարին զաշխարհն  
 վասն զօրացն Օսմանցւոց՝ զի մի մնացէ ինչ ոտձիկ  
 նոցա եւ վտանգեացին նոքա: Այլ եւ ելեալ ժո-  
 ղովուրդքն զայն տեսեալ սրտակտուրք լիցին, եւ  
 մի գարձցին յետս:»

Ահա այսպէս պարսկական վայրագ զօրքն  
 ամայացնելով բովանդակ Հայոց երկիրը, բոլոր  
 շինութիւնները կրակի ճարակ տալով, բոլոր

ուտելիքն եւ բնակիչների պաշարը փճացնելով, որպէս զի ոչ ոք այլ եւս չփափագէ դառնալ կամ մնալ, հարկանելով, սպանանելով բերին անմեղ, անտէրունչ ժողովուրդը լցրին Այրա-րատի ընդարձակ դաշտը, սպասելով, որ Շահ-աբբաս հրամայէ վարել Պարսկաստան: Դաշտի շուրջը զօրքով պատած էր, որ ոչ ոք չկարողանայ փախչել: Պարսիկները շմոռացան եւ Էջմիածինը կողոպտել աւերել, եւ երկու կաթուղի-կոսներին մի քանի եպիսկոպոսների հետ թագ-նուած գտնելով, նրանց եւս քշեցին, բերին խառնեցին ժողովրդեան բանակի հետ:

Սակայն այդ ընդհանուր սրածուծեան եւ թշուառութեան ժամանակ Հայի նախնական քաջութիւնը տեղ տեղ փայլեց, մանաւանդ հայ կնոջ հերոսութիւնն եւ քաջասրտու-թիւնը հրատարակուեց: Բարոյականութիւնը, ամուսնական պատուի նախանձախնդրութիւնը, որով հայ ընտանիքը միշտ փայլել է աշխարհի երեսին, այստեղ եւս ցոյց տուեց իր զօրու-թիւնն եւ ապացուցեց, թէ որքան հայ ազգը ճնշուած, հարստահարուած, անկեալ վիճակի մէջ եւս լինի, դարձեալ նա ունի մեծ բարոյական ոյժ գիմադրելու դժբախտութիւններին, նա ունի այնպիսի հազուագիւտ յատկութիւններ, որոնք քաղաքակրթութեան եւ զարգացման ըն-դունակ ազգերին են միայն սեպհական: Հայ կինն իր պատիւն անարատ պահելու համար, չէ վարանում մի բոպէ սարի ահագին բարձրու-թեան գլխից իրան անդունդը ձգել, կտոր կտոր



լինել, դաշոյնը իր ձեռքով իր սիրտը մխել: Այո՛, այդպիսի տեսարաններ տեղի ունեցան փրկչական 1605 թուին, աշնան, երբ Պարսից վայրագ զօրքը քշում էր Հայերին: Մօտ հազար հոգի Հայերից, այր եւ կին, փախչել պատսպարուել էին Գառնու գաւառի «Քոռադարայ», կոչուած ձորի անառիկ այրերի մէկի մէջ, որի անունն է՝ Իւշիւն էր, մի բարձրագագաթ տեղ: Ամիրգունախանն իր զօրքով եկաւ եւ որքան հրացան արձակել տուեց, չկարողացաւ առնել: Չարահասար Պարսիկներին աջողուեց վերջապէս սարի գագաթից թագուն կերպով մի քանի զինաւորուած մարդ իջեցնել այրի դուռը, որոնք յանկարծ սուսերամերկ մտնելով բազմութեան մէջ, շփոթեցրին եւ սկսեցին կոտորել, մինչեւ մնացած Պարսիկներն եւս վրայ հասան: Պարսիկները կոտորում էին միայն տղամարդերին եւ պառաւներին, եւ խնայում էին երիտասարդ կանանց, տղաներին եւ աղջիկներին իրանց անասնական կիրքը յագեցնելու համար: Սակայն թշուառները տեսնելով, որ պէտք է պղծութեան գարշանքին մատնուին, լաւ համարեցին մահն անպատիւ կեանքից, եւ մայրն իր ձեռքով իր աղջկան անդունդը գահափիթելով, ինքն եւս ետեւից միանում էր նրան:

«Բաղլումբ ի նոցանէ պատէին զերեսս փակեղամբ եւ ձորձով իւրեանց եւ յանբաւ բարձրութենէն ի յայրէ անտի ի վայր արկանէին զինքեանս եւ մեռանէին: Եւ վասն զի ի մէջ ձորոյն էր մայրի անտառախիտ ծառոց, եւ ոմանց յայնց՝

որք զինքեանս ի վայր արկանէին յայրէ անտի՝ եկեալ պատահէին ծայրից ոստոց ծառոց եւ արգելուին ի նոսա, ոմանց եւս ընդ փորն մտեալ ի քամակն ելանէր ճիւղն, եւ ոմանց ի սիրտն մտեալ ի թիկունս ելանէր: Սոքա եւս այսպիսի տաժանելի եւ դառն մահուամբ վճարեցան՝ — ասում է Առաքել վարդապետ:

Այս կերպով Շահարբասի նախարարներն անմարդաբնակ արին ամբողջ Հայոց աշխարհն եւ Արարատի գաշտը ծագէ ի ծագ լցուեց մարդով: Թէ որքան մեծ էր ժողովրդեան բանակը, կարելի է եզրակացնել նրանից, որ Առաքել Ա. ի ասելով, այդ բանակի լայնութիւնն էր Գառնու լեռների ստորոտից մինչեւ Երասխ գետը, իսկ երկայնութիւնն մի, իսկ ըստ ոմանց, հինգ աւուր ճանապարհ: Եթէ ի նկատի ունենանք, թէ քանի երկիրներ, գաւառներ գատարկուեցին, այն ժամանակ բանակի մեծութիւնը մեղ չպիտի զարմացնէ: Սկսեալ Շիրակի սահմաններից մինչեւ Լոռի, նախիջեւանից մինչեւ Կուր գետ, Աղարշակերտից մինչեւ Արտաղ, Արտաղ գաւառից մինչեւ Որմի եւ Թաւրէզ, ինչպէս եւ Քղնունեաց եւ Ուշտունեաց սահմանները, — ահա այն տարածութիւնը, որի վրայ գտնուած Հայերը դուրս հանուեցան: Յականէ անուանէ հետեւեալ գաւառներն են՝ Թակայ եղան այդ դժբախտութեան: Կարինի, Բասենի, Ինուսի, Մանազկերտի, Արծկէի, Արճիշի, Բերկրի, Աանի, Կարսի, Զարեհճատի, Շիրակի, Ապարանի, Համզաչեմանի, Լոռու, Գեղամի, նախիջեւանի գաւառները, բովանդակ

Արարատի դաշտը, Երեւանը, Կաղզուանի ձորը, Ալաշկերտի երկիրը, Մաքուի գիւղերը, Աղբակի, Սալմաստի, Խոյի, Որմու երկիրները, Թաւրիզի շրջակայ գիւղորայքը, այլ և Արխոււլաղ, Ծաղկունաց ձոր, Գառնու ձոր, Ուրծայ ձոր, ևւայլն:

Ժողովրդի վարիչները բոլոր ժողովուրդը լցնելով Էջմիածնի դաշտի մէջ, սպասում էին Շահաբբասի հրամանին, որ Աղջաղալայ էր գտնուում: Լսելով, որ Սինան Փաշան իր զօրքով հասել է Կարս, նա իսկոյն հրաման տուեց առաջ վարել ժողովուրդը դէպ ի Երասխ գետը, եւ ինքն էլ պնդեց նրա ետեւից, իսկ Օսմանցիներն էլ պնդեցին Շահաբբասի ետեւից եւ աճապարում էին հասնել նրան:

Այդպէս, երեք մեծ բանակ եղան. առաջինը՝ ժողովրդինը, որ գնում էր առաջեւից. երկրորդը՝ Շահաբբասի զօրքը, երրորդը՝ Օսմանցիների զօրքը: Այդ բանակները միմեանցից մի օրւայ ճանապարհով բաժանուած էին: Այսպէս, միմեանց ետեւից պնդելով, ժողովրդի եւ Շահաբբասի բանակներն եկան հասան Զուղայի սահմանը, Երասխ գետի ափը, իսկ օսմանեան բանակը հասաւ Նախիջեւան:

Այլ եւս ժամանակ չկար կորցնելու. մնալ գետի ափում անկարելի էր. Շահաբբաս վախենում էր պատերազմել Օսմանցիների հետ, ուստի միակ միջոցն էր փախչել եւ անցնել Պարսկաստան: Այդ պատճառով հրաման տուեց, որ շտապով ժողովուրդը անցկացնեն

գետի միւս ափն եւ ահա այդտեղ «եղեւ լալ  
եւ կրճտել ատամանց.» այդտեղ պէտք է ժո-  
ղովուրդը քամէր դառնութեան վերջին մրուրը:

### Հայերի Երասխ գետից ակցուելը:

«Մայր Երասխ ափերով  
Քայլամուր գնում եմ,  
Հին հին դարուց յիշատակ  
Ալեաց մէջը պտրում եմ:

«— Երասխ, ինչո՞ւ օրկանց հետ  
Պար շես քննում մանկական,  
Դու ղեռ ծովը չը հասած,  
Սըգաւոր ես ինձ նման:»

«— Մէջքը ուղցուց Երասխը,  
Փրփուր հանեց իր տակից,  
Ամպի նման զոռալով,  
Էսպէս իօսեց յատակից:

«— Խիզախ, անմիտ պատանի,  
Նիրճըս ինչո՞ւ դարեւոր  
Վըրդովում ես, նորոգում  
Իմ ցաւերը քիւրաւոր:»

Գէ լսիր պատմեմ:

«1605 թուին Սեպտեմբերին, մի շարաքառ-  
տիկ օր, ղեռ վազորդեան արեւը չը ծագած,  
Երասխ գետափունքը ծագէ ի ծագ լցուած էր  
անհամար բազմութեամբ մարդկան: Տղամարդ, կին,  
պառաւ, ծեր, մանուկ, նորատի գեղանի հայ կու-  
սանք, կայտառ, քաջ հայ պատանիներ աղիողորմ  
կահանով լալիս ու գոռում էին: Պարսից Շա-  
հաբբաս թագաւորը իր աւագանու հետ բազմած  
գետի ափին, հրաման տուեց, որ ժողովուրդն ան-  
ցընեն գետից. իսկոյն մունեաթիկներ բնկնելով  
բազմութեան մէջ, սկսեցին բարձրաձայն գոռալ  
— հրաման է Մեծ Շահաբբաս Շահնշահից ան-

միջապէս անցնել գետը. յապաղողը խստիւ պիտի պատժուի. բազմաթիւ լաստեր, նաւակներ, որոնց մի մասը բերել էին Աասպից ծովինց, լցրել էին գետի երեսը, սակայն անհամար բազմութիւնը անցնելու համար բաւ չէին, զօրականներն ստիպուած էին շուշանալ, բայց ժողովուրդն տեսնուած էր, որ անկարելի է մի օրու՛մ այդքան սարսափելի բազմութիւնը նաւերով փոխարկելը. գիտէր այս եւ Շահաբբաս, ուստի հրամայեց, որ նաւերով ու լաստերով միայն զօրքի ծանր բեռները եւ հաւաքած աւարը տանին, իսկ ժողովուրդն թող լող տալով անց կենայ: Այս հրամանը աւելի ազդու անելու եւ արհաւիրք սփռելու համար, սկսեցին որի ահանջը, որի շքթունքը, որի ձեռք կտրել, իսկ հայ երեւելիներից մի երկուսի եւս գլուխը կտրելով, ցիցերի վրայ կանգնեցրին գետի եզերքին: Զօրքն ամէն կողմից շրջապատելով ժողովուրդն, մղում էր նրան գետի բերանը. թշուառ Հայերը աղաչեցին, որ գէթ թոյլ տան ջրի ծանապարհները զննելը եւ հուն ու ծանծաղուտ տեղերը գտնել, բայց Շահի հրամանն անողոք էր. պէտք է անմիջապէս բոլորը ջուրը թափուին. Օսմանցիք ետեւից գալիս են, ժամանակ չկայ մտածելու եւ սպասելու: Այս խիստ հրամանն ընդունելով պարսիկ վարիչ զօրքը իր անգթութիւնը կատաղութեան եւ գաղանութեան հասցրեց. եւ ահա այդտեղ բացուեց մի քստմնելի, աղիողորմ տեսարան, որ ոչ մի գրիչ չէ կարող նկարագրել: Աւարիչներն սկսեցին մահակներով, բրերով, գաւազաններով եւ սրերով հարուածներ տալով ստիպել ժողովուրդն գետը մտնել. թշուառների ճիշը, աղաղակը, գառն ողբը, հեծութեան ձայնը աշխարհք էր վեր առել. նոցա աղաղակը երկինք էր հասնում. մահուան երկունքը պաշարել էին բուրիւն. ետեւից վարիչները, գաղանութիւնը, սուրը, առաջից սարսափելի գետը, երկու կողմից եւս

Հաստատապէս մահ. ոչ մի կողմից փրկութեան  
 յոյս չկայ, եւ ահա այդ սարսափելի յուսահատու-  
 թեան մէջ հայրը թողեց, Լքաւ իր զաւակը,  
 տղամարդը իր կնոջը, մայրը իր աղջիկը, եղբայրը իր  
 քրոջը. հարուստ, աղքատ, շինական, աղնուական,  
 աշխարհական, հոգեւորական աղիողորմ կականով  
 թափուեցին գետի մէջ. գութը, ողորմութիւնը ան-  
 հետացաւ. ամէն մարդ աշխատում էր իր կեանքը  
 փրկել. շուտով սրբնթաց եւ յորձանուտ գետի  
 երեսը լցուեց գիակաների, անմեղ զոհերի մարմին-  
 ներով. ով լողալ գիտէր, մի կերպ ազատուում էր,  
 ով չգիտէր, յատակն էր իջնում. օրհասական  
 կռուից պաշարուելով, լուղորդները խափանում էին  
 միմեանց փրկութիւնը. տղայք, աղջկուներ, հիւանդ-  
 ներ ջրի երեսն իբրեւ խոխու լցուել էին, իբրեւ  
 մրջին քշում էին. յղի կանայք ծանրութիւնից,  
 ստնտեայ մայրերը մանուկներով ծանրաբեռնուած,  
 ընկղմում էին եւ անհետանում. միմեանց ոտքերից  
 բռնուելով, ջրի խորքն էին սուղում. ջուրը քշում  
 տանում էր իբրեւ փայտի տաշեղ: Մնացեալները  
 կամ լողանալով փրկուում էին եւ հասնում էին  
 եզրը, կամ բռնելով նաւակների ծայրերից, ձիերի  
 եւ զրասանների պոչից, մի կերպով դուրս էին  
 գալիս: Շփոթութիւնը գնալով սաստկանում էր.  
 Պարսիկների բարբարոսութիւնը իր վերջին ծայրին  
 հասաւ. նրանք ողորմելի Հայերին սկսեցին տանջել  
 եւ ստացուածքը ձեռքներից խլել: Խղճալիների  
 կոծն ու աղաղակը, օգնութեան ձայնը թնդացնում  
 էր սարերն ու ձորերը, բայց ո՞վ էր լսում, ո՞վ էր  
 զթում: Այլ բախտաւոր էր, մի ձի կամ մի զրաստ  
 ունէր, կարողանում էր մի կերպ փրկուիլ, բայց  
 հազիւ հասնում էր միւս եզրը սրտատրոփ, այն-  
 տեղ նոր փորձանք, նոր բարոյական տանջանք եւ  
 մահ սպասում էր. այնտեղ կամ Պարսիկն էր  
 սպանում, իրան կինը եւ գոյքը յափշտակելու  
 համար, կամ իր ընտանեկան գեղեցիկ աղջիկներին

և տղաներին դերի վարած էր տեսնում. անօրէն Պարսիկ զինուորները ընդհանուր խառնակութեան միջոցին յափշտակում էին հայ դեղանի կոյսերին և պատանիներին ու փախցնում, իրանց անասնական կիրքն յազեցնելու ու պղծելու համար: Որքան մայրեր անզաւակ մնացին, որքան հայ առաքինի կանայք բռնաբարուեցան. Աստուած միայն գիտէ:

«Ահա այսպիսի սարսափելի դառնութեան մէջ հայ ժողովուրդն անցաւ Արաքսը, որի յորձանքն, անշուշտ, յորդացաւ ողորմելի հայ աղջիկների, երեխաների, պատանիների արտասուքով ու արիւնով:»

Ջուղայեցիների գաղթականութիւնն ընդհանուր ժողովուրդի այդ մեծ տարագրութիւնից առանձին կատարուեց, մի քանի օրից յետոյ: Շահաբբաս յանձնեց վրացի իշխան Թահմազ Ղուլի Բէգին, որ պատանդ էր Պարսից մօտ և ուրացել էր քրիստոնէական հաւատը, չուեցնել Ջուղայեցիներին: Գալով Ջուղա, մունետիկների ձեռքով հրատարակեց Շահի հրամանն և ստիպեց անմիջապէս չուել. Ջուղայեցիներն երկար աղաչանքներով և թանկագին ընծաներով հազիւ կարողացան համոզել նրան Յօր ժամանակ տալ իրանց: Որովհետեւ բեռնակիր անասունների թիւը շատ քիչ էր և բաց ի դրանից, Ջուղայեցիները յոյս ունէին վերագառնալու, ուստի իրանց հետ վերցնելով թանկագին իրերը, մնացած գոյքը գաղեցին և թաղեցին զանազան տեղերում: Ամբողջ ժողովուրդն հաւաքուելով մի տեղ, Ս. Աստուածածնի եկեղեցու առաջ,

լացով, որբով հրաժեշտ տուեց իր հայրենիքին եւ քահանաներն առնելով եկեղեցիներէ բանալին, ձգեցին Երասխի մէջ, նրա պահպանութեան յանձնելով իրանց հայրենիքը: Երբ Թահմազ Ղուլի Բէգը բերեց հասցրեց Զուղայեցիներին Երասխի ափը, Շահի բանակը, վերջինս մեծ կարեկցութիւն ցոյց տուեց նրանց եւ հրամայեց զօրքին օգնել ու ձիերով եւ ուղտերով անվնաս փոխադրել նրանց գետի միւս ափը. ապա իմանալով, որ Թահմազ Ղուլի Բէգն չէ կործանել Զուղայի շինութիւնները, Շահը բարկացաւ եւ հրամայեց անմիջապէս վերադառնալ ու աւերել. շուտով կատարուեց այդ հրամանն եւ 15 օր ամբողջ հրդեհն աւերում էր Զուղայի շինութիւնները: Գրանով Շահաբբաս կամեցաւ միանգամայն կտրել ժողովրդի յոյսը՝ վերադառնալուց:

Ինչպէս երեւում է, Զուղայեցիներն առանձին նեղութիւն չկրեցին տարագրութեան ժամանակ. նախ՝ որովհետեւ Շահն առանձին խնամք էր ցոյց տալիս նրանց, երկրորդ՝ հարուստ լինելով, նրանք ընծաների եւ փէշքաշների միջոցով կարող էին ազատ մնալ հարստահարութիւնից. վերջապէս, այն հանգամանքը, որ դեռ մինչեւ այսօր՝ Նոր-Զուղայում գտնուում են մեծածաւալ եւ թանկագին ձեռագիրներ, որոնք, անկասկած, Զուղայեցիները բերել են իրանց հետ, պարզ ցոյց է տալիս, որ նրանք իրանց հետ կարողացան տեղափոխել եթէ ոչ իրանց ամբողջ գոյքն եւ հարստութիւնը, գոնէ նրանց մի նշա-



նաւոր մասը: Մնում է մի հարց լուսաբանել-  
 ճիշդ որ ժողովուրդը սարսափելի նեղութիւններ  
 կրեց եւ մեծ զոհեր ու վնասներ ունեցաւ Երասխն  
 անցնելուց: Եթէ հաւատանք Առաքել վարդա-  
 պետին, այո, ինչպէս եւ նկարագրեցինք, բայց  
 կան եւ ուրիշ պատմաբաններ, որոնք ուղղակի  
 ասում են, թէ ոչ մի վնաս չեղաւ: Նոր-Ջու-  
 ղայի Ամենափրկչի վանքի մի ձեռագիր Աւե-  
 տարանի յիշատակարանի մէջ, ահա ինչ է  
 գրուած:

«Ի դառն եւ ի վշտաշատ ժամանակիս որ ոչ  
 գրով կարեմք բաւել եւ կամ ծանուցանել զե-  
 ղեալ շարին... եւս առաւել տառապեալ ազգիս  
 մերոյ Հայոց, որ էր պատճառն այս զի ի թուա-  
 կանից ՌԼԲ ամին ելաւ Ֆարհատ փաշայն ի Ստամ-  
 պուլու հրամանաւ Սուլթան Մուրատին իջաւ ի  
 քաղաքն Երեւան, եւ փախոյց Տէր երկրին զՄահ-  
 մադ խանն Պարսից թագաւորութեան Խուգաբանդ  
 Հասին... ապա ի թուականիս ՌԾԲ ելաւ Ա-  
 պասազան՝ որդի Խուգաբանդ Հասին վրէժխնդիր  
 իւր հայրենական աշխարհին, յաւուրս աշնանային  
 յանկարծ իջաւ ի Թավրեզ, եւ զաւուրս տասն եւ  
 հինգ կոտորեաց զազգս Օմարին, եւ էառ զբերդն:  
 Անտի իջաւ ի Նախշուան, զայն եւս էառ օր մի, եւ  
 ապա եկեալ ի վերայ Երեւանայ բերդին. եօթն  
 ամիս պատերազմեցաւ բնդ նոսա եւ ապա կոտո-  
 րեաց զամենեւեան եւ էառ զբերդն: Յետ այնորիկ  
 զնաց մինչեւ ի սահմանս Արսւայ բերդին, ելին  
 զօրքն Պարսից աւերեցին զբազում երկիրս՝ եւ  
 գերեցին բազում Քրիստոնեայս յաւելի քան զեր-  
 կու բիւրս: Յայնժամ ելաւ Զղալի որդին Ստամ-  
 պուլու՝ անհուն եւ անհամար հեծելովք ի վերայ  
 Հասարբասին: Յորժամ զբազմութիւն նոցա ետես՝  
 հնարս իմացաւ եւ արար հրաման աւերելոյ աշ-

խարհիս Հայոց: Ելաւ Ամիրգունախանն բաղում  
 զօրօք եւ եհան զամենեսեան ի տանէ, եւ ի հայ-  
 բնեաց, Հայք՝ Տաճիկք՝ Շիրակ վանայ մինչեւ ի  
 դաւառս Գողթան: Այն մեզ թէ յայնմ աւուր  
 նեղութիւնն ով կարէ պատմել, թէ որպէս անու-  
 դորմաբար տանէին զազգս Հայոց. ոչ թողութի  
 որդիս բարձցէ (?) զձերացեալ ծնողն, կամ առցն  
 մարք զմանկունս իւրեանց: Այնչափ շտապաւ  
 վարէին, որ ոչ հայր՝ զորդին գտանէր, եւ ոչ  
 եղբայր՝ զեղբարս. եւ ոչ այր զկին իւր, եւ ոչ մայր  
 զգուստրն իւր. բաղումք ծերք եւ տկարք կոխան  
 եղեալ մեռանէին. եւ լինէին գէշ գազանաց: Յոր-  
 ժամ հասան ի մեծ գետն Երասխ, եկեալ խա-  
 պարս, թէ ահա հասին զօրք Օմարին, որ ոչ գոյ  
 հնար զերձանելոյ: Յայնժամ ահ մեծ անկաւ.  
 ամենեքեան թափեցան ի ջուրն եւ անցին ի միա-  
 սին, թագաւորն եւ զօրք իւր եւ Ռամիկքն, եւ ոչ  
 դք վրասեցաւ խնամովն Աստուծոյ: Աւերեցին զգիւ-  
 ղաքաղաքն Զուղայ որ էր գեղեցկաշէն եւ հիա-  
 նալի քաղաք. . . .»

Հաւանական է սակայն, որ խօսքը վերա-  
 բերում է Զուղայեցիներին, որովհետեւ Առաքել  
 վարդապետի ասածներն հաստատում են եւ  
 ուրիշ ականատես պատմաբաններ: Աւերոյիչեալ  
 վանքի ձեռագիրների մէջ մնացել է մի ժամա-  
 նակակից աշուղի յօրինած երգը, որ ահա.

«Եկայք Աղամայ որդիք ժողովեալ ի մի նստենք  
 ես ձեզ պատմեմ լալազին զողք եւ զկոծն Հայոց ազգին:  
 Ի Հայոց հազար թուին եւ յիսուն երեք յաւելին:  
 Ելք աւելեաց պատկերին մուտ յամսեսանն Նաւասարդին:  
 Խաւար տիրեաց մեր Ազգին՝ բարկացաւ մեր Տէրն  
 երկնային.  
 Որպէս կարկուտ ի յամպէն՝ նոյնպէս զօրքն Պարսից  
 իջին:

Գլուխ զօրաց էր նոցին՝ Շահաբաս Խուղարանդ որդին,  
 Հազարապետ ընդ նոսա՝ Հէրեւան քաղաքն իջին:  
 Չորս կողմս վրան դրին զաւագ բերդն պաշարեցին,  
 Եօթն ամիս սխլաթ տուին՝ եւ եօթն օր վէր անցուցին:  
 Յորժամ տարին բոլորեցաւ՝ բօթատուն էրեկ կան-  
 գնեցաւ,

Թէ զՋղալօղի կասնն վերայ քեզ կոիւ շարժեցաւ:  
 Շահաբասն ուրախացաւ՝ իւր զօրաց թիւն շիմացաւ,  
 Սլե՛ն ու զբա՛ն հազաւ՝ փողոստէգիմս զգեցաւ:  
 Թեմս նմայիւ կապեաց՝ խաներուն խալաթ ուղար-  
 կեաց,

Վաթսուն հազար ծիաւոթ՝ առ իւրեան զօրքն ժողովեաց:  
 Ժողովեաց Սուլթանն ու Խանն որք եկան նստան առ  
 արքայն,

Երեք օր երեք գիշեր՝ տրտմութեամբ նստան ի դիվան:  
 Մին սուտ զբարան գտան. նայեցուց նշան աւերման,  
 Այնպիսոյ աշքն կուրանայ՝ ինքն անկանի ի խոր  
 զքնտան:

Կրկին յիտ հարցմունք ելան՝ նա էարբ զարին ամենայն.  
 Ասաց աւերեցէք զերկիրդ՝ ու տարէք զմարդն Աս-  
 պահան:

Այն... առջայն՝ իւր զօրացն եհան հրաման,  
 Ի Աւույ քաղաքէն հետ՝ աւերեցէք մինչեւ Նախչուան:  
 Յորժամ առին հրաման՝ ազգն մահմետական,  
 Շարաթ էր լուս կիրակի՝ որ կրակ տվին Հարեւան:  
 Սարէրն ամին սուգ մտան՝ ծով եւ գետ ի լաց շար-  
 ժեցան,

Շատ հարսն եւ աղջիկ տարան ի քաշան եւ ի ըսպահան:  
 Շատ նազելի ծոթ պատկեր՝ սէվադէմ պարսից ձեռք  
 անկան,

Շատ զօրաւորք կտիչ նետողաց ազգէն սպանան:  
 Շատ զեղեցիկ ծոթ պատկեր՝ կապիք մանկունք յոտ-  
 նատակ թաւալմամբ մեռան:

Շատոնք արաստըն ընկան՝ ջրախեի առ Աստուած փո-  
 խեցան:

Աստ ըսվորսէ բիբաֆայ, ձեզ վկայ բերեմ զՋուղայ,  
 Փոխան սաղմոսաց երգոց՝ բու աւերակի ծայն կու գայ:  
 Զգեղեցիկ ծոթ պատկերններն որ ինամով դու զնոսա անար,  
 Տարան ըսպահան քաղաքն՝ խառնեցին ի պիղծ թաթն  
 որ կայր:

Այս երգի մէջ աչքի է ընկնում մի հանգամանք եւս. աշուղը Հայերին գաղթեցնելու պատճառը վերագրում է նրան, որ մի ֆալշի կամ հարցուկ խորհուրդ տուեց Շահաբբասին վտարել Հայերին: Արովհետեւ Հայերի գաղթականութիւնն առաջ բերող պատճառների քննութիւնը շուտով մեր քննութեան առարկայ պէտք է լինի, ուստի մենք հարկաւոր համարեցինք եւ աշուղի այդ կարծիքի վրայ ուշադրութիւն հրաւիրել:

Մի այլ ականատես, Հին-Ջուղայի մօտի Շամբ գիւղի բնակիչ եւ ՆախաՎկայ վանքի միաբան Ստեփան վարդապետն ահա ինչ ողբ է յօրինել Հայերի գաղթականութեան առիթով.

«Աիսոս քեզ Հայոց խնդօիկ ժողովուրդ,  
Ցիրուցան ելար անմեղ անխորհուրդ.  
Գերի գնաման ար դէպ ի Խորասան,  
Քաղցած ու ծարաւ, տկլոր թշուառական:

Խարիւր ու խազար ցաւի դիմացար,  
Ձեր քաղցրիկ երկրէն ոտ դուրս չըզար.  
Խիմի ձեր խօր մօր գերեզման թողար,  
Տըներն ու ժամերը ուրիշի տուար:

Էս սիրուն դաշտերն, մեծ մեծ քաղքըններն,  
Քաղցրիկ ջրերն, ձեր շէն գեղերն,  
Ո՛ւմն ար թողման դուր, որ գնաման ար.  
Էսպէս կընն որ մոռանում ար:

Վախում ամ էնպէս մտքերնուդ ընկնի,  
Խշքան որ ողջ ար մտքերնուդ չընկնի.  
Բարի ձեր որդւոց թողանց պատմեցէք.  
Էսպէս խայրենիքն քանդած թողեցիք:

Մասիսի անունն, Նոյայ տասանի,  
 Արարատ դաշտի, սուրբ Էջմիածնի,  
 Մեր խոր վերապի, սուրբ Գեղարդ, Մուղնի,  
 Զմոռանան մինչ ի օրն դատաստանի:

Աչքոս կուրանար, շինքս կոտրուէր,  
 Խնդճ շայաստան, քեզ էսպէս շքտեսնէր.  
 Թէ մեռած էի, ինձ երանի էր,  
 Ըան թէ կենդանի՝ աչքոս քաց տեսնէր:»

Այս բոլորից կարող ենք այն եզրակացու-  
 թիւնն հանել, որ գաղթող ժողովուրդը, մա-  
 սամբ, մեծ տառապանքներ, նեղութիւններ եւ  
 վնասներ կրեց գաղթականութեան ընթացքում,  
 բայց Զուղայեցիները, համեմատաբար, քիչ  
 վնասներ կրեցին եւ քիչ հարստահարութիւն-  
 ների ենթարկուեցին:՝

Մեզ հարկաւոր է այժմ բացատրել այն  
 պատճառները, որոնք առաջ բերին 1605ի մեծ  
 գաղթականութիւնը, ինչպէս եւ նկարագրել  
 Շահաբբաս Ա.ին, որ հանդիսանում է մի խոշոր  
 պատմական անձնաւորութիւն: Երկու խնդիր-  
 ներն եւս բարդ են, որովհետեւ պատմագիր-  
 ների կարծիքները նրանց մասին շատ հակասա-  
 կան են:

Արեւելքում, մահմետական ազգերի մէջ  
 երկու թագաւորներ այնքան հերոսացած են, որ

1 Հայերի այս մեծ գաղթականութիւնն եւ նրա  
 աղէտները նկարագրել է մի ականատես վկայ՝ Օգոստի-  
 նեան կարգի կրօնաւոր Անտոն Եպիսկոպոս Գուվեա եղբայրը  
 (frère Antoine de Gouvea) որ այդ ժամանակ Սպանիայի  
 Փիլիպպոս Բ. թագաւորի կողմից ուղարկուել էր զեսպան  
 Շահաբբասի մտա: Գուվեայի գիրքը տպուած է Բուէնոս  
 1646ին:

Նրանց յիշատակը մինչև այսօր եւս թնդում է եւ բոլոր հէքեաթների ու զօրջների մէջ շարունակ լւում է նրանց անունը եւ գրեթէ առասպելական քաջագործութիւնները: Մինը Բաղդատի խալիֆայ շարուն-էլ-Ռաշիդն է, միւր՝ Շահաբբաս Ա.ը: Այսօր եւս ճանապարհորդելով Պարսկաստանում եւ Անդրկովկասում, Թիւրքաստանում, Աֆղանիստանում, Անդրկասպեան երկրում, որոնք Շահաբբասի ժամանակ Պարսկաստանի մասերն էին կազմում, կարող էք հանդիպել բազմաթիւ աւերակ եւ շատ տեղ դեռ կանգուն քարվանսարայների, կամուրջների ու մզկիթների, որոնք կոչւում են Շահաբբասի անունով: Աւանդութիւնը ժողովրդի բերանով ասում է, որ Շահաբբաս կառուցել է 1001 քարվանսարայ, 1001 մզկիթ, 1001 կամուրջ. թէ ինչու անպատճառ 1001 թիւն է գործածւում, չգիտեմ. բայց այսօր եւս Պարսկաստանում առանց այդ քարվանսարայների անկարելի կը լինէր ճանապարհորդել, մանաւանդ կարաւանների համար: Շահաբբաս կառուցել է այդ քարվանսարայները կարաւանների իջեւանի համար, առեւտրական յարաբերութիւնները դիւրացընելու նպատակով:

Առհասարակ բոլոր մահմետական, թէ՛ ժամանակակից եւ թէ՛ ոչ-ժամանակակից պատմագիրները վերին աստիճանի գովասանքով են խօսում Շահաբբասի մասին, իբրեւ մի աշխարհաշէն, իմաստուն եւ արդար թագաւորի, որ իր մեծ գործերի համար «Ջաննէթ-մաբեան»

(գրախտարնակ) եւ «Մեծ» մականուան է արժանացել: Գեո Տէքեաթներից գիտենք, թէ ինչպէս Շահաբբասը գիշերները ծպտեալ իր վէզերներէ հետ շրջում էր քաղաքներն եւ գիւղերը՝ ժողովրդի վիճակին վերահասու լինելու համար, ինչպէս անում էր Հարուն-էլ-Ռաշիդը իր Զաֆար վէզերի հետ: Սակայն Առաքել վարդապետը նկարագրում է նրան բոլորովին այլ գոյներով, իբրեւ «անդնդային վիշապ, օձի բնաւորութիւն ունեցող, իբրեւ մի աշխարհաւեր եւ բռնակալ մարդ եւ խիստ ֆանատիկ մահմետական ու հալածող քրիստոնէութեան»: Ներկայ դէպքում մի քիչ սկեպտօքէն պէտք է վերաբերուել թէ՛ Առաքել վարդապետի եւ թէ՛ մահմետական պատմագիրների կարծիքին. առաջինը՝ հայ ազգին հասած աղէտների պատճառով կարող է դառնացած լինել Շահաբբասի դէմ եւ հետեւաբար ոչ անաչառ, իսկ մահմետական պատմագիրները՝ ոգեւորուած լինելով կրօնական զգացումներով, նոյնպէս չեն կարող անաչառ պատմիչ հանդիսանալ եւ միակ այն հանգամանքը, որ Շահաբբաս ջարդել եւ կոտորել է գեաւուրներին, բաւական է մոռացընել տալու նրա բոլոր պակասութիւնները: Գիմենք ուրեմն նաեւ ուրիշ պատմագիրներին:

Մի նոր պարսիկ պատմաբան, որի երկասիրութիւնները դեռ անյայտ են մնացած, բայց որին կարելի է կատարելապէս հաւատ ընծայել, որովհետեւ նա իր խօսքերն հիմնում է դիւա-

Նական գործերի եւ թղթերի վրայ, հանգուցեալ Նասրէզգին Շահի հօրեղբայր՝ մի քանի տարի առաջ Շուշի քաղաքում վախճանուած արքայազն իշխան Բէհման Միրզան, որդի հռչակաւոր Արրաս Միրզա գահաժառանգին, իր մի ձեռագիր հեղինակութեան մէջ, որ կոչուում է «Շուքր-նամէ» եւ որը պարունակում է իր մէջ Կովկասեան եւ Արարատեան երկրի Ե. դարեայ պատմական անցքերը համառօտ կերպով, ջինգիղ խանից սկսած մինչեւ Աղա՛ Մահոմէտ Շահ Ղաջարը, հետեւեալ կերպով է խօսում Շահաբբասի բնաւորութեան մասին:

«Կարդալով Շահաբբասի ձեռքով կատարուած այս կտորածի, գերեվարութեան եւ աւարառութեան նկարագրութիւնը, որ նա անմեղ արարածներին կրել տուաւ՝ հակառակ խղճմտանքի եւ զթասիրութեան, բնթերցողները շատ պիտի դարմանան. սակայն եթէ մինը ծանօթ լինի նրա բուն բնաւորութեան եւ եպերելի ունակութիւնների հետ, երբեք չպիտի դարմանայ նրա այդ արարքի վրայ, որովհետեւ Շահաբբաս Մեծը մի թագաւոր էր խիստ անգութ, խստասիրտ, երգմնադուժ եւ դաշնազանց, կասկածոտ, ըստ երեւոյթին թէեւ հաճոյատեօիլ, բայց ի ներքուստ ժանտ. ինչպէս որ իր թագաւորութեան սկզբում իր հայր Սուլթան Մահմադին ինն տարի բանտարկեալ պահեց, մինչեւ որ բանտի մէջ մեռաւ. յետոյ իր երկու անմեղ հարազատ եղբայրներին, որոց մինը — Թահմասպ Միրզան 12 տարեկան էր — կուրացրնելով, «Ալամութ» բերդում, որ Մազանդարանի եւ Ղազվինի մէջակողմն է՝ բանտարկեց եւ այնտեղ նրանք թշուառ կեանք վարեցին դեռ 30 եւ 35 տարի, մինչեւ մահն ազատեց անգութ եղբօրից:



“Ինքն Շահաբբաս երեք որդի ունէր. ան-  
 դրանիկ Մահմադ Բաղը Միրզային մի օր առանց  
 որ եւ է պատճառի, մի ակնարկով սպաննել տուաւ.  
 մի քանի տարուց յետոյ, դարձեալ առանց օր եւ է  
 պատճառի, միջնակ որդուն՝ Սուլթան Մահմադ  
 Միրզին հրամայեց կուրացընել եւ բանտարկել. մի  
 փոքր ժամանակից յետոյ էլ՝ Իմամդուլի Միրզա  
 կրտսեր որդուն կուրացընել տուաւ: Այժմ թող  
 ընթերցողներն նրա այս երեք անօրինակ անգթու-  
 թեան եւ խտտարտութեան օրինակներից եզրու-  
 կացընեն թէ ինչ տեսակ բնաւորութեան տէր  
 մարդ էր Շահաբբաս. արդեօք մի անձն, որ իր  
 հարազատ ծնողի, առ որ պէտք է ունենայ ան-  
 սահման երախտագիտութիւն, իր հարազատ եղ-  
 բայրների եւ իր մէջքից դուրս եկած անմեղ փո-  
 քրահասակ զաւակների հետ, որոնք տժգոհու-  
 թեան օր եւ է առիթ չեն տուել նրան, այսպէս  
 անգթօրէն վարուէ, ուրեմն օտար մարդկանց վե-  
 րաբերմամբ ինչպէս կը վարուէր:”

Բէհման Միրզայի ասածները հաստա-  
 տում է եւ Ադամ Օլէարիուս եւ պատմում է  
 աւելի մանրամասն, թէ եւ անունների մէջ տար-  
 բերութիւն կայ:

“Շահաբբասն երեք օրինաւոր կին ունէր եւ  
 չորս կամ հինգ հարիւր հարձ: Այդ երեք ամուս-  
 նութիւնից երեք որդի ծնուեց, Սէֆի Միրզա, Խօ-  
 դաբանդա Միրզա եւ Իմամ Գուլի Միրզա: Աերջին  
 երկուսին աչքերը հանել տուեց կրակով եւ փա-  
 կեց նրանց Ալամութ բերդում: Անդրանիկ որդին  
 մի քրիստոնէայ վըացի ստրկուհուց էր ծնուած.  
 այդ իշխանը տեսնելով մի գեղեցիկ երիտասարդ  
 շէքքէզ աղջիկ, որ Շամսխեցի մի վաճառական  
 ընծայ էր արել իր հօրը, սիրահարուեց եւ խնդրեց  
 թագաւորից իրան տալ կնութեան համար: Թա-

գաւորը, որ սիրում էր երիտասարդ իշխանին, համաձայնուէց. այդ ամուսնութիւնից ծնուէց Սան-Միրզան, որ ապա թագաւորեց Շահ Սէֆի անունով:

«Շահաբբասի խիտ, անգութ եւ բռնական թագաւորութիւնը սկսեց անտանելի դառնալ տէրութեան մեծամեծներին. նրանք մի տոմսակ ձգեցին Սէֆի Միրզայի սենեակը, որով յայտնում էին նրան, որ իրանից է կախուած հօրը յաջորդել, եւ եթէ համաձայնի կատարել իրանց յղացած դիտաւորութիւնը, նրանք հարկաւոր միջոցները կը հայթայթեն իրան:

«Սէֆի Միրզան զգուէց այդ առաջարկութիւնից, որով կամենում էին մեղսակից անել իրան հօր սպանութեան մէջ. նա տարաւ տոմսակը հօրն ու աշխատեց հաւատացնել նրան իր անկեղծութեան ու կատարեալ հնազանդութեան մասին: Շահաբբասը՝ ի բնէ կասկածոտ եւ անգութ, առերեւոյթ ցոյց տուէց որդուն, որ շատ գոհ է նրա վարմունքից եւ գովեց նրա որդիական սէրը. բայց այնպիսի սարսափի մէջ ընկաւ, որ այլ եւս հանգըստութիւն չունէր եւ գիշերն երեք շորս անգամ փոխում էր սենեակը, ու վերջն եկաւ այն եզրակացութեան, որ միայն որդու սպանութեամբ կարող է հանգստութիւն գտնել: Եւ որոշեց մեռցնել տալ նրան: Այդ պաշտօնն առաջ նա յանձնեց իր զօրքերի ընդհանուր հրամանատար Աբրձուխայ Խանին, որ ծագումով հայ էր, քրիստոնէայ ծնողների զաւակ, բայց փոքր ժամանակ գերի էր ընկել թաթարների ձեռքը եւ թլփատուելով, ծախուել էր Շահին. սա այնքան յարգում էր նրան, որ կանչում էր միշտ «աղա» եւ նրան էր յանձնել ամբողջ Պարսկաստանի սպարապետութիւնը: Սակայն պատկառելի ծերունին գրեց թուրք թագաւորի առաջ եւ հրաժարուէց, ասելով, որ աւելի

լաւ է համարում հազար անգամ զրկուել կեանքից, քան ձեռները թաթախել իր տիրոջ որդու, դահածաանգի արեան մէջ:

«Շահարբան այն ժամանակ առաջարկեց սպանութիւնը Բէհրուզ բէկին, որ ընդունելով, զնաց դտաւ Սէֆի Միրզային՝ երբ սա բազմիբից դուրս էր գալիս մի ծառայի հետ, եւ բռնելով նրա ջորու սանձից, ասաց. «վէր եկ, Սէֆի Միրզա, թագաւորը, հայրդ կամենում է, որ դու մեռնես:» Այս ասելով, նա վէր բերեց նրան ջորուց. խեղճ իշխանը միացրնելով ձեռները, բարձրացրնելով աչքերը դէպ ի երկինք, աղաղակեց. «աւաղ, Աստուած իմ, ի՞նչ եմ արել այդպիսի պատժի արժանանալու համար. բայց եթէ այդպէս է հաճոյ Աստուան, թող կատարուի նրա եւ թագաւորի կամքը:» Խանջարի երկու հարուածով Բէհրուզ բէկը սպաննեց նրան եւ դիակը քաշ տալով, ձեռք մի ծահճի մօտ: Սէֆի Միրզայի մայրը, թագուհին, լսելով որդու սպանութիւնը, այնքան վշտացաւ եւ զայրացաւ, որ վազեց թագաւորի սենեակը, ցատքեց նրա երեսին եւ սկսեց բռունցքներով խփել. թագաւորը, արտասուքն աչքին, պատասխանեց. «Ի՞նչ անէի, ինձ խորհուրդ էին տուել, որ նա կեանքիս դէմ դաւադրութիւն է սարբում. այլ եւս ճար չկայ. արդէն եղածն եղած է:» Շահն իսկոյն զղջաց. տասն որ ու դիշեր փակուեց մի մութ սենեակում, եւ շարունակ լալիս էր. մի ամբողջ տարի նա սուգ էր պահում, եւ մինչեւ կեանքի վերջը ոչ մի զարդարանք չկրեց. որդու սպանութեան տեղում նա մի ապաստանարան շինեց խեղճերի համար: Նա թէեւ Բէհրուզ բէկին վարձատրեց, ինչպէս խոստացել էր, Ղազվինի Գարդա կարգելով, խանութիւն տալով, բայց մտադիր եղաւ պատժել նրան՝ յանցաւոր հնազանդութեան համար: Հէնց որ առաջին անգամ եկաւ Ղազվին, նա հրամայեց Բէհրուզ բէկին զնալ կտրել իր

սեփական ձեռքով որդու գլուխն եւ բերել իրան: Նա հնազանդեց: Շահարբասը տեսնելով նրան, որ գալիս էր իր որդու գլուխը սինու վրայ դրած, հարցրեց նրան, ինչպէս էր զգում իրան: Բէհհրուզ պատասխանեց. «Աւաղ, արքայ, ինչ ասեմ. ես ստիպուեցայ իմ սեփական ձեռքով սպաննել իմ միակ զաւակս, որին աշխարհումս ամէն բանից աւելի էի սիրում. այդ ցաւից ես կը մեռնեմ:» Թագաւորը պատասխանեց. «Գնա, Բէհհրուզ, հասկացիր այժմ, թէ ինչ ցաւ եւ քաշեցի, երբ դու իմ որդուս սպանութեան լուրը բերիր: Բայց մխիթարուիր, իմ եւ քո որդին այլ եւս չկան, ուրեմն այդ բանում հաւասար ես քո տիրոջ, թագաւորի հետ:»

«Շահարբաս մեռաւ 1629ին, 63 տարեկան, 45 տարի թագաւորելուց յետոյ: Պարսիկները յարգում են այդ թագաւորի յիշատակն եւ համարում են, որ Պարսկաստանը շատ դարերից ի վեր այդպիսի մեծ թագաւոր չէ ունեցել: Եւ իրօք, եթէ նրա կեանքից հաննք անգթութեան այն օրինակները, որոնց մասին վերելում քննեցինք, ստիպուած կը լինինք խոստովանել, որ եթէ նա չէ կարող դասուել բարի թագաւորների շարքում, գոնէ նա տեղ պէտք է գտնի այն ամենամեծ թագաւորների շարքում, որոնց մասին խօսում է այնքան պատմութիւնը: Նա իմաստուն էր եւ քաջ, նա բարձրացրեց Պարսկաստանի փառքն իր տարած մեծ յաղթութիւններովն եւ բնդարձակեց տէրութեան սահմանները: Օգոստինեան կարգի կրօնաւորներն ինձ ասում էին, որ նա ամենեւին ատելութիւն չուներ դէպ ի քրիստոնէական կրօնը, այլ բնդհակառակն նա յաճախ գալիս էր իրանց վանքը, իր հետ ծաշի էր նստեցնում, իրանց «տէր սղորմեան» ձգում էր վիզը եւ հառաչում էր ատելով, թէ չգիտէ, ինչ կրօն դաւանէ:

«Նա շատ զգայուն էր դէպ ի աղքատների թշուառութիւնն եւ անանձին խնամք էր տանում

նրանց վրայ. այդ պատճառով նա սուփորութիւն ունէր մտնել քաղաքը՝ գիւղը՝ ծպտեալ, դնալ շուկան, տեսնել շափը, կշիւր, քննել մի եւ հացի որակութիւնն, եւ սաստիկ պատժել տալ խարդախներին: Մի անգամ Արդարիւ գալով, նա ձգել տուեց հնոցի մէջ՝ մի հարուստ հացալճառի, որ մերժել էր աղքատներին հաց ծախել, ասելով թէ պէտք է հացը Շահաբբասի եւ նրա զօրքի համար պահէր: Նա ատում էր կաշառակեր դատաւորներին եւ սաստիկ պատժում էր նրանց:՝

Շահաբբասի մասին մեծ գովասանքով խօսում է եւ Շարդէն ասպետը, որ երկու անգամ ճանապարհորդեց Պարսկաստան 1666ին եւ 1671—74ին, ուրեմն Հայերի գաղթականութիւնից 62 տարի յետոյ: Նա ասում է, որ Շահաբբասը մի արդարադատ թագաւոր էր, որ ջանք էր անում միայն երջանիկ շինել իր ժողովուրդը, սաստիկ պատժում էր կաշառակեր կառավարիչներին, հարստահարիչներին, բայց նա եւս հաստատում է, որ սպաննել տուեց իր անդրանիկ որդուն, գահաժառանգին՝ նախանձից զրդուած, թէեւ յետոյ սաստիկ փօշմանեց եւ իր յանցանքը քաւելու համար իրան գահաժառանգ կարգեց սպաննուածի որդուն, իր թոռան, եւ որպէս զի իր միւս երկու որդիները չյափրշտակեն գահն իրանց եղբօրորդու ձեռքից, նա կուրացընել տուեց իր այդ երկու որդիներին, որովհետեւ պարսկական օրէնքով կոյրը չէ կարող թագաւոր լինել:

Տեսնենք այժմ ինչ պատճառներ առաջ բերին Հայերի գաղթականութիւնն. եւ այդ

քննութեան ժամանակ մեր առաջ դարձեալ  
երեւան կը գայ Շահաբբասի անձնաւորու-  
թիւնը:

Կան փաստեր, որոնք հաստատում են, թէ  
Շահաբբաս սկզբում այն դիտաւորութեամբ  
չեկաւ Հայաստան, որ գաղթեցընէ բնակիչներին,  
այլ միայն Օսմանցիներին երկրից դուրս քշելու  
նպատակով եկաւ: Հայերին Պարսկաստան գաղ-  
թեցընելու միտքը նրա մէջ ծագեց Հայաստան  
գալուց յետոյ. նա կամենում էր նախ իր երկիրն  
ազատել Օսմանցիներից, երկրորդ վաճառակա-  
նութիւնն եւ արուեստները ծաղկեցընել. ոյժ  
չունենալով դիմադրել Օսմանցիներին, նա մտա-  
ծեց աւերել երկիրը, որպէս զի նրանք այլ եւս  
ոչ մի հրապոյր չգտնելով՝ թողնեն հեռանան,  
իսկ վաճառականութիւնն եւ արուեստները ծաղ-  
կեցընելու համար, նա շինեց բազմաթիւ քար-  
վանսարայներ, կայարաններ. եւ ապա նրա սրա-  
տես աչքը շատ շուտով նկատեց, որ վաճառա-  
կանութեան ընդունակ տարրը Հայերն են եւ  
նրանք կարող են իր նպատակն իրագործել. այս  
պատճառով նա որոշեց Հայերին տեղափոխել  
Պարսկաստանի խորքը: Եթէ ենթադրենք, որ նա  
գաղթեցրեց Արարատեան Հայերին միայն այն  
նպատակով, որ Օսմանեան զօրքը պաշար եւ ու-  
տելիք չգտնէ, ոչ եւս պատսպարան, այն ժա-  
մանակ հարկ չկար Ատրպատականի Հայերին եւս  
վարել Սպահան, Մազանդարան եւ այլն, երբ այդ  
երկրից արդէն Օսմանցիները հեռացել էին:  
Կեր կարծիքով, Հայերի տեղափոխութեան

գլխաւոր պատճառն այն էր, որ Շահաբբաս կամենում էր ծաղկեցընել իր երկրում վաճառականութիւնը, արուեստները, իսկ այդ գործը հնարաւոր էր միայն Հայերի ձեռքով: Եւ այդպէս էլ եղաւ. մենք յետոյ կը տեսնենք, թէ շնորհիւ Հայերի ինչպիսի մեծ բարգաւաճման հասաւ վաճառականութիւնը Պարսկաստանում, ինչքան մեծ համբաւ ստացաւ նա համաշխարհային շուկայում. մենք կը տեսնենք, թէ ինչպէս Շահաբբասն ամէն կերպով պաշտպանում էր Հայերին, պարգեւում էր նրանց զանազան առանձնաշնորհութիւններ, ազատում էր հարկերից, ապահովում էր նրանց գոյքն. եւ այդ պաշտպանութեան շնորհիւ Հայերը շատ շուտով հարըստացան եւ ձեռք ձգեցին բոլոր Պարսկաստանի շնորհաստանի, Միջին Ասիայի վաճառականութիւնը:

Ահա ինչ է գրում Շարդէն ասպետը:

“Այս քաջ եւ իմաստուն թագաւորը նկատելով, որ Օսմանեան մեծ զօրքերը, որոնք իւրաքանչիւր տարի ասպատակում էին իր երկիրը, մասնաւորապէս իրենց սնունդը գտնում էին Հայոց հողում, գնաց եւ իր զօրքով վտարեց Երեւանի, Նախիջևանի, Զուլֆայի (Երասխի վրայ հիմնուած քաղաքներ) եւ ամբողջ Բարձր-Հայաստանի Հայերին, որպէս զի այդ երկիրը բոլորովին անմարդաբնակ չինէ, եւ տարաւ նրանց իր մայրաքաղաքը, իբրեւ ամենընդունակ հպատակներ՝ առեւտուր անելու համար, թէ թուրքերի եւ թէ քրիստոնեաների հետ, որովհետեւ այդ Հայերը վերջիններից այնպէս աւուուած չէին ինչպէս Պարսիկները, լինելով համակրօն: Շահաբբասն այդ ժամանակ հաստատապէս

որոշել էր վաճառականութիւնը հաստատել՝ իբրև միակ միջոց հարստացրնելու եւ ծաղկեցրնելու իր պետութիւնը: Նա տուեց Հայերին առաջ հող՝ բնակութիւն հաստատելու համար, յետոյ հայ-թայթեց նրանց կարելոր օգնութիւնը. բայց աւելին եւս արաւ. նա տուեց ցանկացողին գրամագլուխ կամ արծաթով կամ ապրանքով, որպէս զի դնան առեւտուր անեն Եւրոպայում եւ Հնդկաստանում. եւ այդ ձեռնարկութեան մէջ թաղաւորն այնպիսի հիանալի աջողութիւն ունեցաւ, որ նրա մահից յետոյ, Նոր-Զուղայում շատ վաճառականներ կային, որ երկու միլիոն կարողութիւն ունէին:

Մի ուրիշ տեղ, Շարգէն խօսելով Հին-Զուղայի աւերման պատճառների մասին, ասում է:

«Շահարբաս աւերեց Զուղան, նոյն պատճառներով, ինչ պատճառներով աւերեց Նախիջևեանն եւ Հայաստանի միւս տեղերը, որոնք մի եւ նոյն գծի վրայ էին, որպէս զի թուրք զօրքերին պաշարից զրկէ: Այդ նուրբ քաղաքագէտն եւ մեծ հրամանատարը տեսնելով իր ոյժերն անհասար իր թշնամու հետ, եւ մտածելով այն միջոցների վրայ, որոնք կարողանային արգելել նրան վերադառնալու՝ ամէն տարի Պարսկաստան նուաճումներ անելու, եւ պահպանելու, ամենալաւ միջոցը տեսաւ, որ անապատ դարձրնէ այն երկիրները, որ գտնւում են Երզրումի եւ Թաւրիզի մէջ տեղ, Երեւանի եւ Նախիջևեանի գծի վրայ. որ այն ճանապարհն էր, որ սովորաբար բռնում էին Տաճիկներն, եւ որտեղ նրանք ամրանում էին, որովհետեւ այդտեղ գտնւում էին բաւականաչափ սնունդ իրանց զօրքի համար: Ուստի այդ երկրների բնակիչներին եւ արջառք տարաւ, աւերեց ամէն տեսակ շինութիւն, կրակ տուեց բոլոր դաշտերն եւ ծառերը. մինչեւ անգամ շատ



ազբիւրներ թունասրեց, ինչպէս վկայում է պատմութիւնն, եւ աջողեց<sup>7</sup> :

Մի երրորդ տեղ ասում է :

“Շահաբբաս Մեծի ժամանակ Պարսկաստանը սկսեց ծաղկել. նա մի արդարադատ թագաւոր էր եւ միայն ձգտում էր իր տէրութիւնը ծաղկեցընել ու իր ժողովուրդն երջանկացընել : Նա իր տէրութիւնը գաւա խիստ յօշոտուած եւ յափշտակուած, մեծ մասամբ աղքատացած եւ կողոպտուած : Բայց դժուար է հաւատալ, թէ նրա կառավարութիւնն ինչքան բարիք բերեց երկրին :”

Առաջ բերենք եւ Բէհման Միրզայի վկայութիւնը :

“Երբ որ Չղալ Օղլի սպարապետի գալստեան լուրն տարածուեց եւ նա սկսեց մօտենալ Երեւանին ու Նախիջևեանին, Շահաբբաս նկատելով, որ նրան դիմադրելու ոյժ եւ կարողութիւն չունի, մտածեց քշել Պարսկաստանի խորքերն Երեւանի, Նախիջևեանի եւ նրանց շրջակայ տեղերի բնակիչներին : Այդ բնակիչների մեծ մասը փճացաւ ծանապարհին, մանաւանդ Երեւանի եւ Նախիջևեանի Հայերի մեծ բաղմութիւնը հիւանդութիւնից ոչնչացաւ. նրանց քշելուց յետոյ Շահաբբաս հրամայեց, որ բոլոր արտերը հրդեհեն, այրեն, որպէս զի Չղալ-Օղլու զօրքը չկարողանայ պաշար գտնել :”

Ինչպէս տեսնում ենք, Բէհման Միրզան վաճառականութեան մասին ոչ մի խօսք չէ ասում :

Ադամ Օլէարիուս եւս ոչ մի խօսք չէ ասում գաղթականութեան եւ նրա պատճառների մասին, այլ միայն հարեւանցի յիշում է, խօսելով Ջուղայի մասին, թէ “Նոր-Ջուղայի

մնակիչները քրիստոնեայ-չայեր են, մեծ մասը վաճառական եւ շատ հարուստ, որոնց Շահար-բաս փոխադրեց Մեծ-Շայաստանից։

Նոր-Զուղայի երկհատոր պատմութեան հեղինակ Պ. Յովհան ԅարութիւնեան, ահա ինչ է ասում։

«Սա (Շահարբաս) ստացաւ զանուն քաջ աշխարհակալի եւ հանճարամտութեան, այլ յամենայնի ի նոսա առաջնորդէր իւր նրբամիտ հնարագիտութիւն։ Արպէս գործք նորա ապացուցանեն, լեալ է նա այր կորովամիտ քաղաքագէտ՝ օգտախրնդիր՝ եւ ի գործողութիւնս շրջահայեաց, եւ ըստ ժամանակին պարագայից յարմարեալ է զգործս իւր՝ ոչ եղեալ իւրում օգտի։ Ճանաչէր նա զազգ-չայոց՝ զգործունէութիւն, զժրաջանութիւն, զհանճարամտութիւն եւ զմտադիր հպատակութիւն նոցա, որոց վաճառականութիւնն նախանձելի արար զնոսա յաչս իւր . . . : Ասան որոյ վարեաց զժողովուրդս չայոց ի Պարսկաստան, զի որք երկրագործքն իցեն եւ շինականք զգաւառս եւ զգեօղս Պարսկաստանի ծաղկեցուցեն մշակական արհեստիւ, եւ որք երեւելիքն իցեն եւ վաճառականք՝ շահարեր տուրեւառութեամբք ճօխացուցեն զքաղաքս իւր՝ եւ ի համբաւի հարցեն զանուն Պարսկաստանի։

«Ի վարելն նորա զժողովուրդս չայաստանի, այն, ի գործ եղ զանյուր բռնաւորութիւնս բարբարոսականս, այլ այնորիկ եղեն ի պարտաւորութենէ գործոյն կատարման եւ ոչ ի հաճոյից իւրոց կամաց։ Իսկ մինչ ժողովուրդք չայոց հասուցեալ եղեն ի Պարսկաստանի սահմանս, տարածեաց առ նոսա զսէր եւ զգութ իւր արքայական։» (Հատոր I, էջ 73—74)։

Սակայն, շնայելով այդ բոլոր վկայութիւններին, խնդիրը դեռ կարօտ է լուսարանութեան,

որովհետեւ ուս մատենագիր Շոպէն ենթադրում է թէ Հայերի, մանաւանդ Զուղայեցիների դէպի Պարսկաստան գաղթելու պատճառն ոչ թէ Շահաբբասի բռնութիւնն էր, այլ այն հանգամանքը, որ հնդկական նոր ծովային ճանապարհի գիւտով առեւտուրը դադարել էր եւ ուրիշ ուղղութիւն ստացել: Բայց ահա Շոպէնի գրուածը.

«Շատ նշաններից, հին աւանդութիւններից եւ տեղագրութիւնների հետազոտութիւնից պարզ երեւում է, որ հին ժամանակ Հայաստանում ծաղկած էր վաճառականութիւնը: Աաղուց դէն ձգած քաղաքների փլատակները՝ այն է Ատապատի, Արտաշատի, Աղաբաղապատի, Գուինի, Անու եւ այլն՝ բերում են այս եզրակացութեան: Բայց առանձնապէս հաստատում են այս միտքը Զուղան եւ Ազուլիսը, որոնք չունենալով մշակելու հող՝ կարող էին պահպանել բնակիչներին միմիայն վաճառականութեամբ:

«Զուղան 8000 զերդաստանով գտնւում էր քարաժայռերի մէջ, որոնք իրանց վայրենութեամբ սարսափեցնում են եւ որոնց վրայի ցցուած տները աւելի նման էին թռչունի բների, քան մարդկային կացարանների: Բայց նրանց հարստութիւնն այնքան զրաւեց Շահաբբասին, որ 1605 թուականին տեղափոխեց նրանց դէպի Սպահան: Ազուլիսը մշակելու հող չունենալով իւր 10.000 զերդաստան բնակիչներին պահպանում էր վաճառականութեամբ:

«Այդպիսի հետեւանքներ նոյն իսկ պատճառներից՝ նկատելի են ամենահին ժողովրդի մէջ Արեւելքում: Աւաղուտ, անբերրի եւ անջրդի անապատները, որոնք ձգւում են Պարսից ծոցից՝ Սեւ եւ Միջերկրական ծովերի արանքում, շատ դարեր

Քրիստոսից առաջ, ծածկուած էին ծաղկեալ քաղաքներով, որոնց զեղեցիկ փլատակները՝ հակառակ իրանց ամայի շրջակայքին՝ զարմացնում են այժմ: Առեալ ծովի, Եփրատի եւ Պարսից ծոցի մէջերում պահպանուել են աւելի քան 30 ընդարձակ քաղաքների հետքեր եւ այնպիսի տեղերում, ուր այժմ թափառական արաբը հազիւ թէ գտնում է ուտելիք իւր թշուառ հօտի համար: Գիւթական ոյժը, որ արտադրել էր այս քաղաքները, Հնդկաստանի վաճառականութիւնն էր Եւրոպայի հետ՝ Եփրատի վրայով: Իսկ երբ բացուեց այլ ճանապարհ, այդ քաղաքներն իրանք իրանց ոչնչացան:

«Երեւի «Բարեյուսոյ գլխի» գիւտն եւ հնդկական վաճառականութեան նոր ծովային ճանապարհի ուղղութիւնն ունեին աւելի ազդեցութիւն Հայոց թագաւորութեան անկման վրայ, քան մահմեդականների եւ դրացի գիշատիչ ազգերի բոլոր ասպատակութիւնները: Արանից յետոյ, հայրենիքում առեւտուրից զրկուած հայ կապիտալիստները՝ հանգամանքից ստիպուած՝ պէտք է զաղթէին Ա. Գոլխ, Պարսկաստան, Հնդկաստան, Ալեքսանդրիա եւ այլն: Արանց հեռանալով, Հայաստանի վաճառականութիւնը կորցրեց իր նշանակութիւնը: Գ...ցէ այն անգամն էն եւ Շահ-Ք...ի Կ...այ-Կ...նը ստիպեց Զ...լայեցիներին Գ...լիւ Գ...ի Ս...նն:»

Թէեւ դժուար է ընդունել Շոպէնի այս կարծիքը, քանի որ Առաքել վարդապետ, Շարդէն, Օլէարիուս, Բէհման-Միրզա խիստ բացայայտ կերպով աւանդում են, որ Շահաբբաս բռնութեամբ գաղթեցրեց Զուղայի բնակիչներին, բայց եւ այնպէս գուցէ Շոպէնի առաջ բերած հանգամանքն ազդեցութիւն է ունեցել

Ջուղայի հարուստ հայ վաճառականների կամ  
խօջանների վրայ:

Սակայն եւրոպական ուրիշ գիտնականներ,  
օրինակ Կարլ Բիտտեր, Դուպրէ, Ջ. Մալքոլմ,  
Ուզլէյ և այլք՝ ուրիշ մեկնութիւն են տալիս  
1605ի գաղթականութեան եւ այդ պարա-  
գայում մօտենում են Առաքել վարդապետի  
ասածին: Ահա ինչ է ասում Կարլ Բիտտեր.

«Թուրքերի տիրապետութեան ժամանակ  
Հայաստանի բնակիչները վերստին պէտք է կրէին  
այն բոլոր ցաւերը, որոնք կրում է մի հպատակ  
սահմանակից երկիր երկու մեծ թշնամի տերու-  
թիւնների մէջտեղ: Սուֆիների կամ Վէֆեվիների  
նոր դուրսի-նորսի-նորսի-նորսի-նորսի շարունակում էր  
մարդկանց աւերումը, գերութիւններն եւ բռնի  
Հայաստանից ի Պարսկաստան գաղթեցնելը գործ-  
ազրել, որոնք սկսուել էին Սասանեանների ժա-  
մանակ: Հէնց որ Շահաբբաս Ա. համոզուեց, որ չէ  
կարողանալու Հայաստանի դաւառներն Օսմանեան  
տիրապետութիւնից պաշտպանել, նա վճռեց թող-  
նել իր թշնամիներին միայն դատարկ երկիրը: Աւելի  
քան 24.000 հայ բնտանիք բռնութեամբ վարեց  
և պարսկական թագաւորութեան զանազան գաւ-  
առներում հաստատեց, եւ այնտեղ շատերը խառ-  
նուելով մահմեդականների հետ, մնացան իրանց  
լեզուն, կրօնն եւ ծագումը<sup>1</sup>։»

Նոյնը մի այլ տեղ ասում է<sup>2</sup>.

«Շահաբբաս իր դրացի տաճիկների դէմ վա-  
րած պատերազմի մէջ ի գործ դրաւ այն արեւելեան

<sup>1</sup> Die Erdkunde von Carl Ritter, Band VII, Berlin  
1843, էջ 601:

<sup>2</sup> Նոյն Band VI, էջ 50:

քաղաքականութիւնը, որ սովորական էր, այն է  
 Հայաստանի սահմանակից գաւառներն ամբողջա-  
 պէս աւերել եւ նոցա բնակիչներին վարել: Նա  
 բնակեցրեց նրանց իր տէրութեան ուրիշ գաւառ-  
 ների մէջ, մանաւանդ Ռէշտում՝ Գիլանի մէջ եւ  
 Սպահանում: Սակայն միեւնոյն ժամանակ ի նկատի  
 ունենալով նրանց ջանասիրութիւնը, խնայողու-  
 թիւնն եւ առեւտրական սգին, նա առաջ վարեց  
 նրանց ջանասիրական ձեռնարկութիւնները, որոնց  
 մէջ գործ էր դնում եւ իր սեպհական զբամա-  
 գլուխը, դէպ ի հնդկական վաճառականութիւնը,  
 դէպ ի բամբակի առեւտուրը, դէպ ի մանուածոյ  
 թելերի եւ մետաքսի վաճառականութիւնը:»

Մեր այս բերած վկայութիւններից կարելի  
 է եզրակացնել, որ 1. Շահարբաս իբրեւ ան-  
 Տատ՝ վերին աստիճանի բռնակալ, անգութ եւ  
 նախանձոտ մարդ է եղել, ինչպէս արեւելքի  
 բոլոր հռչակաւոր բռնակալները. 2. Նրբեւ թա-  
 գաւոր եւ վարչական անձն՝ նա խիստ նրբամիտ  
 քաղաքագէտ, հանձարեղ կռավարիչ, ժո-  
 դովրդասէր եւ իւր երկրի բարգաւաճման ու  
 հզօրութեան նախանձախնդիր անձն է եղել. 3.  
 Հայերի գաղթականութիւնը՝ կատարուել է բռնի  
 կերպով եւ նրա գլխաւոր դրդիչ պատճառն ե-  
 ղել է Շահարբասի ցանկութիւնը ծաղկեցնել իր  
 երկիրն ու մասամբ Օսմանցիների արշաւանքն ան-  
 հնարին դարձնել:

Մեզ հարկաւոր է այժմ իմանալ, թէ  
 գաղթական Հայերին որտեղ բնակեցրեց Շահ-  
 արբասն եւ որքան էր գաղթեցրած Հայերի  
 թիւը: Պէտք է նկատենք առաջ, որ ինչպէս ցոյց  
 տուինք մեր պատմութեան ընթացքում եւ ինչ-

պէս որոշ կերպով յայտնում է Առաքել Աւար-  
դապետը, Հայերը գաղթեցին կամ նրանց բռնի  
գաղթեցրեց Շահաբբասն Արարատեան աշ-  
խարհից եւ Ատրպատականից մի քանի անգամ,  
մինչեւ ութը անգամ: Բաց ի արդէն մեր յիշած  
տարիներից, 1608ին եւս գաղթականների մի  
նոր հատուած բերուեց Պարսկաստան: Այս եւս  
չպէտք է մոռնալ, որ Հայերի հետ Շահաբբաս  
գաղթեցրեց եւ շատ Արացիներ եւ Հրեաներ:

Գաղթականներին Երասխ գետից անցկա-  
ցնելուց յետոյ՝ Շահաբբաս ընդհանուր վերա-  
կացու կարգեց նրանց վերայ Էլիազ Սուլթան  
անունով մի պաշտօնեայի, որ քչեց գաղթա-  
կաններին շատ դժուար ծանապարհներով. չու-  
տով ձմեռը վրայ հասաւ եւ որովհետեւ առաջ  
գնալ անհնարին էր, ուստի ձմեռեցին Արա-  
դաղում խալխալ, Ահար ու Մուշկուն գաւառ-  
ներում:

Երբ գարունը բացուեց՝ չուն սկսուեց  
միառժամանակ կանգ առնելով եւ հանգստա-  
նալով Թաւրիզում, որի հայ ժողովուրդն եւս  
միացրին ընդհանուր բանակի հետ. վերակա-  
ցուները քչեցին բանակն եւ բերին հասցրին  
Ղազվին, որտեղից արդէն սկսեցին բաժանել  
հատուածների եւ բնակեցնել զանազան քաղաք-  
ներում ու գաւառներում. մի մեծ հատուած  
եւս Շահաբբաս ուղարկեց եւ բնակեցրեց Գի-  
լանի ու Մաղանդարանի նահանգներում եւ, որ  
ղարմանալին է, մի մասն ուղարկեց Գարբանդ՝  
Բէշտի ու Անզալիի վրայով: Արդեօք մինչեւ այդ

ժամանակ Գարբանդում կային շայեր, թէ ոչ՝ մեզ յայտնի չէ, բայց գաղթականութիւնից յետոյ այդ քաղաքում շայերի մեծ բազմութիւն կար: Մեծամասնութիւնը, ի հարկէ, Շահարբաս ուղարկեց Սպահանի նահանգը: Քաղաքացիներին բնակեցրեց Սպահանում, Քեաշանում, Ղազվինում, իսկ գաւառացիներին՝ Սպահանի շրջակայ աւաններում եւ գիւղերում: Ահա այն քաղաքները, գաւառներն եւ գլխաւոր գիւղերը, ուր բնակեցրին շայերին. — Ղազվին, Քեաշան, Սպահան քաղաքները: Սպահան նահանգի հետեւեալ գաւառները — Ալնջան, Լնջան, Գանդիման, Ջղախոռ, Փէրիա, Բուրվար, Քեաղազ, Քեամարա, Գեափլա, Քեարվանդ եւ Ղարաղան: Ալնջան եւ Լնջան գաւառները Սպահանից 4—5 փարսախոյժ հեռու են եւ բաղկացած են, առաջինը՝ 7, երկրորդը 10 գիւղերից. Գանդիման եւ Ջղախոռ գաւառները հեռու են 14 փարսախոյժ ու բաղկացած են 5 գիւղերից. Փէրիան 22 գիւղ ունի, իսկ Բուրվարը՝ նոյնպէս 22: Աւերոյիշեալ բոլոր 66 գիւղերի անուններն են: — Մշաղբուր, Փիդուն, Ջազոան, Քափաջան, Բանդարի, Քուրուջ եւ Մէմիդ. — Փարթուն, Չուդուն, Ջուզուն, Քիլիսուն, Փելարդ, Բուրուզարդ, Սէմուն, Խունապէք, Միտագիւն եւ Քեալէ. — Ահմատաբադ, Սիրաք, Գիշնիգան, Լիւտսիան, Ջիւրիգիան, Ֆանդիգան. — Հազարջրիք, Մէդանակ, Փրնստան, Աղւայ, Տաշքեալան, Բոլորան, Խունկ, Խնկիրանայ, Շահբուայ, Շուրիշկան, Միլագ երդ,



Թանկի Հալիայի, Խօյգան, Մուղան, Բէկուջան, Սընկըրդ, Մուքէլի գիւղ, Սկեանդարի զուղայ, Թաշբուլաղ, ներքին Խօյգան, Բէրկէր եւ Խսկանտարիա. — Չամխրսու, Զաջուն, Չէշմէփառայ, Քուարղայ, Անաւշ, Վերին-Չարբաղ, ներքին Չարբաղ, Զղազարկ, Բօրքօք, Ղասուժաժայ, Զանխօլ, Փարմիղան, Շափրաժայ, Թարքու, Փաւչիս, Փահրոյ, Խոսրովաբադ, Դէյնով, Գուլբըհար, Հմայա, Մէվրստան, Աղգօլ: — Մնացած գաւառների գիւղերի մասին տեղեկութիւն չէ մնացել: Արդեօք այդ բոլոր 66 գիւղերը պարսիկներին գիւղեր էին, որտեղից Շահաբբասը քշեց Պարսիկներին՝ Հայերին տալու համար, թէ Հայերը իրանք նոր հիմնեցին՝ այդ մասին եւս պատմութիւնը լռում է: Այդ գիւղերից շատերը եկեղեցի ունէին. նրանց մի մասի մէջ մինչեւ այսօր եւս բնակւում են Հայեր, իսկ Անջանի եւ Անջանի գաւառների գիւղերը բոլորովին դատարկուած են այսօր Հայերից եւ Պարսիկներ են բնակւում նրանց մէջ. մի քանի գիւղերում եկեղեցիների աւերակներն դեռ մնում են:

Սպահան քաղաքի մէջ Հայերին բնակեցրին զանազան թաղերում: Երեւանցիներին եւ Գասկեցիներին բնակեցրին Նարընդալայի մօտ Թրսկան թաղում. Թափրիղցիներին եւ Գաշաւցիներին բնակեցրին Շամսաբադ թաղում, ոմանց՝ Փաղալայ թաղում, որի մի փոողոցն մինչեւ այսօր եւս կոչւում է «Խիաբանը Արամինա» (փողոց Հայոց) եւ որի եկեղեցին այժմ մզկիթի է վերածուած: Մի քանի տներ էլ բնակեցրին խառն

Պարսիկների հետ խօրասկան եւ Շխսաբան թաղերում: Այդ բոլոր թաղերը Սպահանի կամ, ինչպէս մեր պատմագիրները սովոր են ասել, «Շօշի» կենդրոնական թաղերն են: Այդտեղ Հայերը տներ եւ եկեղեցիներ շինեցին, ինչպէս եւ Ամենափրկիչ անունով մի մեծ եկեղեցի եւ մնացին 51 տարի, բայց Շահաբբաս Բ. ի կամ Փոքրի թագաւորութեան ժամանակ՝ նրանց հանեցին Սպահանի միջից եւ Նոր-Ջուղայի մօտ Մարնուն կոչուած տեղում նոր բնակավայր տուին նրանց 1650 թուին: Մարնունում Հայերը շինեցին նոր գեղեցիկ տներ, այգիներ, բուրաստաններ, եկեղեցիներ: Սպահանից հանելու պատճառն այն էր, որ Հայերը գինի եւ օղի էին ծախում եւ Պարսիկների մէջ արբեցողութիւնը սկսել էր սաստիկ տարածուել:

Ջուղայեցի գաղթականներին Շահաբբաս բոլորովին առանձին բնակեցրեց Սպահանից դուրս Զանդարուզ գետի հարաւակողմում, այն տեղում, որ այժմ կոչոււմ է Նոր-Ջուղայ: Գետնի մի մասն Շահն ընծայեց Հայերին, իսկ մի մասն եւս Հայերն իրանք գնեցին: Եօթը տարուց յետոյ, 1612ին, Շահաբբասը Նոր-Ջուղայի գետնի համար հրովարտակ շնորհեց Հայերին: Նոր-Ջուղայի հիմնարկութեան մասին մի քիչ յետոյ կը խօսենք մանրամասն, առ այժմ պէտք է ասենք, որ Շահաբբաս մի առանձին խնամքով եւ հոգացողութեամբ տեղաւորեց Ջուղայեցիներին եւ ամէն կերպ օգնութիւն ու դիւրութիւններ ընծայեց նրանց:

Մազանդարանի եւ Գիլանի Հայերի հատուածի մասին շատ քիչ տեղեկութիւններ ունենք: Առաքել վարդապետ ունի չէ խօսում պարզապէս, բայց Շարդէն ասպետի վկայութիւնը բաւական լոյս է սփռում խնդրի վրայ. բացի դրանից կաթուղիկոսական զանազան կոնդակներ եւս ապացուցանում են, որ այդ երկիրներում եւս մեծ թուով հայ գաղթականներ են բնակեցրել, բայց նրանք շուտով անհետացել են: Ահա ինչ է գրում Շարդէն:

«Մազանդարանը մի շատ պտղաբեր երկիր է, բայց օդն շատ խոնաւ, տար ու անառողջ: Շահարբաս Մեծից առաջ այդ երկիրն կատարեալ անապատ էր, բայց այդ մեծ աշխարհակալ եւ քաղաքագէտ իշխանը տեղափոխեց Հայաստանից եւ Արաստանից այդ երկրի մէջ մի հիանալի ժողովուրդ թէ այն պատճառով, որ այդ երկիրները աւերուեն, որպէս զի թիւրքերը չկարողանան ամէն տարի դալ եւ իր հետ պատերազմել եւ թէ այն պատճառով, որ Մազանդարանը մեծ յարմարութիւններ է ներկայացնում շերամի մշակութեան համար: Բաց ի դրանից նրա մայրը Մազանդարանցի լինելով, յորդորում էր որդուն շէնացնել այդ երկիրը: Նա փոխադրեց 30.000 բնակիչներ, կարծելով, որ այդ տեղ շատ կ'աճեն եւ կը բազմանան, «բնակիչներն — ասում էր նա — Մազանդարանը բնակիչներն են, որոնք շատ յարմար են ինչիս համար: Նա քիչ բնակիչներ էր բնակեցրել, իսկ բնակիչներն են, որոնք շատ յարմար են ինչիս համար: Նա քիչ բնակիչներ էր բնակեցրել, իսկ բնակիչներն են, որոնք շատ յարմար են ինչիս համար: Նա քիչ բնակիչներ էր բնակեցրել, իսկ բնակիչներն են, որոնք շատ յարմար են ինչիս համար:»

«Շահարբաս այդ երկրում քաղաքներ եւ շէնաղ պալատներ շինեց, որպէս զի խրախուսի այդ

ժողովրդին, բայց օգի վնասակարութիւնը այնքան հակառակեց նրա ջանքերին եւ նպատակներին, որ երբ եւ Մազանդարան գնացի արքունիքի հետ 40 տարի արաջ<sup>1</sup>, քրիստոնեաների թիւն իջել էր 400 ընտանիքի առաջուայ 30.000ի տեղ, ինչպէս հաւատացնում էին ինձ: Քարհարագի եպիսկոպոսն, որ մի բարի ծերունի հայ քահանայ էր, եւ լաւ ծանաշում էր երկիրը, ինձ ասում էր յաճախ, որ եթէ շլինէր երկրի արդասաւորութիւնը, որ քաշում է դէպ իրան շրջակայ ժողովրդներին, նա բոլորովին անապատ կը մնար, այնքան օգը վնասակար է: Մազանդարանի օգի վնասակարութիւնը այնքան յայտնի է, որ երբ թագաւորը որեւէ մի պաշտօնեայի նշանակում է այդ նահանգի պետ, կամ Գիլանի՝ նրա ամենահարուստ մասի կառավարիչ, ժողովուրդը ասում է. «արդե՞ք սպանութիւն կամ գողութիւն է գործել, որ նրան ուղարկում են կառավարել Գիլանը:» —

Արդեօք բոլոր 30.000 քրիստոնեայ ընտանիքը շայնք էին, թէ՛ կային նաեւ Վրացիներ, Շարգէն չէ որոշում. հաւանական է, որ Վրացիներ եւս լինէին, բայց, մեծամասնութիւնը, անկասկած շայնք էին: Չենք կարծում, որ 30 տարւայ ընթացքում 30.000 ընտանիքը, ուրեմն մօտ 200.000 հոգի, վատ օգից եւ հիւանդութիւններից ոչնչացած լինեն եւ նրանց թիւը հասած լինի 400 ընտանիքի. անշուշտ, շատերը նորից վերադարձել են իրանց տեղերը կամ փոխադրուել այլ տեղեր: Քաց ի Շարգէնի վկայութիւնից կան եւ եպիսկոպոսական ու կա-

<sup>1</sup> Արեմն հայերի փոխադրութիւնից մօտ 30 տարի յետոյ՝ 1632 — 33 ին:

Թողիկոսական կոնդակներ, որոնք ցոյց են տալիս թէ Մաղանդարանում Հայերի բազմութիւն է եղել: Մովսէս եպիսկոպոս իր մի կոնդակի մէջ<sup>1</sup> գրում է.

“Շնորհք առաքելական եւ նամակ պահպանողական ի վերայ մերազուն եւ Հայկատոհմ համայնից ժողովրդականաց, որք էք ի Քաշան, ի Ղաղվին, ի Գիլան, յԱնզալի, ի Գարբանդ եւ որք շուրջ զդորօք մեծամեծ եւ մանրամասնեայ գիւղօրայք իցեն . . .”:

Սրանից հետեւում է, որ մինչեւ անցեալ դարի գոնէ առաջին քառօրդը Գիլանում Հայերի բազմութիւն կար, ուրեմն Շարդէնի ասածը, թէ իր ճանապարհորդութեան ժամանակ 1632ին 400 տուն հայ էր մնացել Մաղանդարանում, հաւանական չէ, քանի որ գրէթէ 100 տարուց յետոյ “մեծամեծ եւ մանրամասն գիւղօրայքի” խօսք է լինում:

Բայց կայ եւ մի ուրիշ հանգամանք, որ յոժ է տալիս Շարդէնի խօսքին: Ինչպէս յայտնի է, Ռուսաց Մեծն Պետրոս կայսրը մեծ ջանքեր գործ դրեց գրաւել այսրկասպեան երկիրները— Բագուն, Մաղանդարանը, Գիլանը, Գարբանդը: 1723 թ. սեպտ. 12 ին Պարսից Թահմաս Բ. Շահի հետ կնքած դաշնագրի զօրութեամբ Մեծն Պետրոսը հասաւ իր նպատակին եւ այնուհետեւ, ինչպէս վկայում է Սօլովիեվ պատմագիրը, նա ամէն կերպ ստիպում էր, որ Հայերին

<sup>1</sup> Մովսէս եպիսկոպոս Նոր-Ջուղայի վեցերորդ առաջնորդը՝ 1706—1725 թ.:

Համոզեն գնալ բնակութիւն Հաստատել Մազանդարանում եւ Գիլանում, սակայն Հայերը «լսել անգամ չէին կամենում այդ մասին»։ Գրանից պէտք է ուրեմն հետեւեցնենք, որ Մազանդարանը եւ Գիլանը գրաւելու բոպէին, 1723 ին, այդ երկրներում Հայեր չկային, բայց այն ժամանակ ինչով բացատրել Մովսէս առաջնորդի կոնդակը։ Եթէ ենթադրենք որ այդ կոնդակը իբրեւ օրհնութեան կոնդակ գրուել է 1706 ին, երբ նա առաջնորդ ընտրուեց եւ միեւնոյն ժամանակ ընդունենք, որ 1723 ին երբ Մեծն Պետրոս գրաւեց Մազանդարանն եւ Գիլանը, այդ երկրներում Հայ չկար, պէտք է ուրեմն գալ այն եղրակացութեան, որ այգպիսի մի կարճ ժամանակամիջոցում (1706—1723 թ.) Հայերը գաղթել եւ տեղաւորուել էին ուրիշ տեղեր կամ ռնչացել էին։ Այն հանգամանքը որ այսօր եւս Մազանդարանի եւ Գիլանի զանազան տեղերում — Անզալիում, Բաշտում, Աստարաբատում, Մեշետիսարում, Քանարա գետգում Հայեր են գտնուում, չէ կարող որեւէ նշանակութիւն ունենալ, որովհետեւ այդ Հայերը նոր ժամանակի եկորներ են Անդրկովկասի զանազան տեղերից — Ադուլիսից, Ղարաբաղից՝ վաճառականութեան նպատակով։

Ղազվին քաղաքի եւ նրա Հայերի մասին Շարգէն գրում է 1673 ին. «Ղազվինը բաղկացած է 12.000 տներից, նա վեց հազար աշտարակ ունի եւ 100.000 բնակիչ, որոնց մէջ պէտք է հաշուել 40 քրիստոնեայ եւ 100 հրեայ բնտանիք, ամէնքը շատ ազգատ։ Եւրոպական աշխարհագիրներից

չատերը ասում են, որ Ղաղվինը նախկին Արշակաւանն է (Arsaciè), Պարթեւների առաջին կայսր Արշակի անունով, որ նա Յոյների անուանած Բաճէան (Ragea) է, որ Ս. Գրքի մէջ կոչուած է Մեզիայի Բաճէան: Ոմանք այն կարծիքի են, որ նա Ստրաբոնի Կաղբիրան (Cazbira) է: Ասումբէզ, մի հայ հեղինակ, բուրբուլին ուրիշ կարծիք ունի. նա ասում է, որ այդ քաղաքը ստացել է իր կոչումը Ղաղբին թագաւորի անունիցը:»

Թէ ո՞վ է այդ հայ հեղինակը, Ասումբէզը, եւ ե՞րբ է գրել, դժբախտաբար ոչ մի տեղեկութիւն չունենք այդ մասին:

Մնում է այժմ լուծելու մի գլխաւոր խնդիր. ո՞րքան էր տարագրեալների կամ գաղթականների թիւը: Մենք տեսանք, որ ընդհանուր գաղթականութիւնից (1605 թ.) առաջ եւ յետոյ Շահաբբասը մի քանի անգամ, թէեւ մանր հատուածներով, գաղթեցրեց Հայերին. տեսանք նոյնպէս, որ գաղթականների ընդհանուր բանակը չուեցնելուց յետոյ, Շահաբբաս իմանալով, որ շատերը թագնուել են անտառներում, քարայրներում, լեռների կիրճերում, զօրք ուղարկեց նրանց նոյնպէս գաղթեցնելու կամ կոտորելու: Հայ պատմագիրներից ոչ ոք որոշակի չէ յայտնում գաղթեցրած ժողովրդի թիւն. չկան այդ մասին տեղեկութիւններ եւ նոր-ջուղայի Ամենափրկիչ վանքի ձեռագիր յիշատակարաններում, ինչպէս յայտնում է Յ. Տէր Յովհաննէանը: Առաքել վարդապետը յայտնում է միայն առաջին գաղթականների, Արծկէ քաղաքից գերուածների թիւն — 23.000

հոգի, իսկ ընդհանուր գաղթականութեան թուի մասին՝ ինչպէս վերելում տեսանք, ասում է թէ  
 «տարագրեալ ժողովրդի բանակի լայնութիւնն էր  
 Վանու լեռների ստորոտից մինչև Երասխ գետի  
 եզրը, իսկ երկարութիւնն, մի օրւայ ճանապարհ,  
 իսկ ուրիշների գրելով 5 օրւայ ճանապարհ»:

Շարգէն եւս ոչինչ չէ խօսում գաղթականների  
 թուի մասին, չէ յայտնում ոչինչ եւ այդ մեծ  
 գաղթականութեան ականատես վկայ Անտոն  
 եպիսկոպոս Գօվէան, որ մանրամասն նկարագրում է  
 գաղթականների կրած ծանր աղէտները: Տեղեկութիւն  
 ունենք միայն շին-Ջուղայի բնակիչների թուի  
 մասին, որ Շարգէնի ասելով, 4000, իսկ  
 Շոպէնի ասելով 8000 տուն էր: Եւրոպական  
 յետագայ պատմագիրները, օրինակ՝ Կ. Բիտտէր՝  
 ընդհանրապէս 24.000 ընտանիք են հաշուում  
 Հայաստանից Պարսկաստան գաղթեցրած  
 Հայերի թիւն: Եթէ ամէն մի ընտանիք  
 միջին թուով 10 հոգուց բաղկացած հաշուենք,  
 այն ժամանակ կ'ունենաք 240—250 հազար  
 հոգի: Բայց, տարակոյս չկայ, որ գաղթականների  
 թիւն աւելի մեծ էր, ի նկատի ունենալով  
 այն ահագին տարածութիւնը, որտեղից  
 քշուեցին Հայերը: Այս օրերս հրատարակուած  
 մի նոր եւ նշանաւոր աշխատութիւն, որի  
 հեղինակն է Կ. Եղեան, յայտնում է, թէ 60  
 հազար ընտանիք գաղթեցրեց Շահաբբասը,  
 բայց այդ 60 հազարից միայն 20 հազար ընտանիք  
 հասան Պարսկաստան, մնացածը ոչնչա-



ցին ճանապարհին սովածութիւնից եւ ցրտից: <sup>1</sup>  
 Ի՞նչ աղբիւրներից է քաղել Պ. Եղեանը այդ  
 տեղեկութիւնը, դժբախտաբար, չէ բացա-  
 րուած, բայց այդ թիւն անհաւանական է  
 թւում մեզ, որովհետեւ 60.000 ընտանիքը  
 նշանակում է 600.000 հոգի ու դժուար թէ  
 ճանապարհին, եթէ կոտորուած լինէին քաղցից  
 ու ցրտից 40.000 ընտանիք, կամ 400.000  
 հոգի, այդ ահագին թուի մասին պատմագիր-  
 ները լռէին: Պէտք է ենթադրել, եւ այդ շատ  
 հաւանական ենթադրութիւն է, որ որքան էլ  
 Շահաբբասը միջոցներ գործ դրեց դատարկելու  
 Արարատեան երկիրը Հայերից, բայց դարձեալ  
 Հատերին յաջողուեց մնալ իրանց տեղերում եւ  
 Հատերն էլ գուցէ ճանապարհից փախչելով  
 վերադարձան իրանց նախկին տեղերը, որովհե-  
 տեւ Ադամ Օլէարիուս, որ այցելեց Համախին  
 1636 թուին, յայտնում է, որ այդ քաղաքում  
 Հատ Հայեր կային, եպիսկոպոս ունէին եւ նկա-  
 րագրում է Զօրհանեաց հանդէսը, որ Հայերը,  
 Համախու խանի հրամանով կատարեցին 1637  
 թուին յունվարի 6ին, գետի վրայ, Օլէարիուսի  
 եւ Մոսկուայի դեսպան Ալէքսէյ Սավինովիչի  
 ներկայութեամբ: Նոյնպէս Հարդէն Թիֆլիսից  
 սկսած մինչեւ Թավրէզ ամէն տեղ ցոյց է տալիս  
 Հայերի մեծ բազմութիւն:

Զօրհանցի Ստեփանոս քահանայ պատմա-  
 բանը, որ գրել է իր պատմութիւնը սկսած

1 Г. Я. Езовъ, Сношенія Петра Великаго съ армян-  
 скимъ народомъ, С. Петербургъ 1898, էջ V.

Հայոց 1114 թուականից (1665 թուին) Նոր-Ջուղայի բնակիչների թիւն յայտնում է 12.000 տուն կամ մօտ 150.000 բնակիչ, բայց այդ թիւն, ի հարկէ, միայն Նոր-Ջուղային չէ վերաբերում, այլ Սպահանում ու նրա մօտակայքում գտնուած բոլոր Հայերին. անկարելի է, որ միայն Նոր-Ջուղայում այդքան բնակիչներ լինէին, որովհետեւ Շարդէնը, որ նկարագրել է Նոր-Ջուղան գրեթէ նոյն ժամանակ (1665ին), ասում է, որ գաղթականութիւնից 6 տարի յետոյ (1611ին) բնակիչների թիւն հասաւ 5000ի: Ուրեմն, եթէ 50—55 տարւայ ընթացքում բնակիչների թիւն դարձել է 12.000 տուն, պարզ է, որ դրա մէջ հաշուում են եւ Սպահանի ու շրջակայ գիւղերի Հայերին: Մենք գիտենք եւրոպացի ուրիշ պատմագիրներից, որ Նոր-Ջուղան իր ամենածաղկած դրութեան ժամանակ 12.000 հոգի բնակիչ է ունեցել: Միւս կողմից մենք գիտենք, որ գաղթականների կէսն հազիւ հասաւ Պարսկաստան. այդ մասին բացի զանազան ստոյգ տեղեկութիւններից ունենք եւ մի ժամանակակից ձեռագիր յիշատակարան՝ Նոր-Ջուղայի Ս. Մինաս եկեղեցում:

«Եւ եթէ զմտաւ ամեմք՝ քան զկէսն մահուանէ ի կեանս փոխեցան առ Աստուած, ոմանք ջրախեղդ մեռան՝ ոմանք ի ցրտոյ պակասեցան եւ ոմանք ազգի ազգի մահուամբ առ Քրիստոս փոխեցան»<sup>1</sup>:

<sup>1</sup> Պատմ. Նոր-Ջուղայու Յ. Ք. Տէր-Յովհաննէան, Նոր-Ջուղա, 1880 թ.

Այս տեղեկութիւնների հիման վրայ, կարող ենք մօտաւորապէս ճշդել գաղթականների թիւը: Եթէ ընդունենք Նոր-Ջուլայի, Սպահանի եւ մօտակայ գիւղերում բնակուած Հայերի թիւն 150.000, ընդունենք որ 50.000 Հայեր էլ բնակեցուել են միւս քաղաքներում եւ հեռաւոր գիւղերում, ինչպէս եւ Մազանդարանում եւ Գիլանում, ուրեմն 200.000 Հայ պէտք է համարել բուն Պարսկաստան կամ Սպահանի նահանգն հասած: Հաշուենք 200.000 հոգի էլ ճանապարհին փչացած եւ կոտորված չուի ժամանակ, ուրեմն Հայաստանից քշած Հայերի ընդհանուր թիւն լինում է 400.000: Մեզ կարող են առարկել, որ Շարդէն միայն Մազանդարան եւ Գիլան ուղարկուածների թիւն 30.000 ընտանիք է հաշուում, բայց Շարդէն ասում է. «30,000—~~قره‌موتی~~— ընտանիք», որից պէտք է եզրակացնել, որ բոլորը Հայեր չէին, այլ նաեւ վրացիներ եւ մենք գիտենք վրաց պատմութիւնից, որ Շահաբբաս նոյնպէս վրացիների մեծ բազմութիւն քշեց Պարսկաստան: Շարդէն ասում է, որ Շահաբբաս Վահսթիայից հանեց 80 հազար ընտանիք եւ բնակեցրեց Պարսկաստանի զանազան տեղերում:

Ուրեմն, Հայաստանից քշած եւ վտարած Հայերի թիւն առ առաւելն պէտք է ընդունել 4—500.000:



## ԱԶԳԱՅԻՆ ՄԱՏԵՆԱԳԱՐԱՆ

- Ա. Գալէմքեարեան ձ. Գր. վ., Ուսումնասիրութիւնը Լեհահայոց դատաստանագրոյն: 1. Պիշնֆ, Լեհահայոց հին իրաւունքը: 2. Գուշեք, իրաւունք չայոց: 1890: էջ 85+59: ֆր. 1.25
- Բ. Մեմեկիշեան ձ. Գ., Ազգարանութիւն ազն. գարմին Տրագեանց: 1880: էջ 50: ֆր. 1.—
- Գ. Տաշեան ձ. Ե., Ազգամեծեղոս առ Գէորգայ ասորի նախկուպոսին եւ ուսումնասիրութիւն Ազգամեծեղեայ գրոց: 1891: էջ ԺԱ+159: ֆր. 1.25
- Դ. Տաւ Դ., Արեւելեան չայք ի Պուրովինա: Թրգմ. ձ. Գ. վ. Գալէմքեարեան: 1891: էջ 79: ֆր. —.85
- Ե. Տաշեան ձ. Ե. վ., Ուսումնասիրութիւնը Ստոյն-Կալիստենեայ Վարուց Աղեքսանդրի: 1892: էջ Դ+272: ֆր. 3.—
- Չ. Տրվիշե Ա. եւ Գ. Փիսոն, Ուղեւորութիւն ի Փոքր Ասիա: Թրգմ. ձ. Ե. վ. Տաշեան: 1892: էջ 82: ֆր. 1.—
- Ը. Մառն., Ամսոնային ուղեւորութիւնից դէպ ի չայս: Թրգմ. Ո. Անտիեան: 1892: 89: ֆր. 1.25
- Ը. Կարրիէր Ա., Նորագոյն աղբերք Մովսիս Խորենացոյ: չտ. Ա.: Թրգմ. ձ. Ե. վ. Տաշեան: 1893: էջ Ժ+51: ֆր. 1.—
- Թ. Գալէմքեարեան ձ. Գ. վ., Պատմութիւն հայ լրագրութեան: չտր. Ա. 1794—1860: (1 լուսանկարով:) 1893: էջ 232: ֆր. 2.50
- Ժ. Կոնիէրի Փր. Կ., Կենտրոնը գրոց Գալիսի Անյաղթի: Թրգմ. եւ յաւ. ձ. Ե. վ. Տաշեան: 1893: էջ Է+92: ֆր. 1.25

- ԺԱ. Գ ո վ յ ի կ ե ա ն Ն. Գ. Վ., Հայր յ Ն ղ ի ս ա ր Ե թ ու  
պ ո լ ի ս Դ ր ա ն ս ի լ ու ա ն ի ոյ 1680—1779: (1 զ ը ն  
կ ա տ ի պ.) 1893: էջ Ժ + 533: Ֆր. 4.50
- ԺԲ. Խ ա շ ա թ Ե ա ն Գ յ., Ջ ն ն ր Գ լ ա կ, հ ա մ Ե մ ա տ ա կ ա ն  
ու ս ու մ ն ա ս ի ր ու թ ի ի ն: 1893: էջ Զ + 78: Ֆր. 1.—
- ԺԳ. Տ Ե յ - Մ ո վ ս ի ս Ե ա ն Փ., Հայ գ ի լ ղ ա կ ա ն տ ու ն ը:  
Թ ր գ մ. Ն. Բ. Վ. Պ ի լ է զ ի կ ճ ն ա ն: (6 տ ի ս տ կ. 55  
պ տ կ.): 1894: էջ Ը + 103: Ֆր. 2.—
- ԺԴ. Կ ա յ յ ի կ յ Ա., Ն ր ա ա գ ոյ ն ա ղ ք ե ր ք Մ ո վ ս ի ս ի Խ օ յ ր Ե  
ն ա ց ոյ. Հ տ ր. Բ. կ ա մ Ե Ե ա լ Ե լ ու ա ժ: Թ ր գ մ. Ն. Բ.  
Վ. Տ ա շ Ե ա ն: 1894: 8<sup>o</sup> էջ Ժ Ա + 43: Ֆր. 1.—
- ԺԵ. Տ ա շ Ե ա ն Ն. Բ. Վ., Ու ս ու մ ն ա ս ի ր ու թ ի ի ն ք հ ա յ Ե ր է ն  
փ ո ի ս ա տ Ե ա լ ք ա ո ի ք: Ա. Ն. Հ իւ պ շ մ ա ն, Ս Ե մ ա կ ա ն  
փ ո ի ս ա տ Ե ա լ ք ա ո ի ք հ ի ն հ ա յ Ե ր է ն ի մ է լ: Բ. Փ ր օ ր Ե լ  
մ ա ն Կ., Ե ու ն ա կ ա ն փ ո ի ս ա տ Ե ա լ ք ա ո ի ք հ ա յ Ե ր է ն ի  
մ է լ: Գ. Ն. Հ իւ պ շ մ ա ն, Հ ա յ կ ա կ ա ն Ե ա տ ու կ ա ն ու ա ն ք:  
1894: էջ Թ + 145: Ֆր. 2.—
- ԺԶ. Տ ա շ Ե ա ն Ն. Բ. Վ., Մ ա տ Ե ն ա գ ր ա կ ա ն Մ ա ն ր  
Ու ս ու մ ն ա ս ի ր ու թ ի ի ն ք. Մ ա ն Ա: Ա-Զ. Ն Ե մ ն ս ի ղ ոս,  
Պ ր ո կ ղ Դ ի ա ղ ի ղ ոս, Խ օ ս ր ո վ ի կ, Գ ի ր ք Հ Ե ր ճ ու ա ժ ոց,  
Պ ր ո կ ղ Ե լ Ս Ե կ ու ն ղ ոս: 1895: էջ Ժ Բ + 296: Ֆր. 3.60
- ԺԷ. Տ ա շ Ե ա ն Ն. Բ. Վ., Հ ա յ կ ա կ ա ն ա շ ի ս ա տ ս ի ր ու թ ի ի ն ք  
հ ա յ ա զ է տ Պ. Փ է թ թ է ր ի, ա մ փ ո փ ու ա ժ Ե լ Թ ա ր գ մ.  
ժ ա ն օ թ ու թ Ե ա մ ք ք: 1895: էջ Թ + 202: Ֆր. 2.50
- ԺԸ. Տ ի Կ յ Ե ա ն Կ., Ս Ե լ Ժ ո վ ու ո ո ա կ ա ն Ե գ Ե ր ք ը:  
1895: էջ 92: Ֆր. 2.—
- ԺԹ. Գ ո վ յ ի կ ե ա ն Ն. Գ. Վ., Դ ր ա ն ս ի լ ու ա ն ի ոյ Հ ա յ ոց  
Մ Ե տ ր ա պ ո լ ի ս ը կ ա մ Ն կ ա ր ա գ ի ր Կ Ե ր լ ա Հ ա յ ա ր ա  
ղ ա ք ի Ի գ ի ր Ե լ ի պ ա տ կ Ե ր ս: 1896: էջ Թ + 352: Ֆր. 3.60
- Ի. Տ ա շ Ե ա ն Ն. Բ. Վ., «Վ ա ր ղ ա պ Ե տ ու թ ի ի ն ա ո ա  
ք Ե լ ոց» ա ն վ ա լ Ե ր ա կ ա ն կ ա ն ո ն ա ց մ ա տ Ե ա ն ը. Թ ու ղ թ  
Ե ա կ օ ր ա յ ա ո Կ ո ղ ք ա տ ոս Ե լ Կ ա ն ո ն ք Թ ա ղ ղ է ի:  
1896: էջ Թ + 442: Ֆր. 6.—
- ԻԱ. Տ ու մ ա շ Ե կ Վ., Ս ա տ ու ն Ե լ Տ ի գ ր ի ս ի ա ղ ք Ե ր ք ա ց  
ս ա հ մ ա ն ն ք ք: Պ ա տ մ ա կ ա ն Ե լ տ Ե ղ ա գ ր ա կ ա ն հ Ե

- տազօտուիթիւն : Թրգմ. Հ. Բ. Պիլգրիկճեան : 1896 :  
Էջ Է+62 : Ֆր. 1.—
- ԻԲ. Կարաբիբեք Ա., Արգարու գրոյցը Մովսէս Խորե-  
նացոյ Պատմութեան մէջ : Թրգմ. Հ. Գ. Վ.  
Մէնէվիշեան : 1897 : Էջ ԺԵ+107 : Ֆր. 1.50
- ԻԳ. Եովնանեան Հ. Ղ. Վ., Հետազօտութիւնը նախ-  
նեաց ոամլօրէնի վրայ : Ուսումնասիրութիւնը եւ  
քաղուածէք. Մասն Ա. Ռամկօրէն մատենագրու-  
թիւնը : Տետր Ա : 1897 : Էջ Ը+272 : Ֆր. 4.—
- ԻԴ. Եովնանեան Հ. Ղ. Վ., Հետազօտութիւնը նախ-  
նեաց ոամկօրէնի եւն : Տետր Բ : 1897 : Էջ Ա—Ը :  
273—522 : Ֆր. 3.—
- ԻԵ. Գեղցեքի Հ., Համառօտ պատմութիւն Հայոց : Թրգմ.  
Հ. Գր. Վ. Գալէմքեարեան : Յաւելուածք 1. Յանկ  
Հայոց կոտորածներու առթիւ լոյս տեսած գրքերու :  
2. Գաւազանագիրք Կաթողիկոսաց եւ Պատրիար-  
քաց Հայոց : 1897 : Էջ Ը+130 : Ֆր. 1.50
- ԻԶ. Մեանկիշեան Հ. Գ. Վ., Գիրք (կամ յօդուած)  
գրելու արուեստը : Յաւելուած՝ Գիրք կարգալու  
արուեստը : 1898 : Էջ Է+118 : Ֆր. 1.25
- ԻԷ. Խաչաթեան Գր., Մ. Խորենացու նորագոյն  
աղբիւրների մասին քննադատական ուսումնա-  
սիրութիւնը : 1898 : Էջ Է+53 : Ֆր. 1.—
- ԻԸ. Տաշեան Հ. Յ. Վ., Ակնարկ մը հայ հնագրու-  
թեան վրայ : Ուսումնասիրութիւն Հայոց գրչու-  
թեան արուեստին : (10 զնկատիւ պատկերով)  
1898 : Էջ ԺԱ+202 : Ֆր. 2.50
- ԻԹ. Դադեանեան Յ., Փ. Բիզանդացի եւ իւր պատ-  
մութեան խարդախողը : Քննութիւնն Մ. Խորե-  
նացու աղբիւրների մասին : 1898 : Էջ Թ+175 :  
Ֆր. 2.50
- Լ. Մանեանեան Լ., Հայերէն քարքառախօսութիւն :  
Թրգմ. ի ուսերէնէ Հ. Գ. Վ. Մէնէվիշեան : 1899 :  
Էջ Է+26 : Ֆր. —.50
- ԼԱ. Ըօսեան Հ. Յ. Վ., Հայք ի Զմիւռնիա եւ ի շրջա-  
կայս : Հատոր Ա. Զմիւռնիա եւ Հայք. (պատկե-  
րագարդ) : 1899 : Էջ ԺԲ+369 : Ֆր. 5.—

- 1Բ. Թօսէաճ Ն. Յ. Վ., Հայք ի Զմիւռնիա եւ ի շրջա-  
 կայս: Հատոր Բ. Զմիւռնիոյ վիճակին զլիաւոր  
 քաղաքներն եւ Հայք. (սլատկերագարդ:) 1899:  
 էջ Ժ+161: Փր. 2.50
- 1Գ. Գովրիկեան Ն. Գ. Վ., Հայք յԵղիսաքեթուպոլիս  
 Դրանսիոյումնիոյ. Բ. Հտր. 1780—1825: 1899:  
 էջ Է+554: Փր. 5.—
- 1Դ. Գագանճեան Յ., Եղոկիոյ Հայոց գաւառաբար-  
 քառը: 1899: էջ Է+120: Փր. 1.—
- 1Ե. Կարրիէր Ա., Հեթանոս Հայաստանի ութ մեհեան-  
 ներն Ագաթանգեղոսի եւ Մ. Խորենացւոյ համե-  
 մատ: Թրգմ. Ն. Յ. Վ. Տաշեան (1 քարտէզով):  
 1899: էջ 43: Փր. —70
- 1Զ. Տաշեան Ն. Յ. Վ., Ժողովածոյք առակաց վար-  
 դանայ, ըստ Ն. Մառի, տեղեկատուութիւն եւ  
 քաղաւածքներ: 1900: էջ ԺԱ+193: Փր. 2.50
- 1Ը. Տաշեան Ն. Յ. Վ., Մատենագրական Մանր Ու-  
 սումաստիութիւնք. (տես ԺԶ:) Մանր Բ: Է-Ժ.  
 Խիկար եւ իւր հիմաստութիւնն, Ագապետոս եւ իւր  
 Յորդորականք առ Յուստինիանոս, Թղթակցութիւն  
 Արգարու եւ Բրիստոսի ըստ նորագիտ արձանա-  
 գրութեան Եփեսոսի, եւ Գէորգայ Պիսիդեայ վեց-  
 օրեայք: 1901: էջ ԺԲ+384: Փր. 4.50
- 1Ը. Տէր-Պօղոսեան Գր., Նկատողութիւններ Փաւս-  
 տոսի Պատմութեան վերաբերեալ: 1901: էջ  
 Ը+110: Փր. 1.50
- 1Թ. Վեբէր Ս., Արարառը Ս. Գրոց մէջ: Թրգմ.  
 Ն. Բ. Պիլէգիկճեան: 1901: էջ Ե+77: Փր. 1.—
10. Մանուարճեան Յովսէփ Վ., Ատրեստանեայ  
 եւ Պարսիկ սեպագիր արձանագրութիւնք կամ  
 որոնք նախիբ-Ուրարտու աշխարհին պատմութեան  
 կը վերաբերին: 1901: էջ 262: Փր. 4.50
- 10Ա. Խաչաթեանց Բագրատ, Հայ ժողովրդական  
 դիւցազնական վէպը: 1903: էջ Ը+72 Փր. 1.—
- 10Բ. Մեճեփիշեան Ն. Գ. Վ., Արդի լեզուագիտու-  
 թիւնը: Հտր Ա.: 1903: էջ Ը+204: Փր. 3.—
- 10Գ. Մարկոսաբո Յ., Հայ Բղեաշխը: Թրգմ. Ն. Թ  
 Կէտիկեան: 1903: էջ 39: Փր. —.75



- ✓ ԽԳ. Գեղցեքի Հ., Սկզբնատրութիւնք Բիւզանդիան քա-  
սակաթեմերու դրութեան (1 քարտէզով): Թրգմ. Հ.  
Գ. Գարանֆիլեան: 1903: Էջ Է+83: Ֆր. 2.—
- ԽԾ. Կիւրէակեքեան Բ. Վ., Ժովք, Ժովք-Տուրք եւ-  
Հոռմ-Կլայ, պատմական եւ տեղագրական ուսում-  
նասիրութիւն: 1904: Էջ Ը+117: Ֆր. 150
- ԽԶ. Կիւրէակեքեան Բ. Վ., Կոլոտ Յովհաննէս Պատ-  
րիարք. պատմագրական եւ քանասիրական ուսում-  
նասիրութիւն: 1904: Էջ ԺԴ+227: Ֆր. 350
- ԽԷ. Պեղեքսոս Հ., Նպաստ մը հայ. լեզուի պատ-  
մութեան: Թրգմ. Հ. Գ. Գարանֆիլեան: 1904:  
Էջ Ը+87: Ֆր. 125
- ԽԸ. Տեք-Մկրտչեան Գ. եւ Աճառեան Հ. Յ.,  
Բնութիւն եւ համեմատութիւն Եզնկայ նորագիւտ  
ծնոագրին: 1904: Էջ Է+105: Ֆր. 150
- ԽԹ. Գովրիկեան Հ. Գ. Վ., Հայք յնդիսարեթուպոլիս  
Գ. Հոռ. 1825-1904: Էջ Ժ+658: Ֆր. 7.—
- ✓ Ժ. Ետրեք Մ., Հայաստան, Լրդաստան եւ արեւ-  
մտեան Պարսկաստան քարեշական-ասորեստանեայ  
սեպագրերու համաձայն: Թրգմ. Հ. Բ. Պիլէզիկ-  
ժեան: 1904: Էջ Է+222: Ֆր. 3.—
- ԺԱ. Խաչաթեանց Գր., Հայ Արշակունիք ըստ  
Մովս. Խորենացոյ, կամ Նոր ուսումնասիրու-  
թիւններ Մովս. Խորենացոյ մասին: Թրգմ. Ար-  
սէն, Ս. Սիմոնեանց: 1906: Էջ Ը+124: Ֆր. 150
- ✓ ԺԲ. Պեղեքսոս Հ., Հայերէն եւ զրացի լեզուները:  
Թրգմ. Հ. Թ. Կէտիկեան: 1907: Էջ ԺԱ+257:  
Ֆր. 5.—
- ✓ ԺԳ. Հիւրշմեան Հ., Հին Հայոց տեղոյ անունները:  
Թրգմ. Հ. Բ. Պիլէզիկժեան: 1907: Էջ ԺԶ+443:  
Ֆր. 7.—
- ԺԴ. Պեղեքսոս Հ., Հին հայերէնիցուցական դերանուն-  
ները: Թրգմ. Հ. Յ. Տաշեան: 1907: Էջ Է+90  
Ֆր. 2.—
- ԺԵ. Գալեմքեանեան Հ. Գ. Վ., Կենսագրութիւն  
Սարգիս Արքեպիսկոպոսի Սարաֆեան եւ Ժամա-  
նակին հայ կաթողիկեայր: 1908: Էջ ԺԴ+433:  
Ֆր. 5.—

- ԺԶ. Աճառեան Հ., Հայերէն նոր քաներ նորագիւտ Մնացորդաց գրոց մէջ: 1908: էջ 38: Քր. — 60
- ԺԷ. Կիւլիէսեան Բ. Ժ. Վ., Եղիշէ, քննական ուսումնասիրութիւն: 1909: էջ ԻԸ+458: Քր. 7.—
- ԺԸ. Ակիւնեան Հ. Ն., Տիմոթէոս Կուզ հայ մատենագրութեան մէջ: էջ 1—60:
- ԺԹ. Աճառեան Հր., Հայերէն նոր քաներ Տիմոթէոս Կուզի Հակաճառութեան մէջ: 1909: էջ 61—106: Քր. 1.50
- ԻԹ. Ակիւնեան Հ. Ն., Զարարիա Եւ. Գնունեաց եւ իւր տաղերը: 1909: էջ ԺԲ+87: Քր. 1.—
- Կ. Ակիւնեան Հ. Ն., Կիւրիոն Կաթողիկոս Վրաց: 1910: էջ ԻԷ+315: Քր. 5.—
- ԿԱ. Մեճեճիշեան Հ. Գ. Ժ. Վ., Հայերէն լեզուի ուղղագրութեան խնդիրը: 1910: էջ 73: Քր. 1.—
- ԿԲ. Գիւտեարք Կ., Բիւզանդիոն եւ Պարսկաստան եւ անոնց ղիւանագիտական եւ ազգային-իրաւական յարաբերութիւնները Յուստինիանոս ժամանակ: Թրքմ. Հ. Հ. Համբարեան: 1911: էջ Ը+162: Քր. 2.50
- ԿԳ. Սամոսեւեան Խ., Մխիթար Գօշի Դատաստանագիրքն ու հին Հայոց քաղաքացիական իրաւունքը: 1911: էջ ԺԲ+344: Քր. 5.—
- ԿԴ. Առաքելեան Հ., Պարսկաստանի Հայերը, նրանց անցեալը, ներկան եւ ապագան: Ա. 1911: էջ Ը+97: Քր. 1.50

